

أحمد يونس  
نادر فوده 4  
عمارة الفرع (عاصفة الموت)

الطبخ

سما

للتنوير والتوعية

المجموعة الدولية  
للمنشر والتوزيع







## الاهراء

اهدي الجزء الرابع من مجموعتي الغالية "نادر فوده"  
الى مفتاح نجاحي وسر تفوقي  
الى القلب الذي اعاد لي ثقتي في مبادئ النجاح واخلاق الفرسان  
التي كنت ظننت في فترة من حياتي  
انها اصبحت ظللاً واهيه ....

الى كلمة السر :

المهندس طارق اسماعيل

اهدي لك سيدي هذا العمل الذي ساندتني فيه بكل حب وبلا  
مقابل !

وليس هو فحسب

بل في خطوات كثيره مضت ... وخطوات أكثر آتية ..

احمد يونس

قائمة

بعضها

# ما قبل المغامرة

ما وراء الطبيعة... جملة أو مصطلح غامض. فيه منا مجرد ما يسمعه يحس أنه على وشك دخول عالم الدجل والشعوذة والتخاريف. وفيه إلهي مجرد ما يسمعه يحس أنه على أعتاب دخول عالم ملوش قواعد تحكمه ولا قوانين يسير عليها، لكنه مقتنع تمامًا بوجوده ومؤمن بكل ظواهره الخارقة وغير المألوفة..

يا ترى انت مع أي فريق منهم؟!

اسأل نفسك دلوقتي؟

لما بتقرا رواية ليا أو لغيري

لما بتشوف فيلم رعب

لما حد بيحكملك حاجة غير مألوفة بتعتبرها مجرد تسلية ولا بتعتقد إنها حقيقية أو على الأقل جزء منها حقيقي؟

أنا اخترت من زمان من سنوات أكون ضمن الفريق الثاني ولم أكتفِ إني أكون في صفوف المتفرجين... لأنا قررت أكون من إلهي نزلوا أرض الملعب وشاركوا في كل الأحداث..

مرة يجيب جون ومرة يدخل فيه!



لكنه مع كل هدف بيكسبه أو بيخسره بيتعلم حاجة جديدة يضيفها  
لرصيده من الخبرة الحياتية..

## من أنا؟

- \* أنا (نادر فوده) الصحفي بجريدة (عمق الحدث) باب ما وراء الطبيعة
- \* أنا الصحفي المغامر المقامر بكل ما يملك من أجل الحصول على سبق حتى وإن كان الثمن أن تجدونني قتيلاً!
- \* أنا الصحفي الذي فقد الكثير من أجل أن يجني القليل..
- \* أنا الصحفي العاشق للظلام، لا أكره الموت بل أراه العدو الجميل!

## أنا (نادر فوده)

■ بدون مط المقدمات خليني اقولك طلباتي المعتادة، ما تتعاملش معايا إني الأديب العميق لأنك انت اللي هتتعب جداً، وهترهق نفسك على الفاضي في التنظير عن أسلوب كتابتي بالعامية المصرية اللي بطمنك ان كل اللي جاي مكتوب بها، أنا حكاي قاعدع المصطبة لامم عليها "اللي حابب يسمع ويس" فلو بتحب قعدة المصطبة تعالى انضم لنا احنا كتير ووجودك وسطنا ماتقلقش هنعس به وهيسعدنا، أما حبايبي اللي قاعدين

معايا من أول رواية الوقاد، فانتو الحقيقة أصحاب المصطبة  
الحقيقيين بس او عو تنسوا بلاش نخلط أبدًا بين رواياتي  
المقروءة وكتاباتي المسموعة مع الإعلامي والصدیق (أحمد  
يونس) على الراديو 9090 في برنامجہ (كلام معلمين)..  
وقدام شويه هتعرفوا حقيقة الطلب ده وسر إصراري عليه دائمًا !

في روايتي الرابعة هتلاقوني بتاخذ في سكة جديدة مختلفه عليا  
شويه، سكة المحقق (نادر فوده) أكثر من الصحفي (نادر فوده).  
في الأول كنت مش مستسيخ الفكرة لكن بالوقت اكتشفت ان الناس  
في وطننا العربي بتتعامل معايا بمنطق اسأل مجرب ولا تسأل طبيب،  
فتقبلت الأمر الواقع بل أحببته واعتنقته.

ياللا فلاش باك ضروري جدًا، انت هتعمله على الرواية اللي فاتت  
"النقش الملعون".....

خد وقتك من فضلك قبل ما تبدأ الصفحة الجاية.



## قارئة الفنجان

بعد فك طلاسم النقش الملعون، انطلقت إلى الشرقية، تحديداً  
الزقازيق - نقطة النهاية السابقة - عشان جواب جالي:

"السلام عليكم أستاذ نادر فوده، شهرتكم هي ما دفعتني أن أرسل  
إيكم هذا الخطاب اليأس..

المشكلة ليست مشكلتي الحقيقة، ولكنها مشكلة في بيت الجيران  
كانوا في بداية الأمر رافضين تماماً تصرفي ده لكن بمحاولات كثيرة  
وسرد لأعمالك المميزة، اقتنعوا أخيراً بأنه من الممكن أن يكون لديك  
الحل..

أرجو أن أكون قد وفقت في تكليفك بهذه المهمة وتحميلك تلك  
المسؤولية حيث أن الوضع حقاً مفرج،  
وخصوصاً إذا تعلق بأطفال صغار لا حول لهم ولا قوة...

أصحاب المشكلة اشترطوا ألا أخبرك بأكثر من هذا... وحينما تأتي  
للقائهم سيخبرونك بكافة التفاصيل...

عنوان المنزل -----

## على أول الطريق الزراعي

ركبت الميكروباص في طريقي للشرقية ووصلت الزقازيق،  
واتصلت بصاحبة الجواب:

نادر: آلو أنا نادر فوده.

صاحبة الجواب: أهلاً وسهلاً، أنا اسمي (فاطمة)..

نادر: أهلاً بيكي يا (فاطمة).

فاطمة: إيه نويت تيجي خلاص.

نادر ضاحكاً: أنا جيت بالفعل.

فاطمة: إيه؟ جيت!!

نادر: أيوه جيت. فيها مشكلة دي؟

فاطمة: لأ بس كنت قولي عشان أقولهم... ياللا مش مشكلة.

نادر: طب هنعمل إيه دلوقتي.

فاطمة: انت متأكد انك وصلت الشرقية؟

نادر: أنا في الزقازيق حضرتك جنب محل كشري الرشيدى.

فاطمة: طب انت إلهي وداك الزقازيق؟

نادر: الله.. مش حضرتك إلهي قولتي لي.



فاطمة: خلاص ادخل أي قهوة وأنا هجيب جوزي وهنزلك، ساعة بالظبط وهكون عندك.

نادر: يعني المشكلة مش في الزقازيق.

فاطمة: لأ بلد قريبة منها.

نادر: طيب أنا هستنى.

- قفلت معايا ودخلت محل الكشري عشان جعان أكلت وكعادتي زودت الشطة والدقة...

وأنا باكل سمعت صوت زعيق ودوشه من إللي شغالين ولقيتهم بيطردوا واحده ست وعماله تعيط وتقولهم عاوزه أكل حرام عليكموا!  
قومت بسرعة وقلت لهم:

"قعدوها وأنا هحاسب على أكلها."

رد واحد وقال لي: "يا أستاذ انت فاكر إن المشكلة في تمن طبق الكشري؟"

خدي يا ست، وادهاها علبة كشري كبيرة ومشيت، جيت أديلو الفلوس قالي: بقولك مش حكاية فلوس، احنا بنطلع لله كثير، انت مش فاهم حاجة.

- الفضول بدأ يلعب في دماغي..

نادر: أو مال بتطردوها ليه؟

العامل: عشان دي ست شؤم وبتاعة ودع وفنجان وكف وحاجات  
حرام والعياذ بالله!

نادر: طب أنا حسابي كام؟

العامل: شكلك غريب عن هنا.

نادر: آه والله.

العامل: الحساب مفيش ، انت ضيفنا، كل سنة وانت طيب.

خرجت من المحل وطلعت بسرعة، مشيت في الشارع اتجاه ما  
الست مشيت...

لاقيتها قاعدة في الأرض جنب محل مقفول بتاكل وعماله تقول  
بنهم وجوع:

"أطعموني.. أطعموني!"

قررت إنني أسجل معاها حوار صحفي بدون علمها، فتحت الشنطة،  
طلعت جهاز التسجيل وبدأت أسجل وقلت لها: سلام عليكم يا حاجه.

الست: حاجه؟ يسمع من بوقك ربنا.

نادر: جميعًا يا رب.

الست: أنا آه.. انت لأ.

نادر: يا ساتر ليه كده بس.... وضحكت.

الست: عشان مش هيسيبك تسافر.

نادر بقلق: هو مين ده؟

الست: كساب!!!!



- أنا جسمي كله اترعش واتنفض ولساني اتعقد..

الست: إيه مش هو لسه مبهدلك.

نادر: انتي عرفتي منين يا ست؟

الست: ماسميش ست.. اسمي (جوهر).

نادر: طب يا (جوهر) عرفتي منين؟

جوهر: سبني أكمل أكل وروح القهوة إلكي قدام اطلب لك قهوة

وهاتها وتعالى اشربها هنا جنبي..

المهم تجيبها في فنجان مش استكانه ولا كوبايه.. فنجااان فاهمني؟

قومت وأنا مجذوب، روحت القهوة وطلبت القهوة في فنجان،

نزلوها.. حاسبت عليه وقلت له هشربها بره وهرجع هولكم.

القهوجي ضحك وقال: (جوهر) صح؟ طيب خلي بالك لأنها

وليه مخاويه يبجي 100 جن...

أخذت فنجان القهوة ورجعت المكان ملقتش (جوهر).. وقفت

مضايق جداً إنها مشيت...

لقيت حد خبط على ضهري، اتخضيت لقيتها واقفة ورايا وبتقولي

متخافش! أنا مستنياك من زمان!

عجوزة لابسة جلابية سودا مبهدلة ورابطة راسها بطرحة سودا،

خارج من تحتها خصلات شعر بيضا مجعدة مخلياها زي الجنية

ولابسة على رقبتها سبحة خشب حباتها كبيرة..







جوهر قعدت في الأرض وأنا قعدت جنبها..

جوهر: اشرب.

نادر: طيب بتقري الفنجان يعني؟

جوهر: والكف والعين.

نادر: العين؟

جوهر: آه من عينك المخفية عرفت حاجات كثير عنك.

نادر: عيني المخفية؟ طيب!!!

جوهر: بكره تصدق كلامي لما يجيلك الجواب الجديد.

نادر: ما علينا طب والفنجان هتعرفي منه الغيب؟

جوهر: ملناش فيه يا بني، احنا مبنعرفش الغيب.. الغيب عنده هو!

نادر: أو مال إيه؟

جوهر: هقولك إللي شايفاه وخلص...

نادر: بس الفنجان قرايته حرام.

جوهر: ونبش الترب ع الميتين مش حرام؟!

اتخرست وشربت الفنجان واديته لها.. خدته قلبته على الأرض  
وسابته مقلوب شويه وقالت لي:

جوهر: انت مش من هنا.. تايه ولا إيه؟

نادر: لأ قولي إنتي.

جوهر بابتسامه ساخرة: الفنجان هو اللي هيقول.

رفعت الفنجان وبصت لي بتركيز وقالت:

درويش عاشق غرقان في الحب،

لكن الحب لا نفعه ف أرض ولا سما.

مسكينة حباك وعاشقك هي كمان بس ممنوعة يا عيني إنما....

نادر: هو في إيه!

جوهر: هتفضل تحميك وف وعدها ليك صادقة مش كدابة..

إللي انت جاي لهم غلابة ، إللي أذاهم أشرس من الديابة..

3 وردات ودبلوا بدري.. ومين يحمي الورد من غير ما يتجرح من

شوك الغابة.

نادر: ممكن ما تتكلميش بالنحوي؟

جوهر: حاضر يا أستاذ نادر.. مش نادر بردو.

شغلتك صعبة بس انت غاويها

كلها ألم وجروح مفيش طيب يداويها

ربك حافظك وصاينك طول ما انت ع الخير ناويها.

نادر: أنا زهقت.

جوهر: انت قابلت جن واتنين وتلاتة تحت الأرض وطلبت

منهم يرجعوك من توهة الدروب ورجعوك وصلحوا

المعطوب.



نادر: إيه المعطوب ده؟

جواهر: جتة أبوك! مش انت رجعت لاقيتها سليمة؟

نادر: آه.

نادر: طب أنا عندي سؤال.... (هالة) هتظهر تاني؟

جواهر: وحده العالم.

نادر: (كساب) هينساني امتي؟

جواهر: وحده العالم.

نادر: (الوقاد) ازاي مامتش وانا شايفه اتحرق قدام عينيا؟

جواهر: مرجعش.

نادر: بس أنا شوفته.

جواهر: فين؟

نادر: في القبر هو و(كساب).

جواهر: ومين شد العتة برا القبر؟

نادر: (كساب).

جواهر: ومين فضل جوا؟

نادر: (الوقاد).

جوهر: ومين شدك لتحت؟

نادر: (الوقاد).

جوهر: طلع برا القبر؟

نادر: لأ.

جوهر: يبقى ميت.

نادر: أنا خايف على أختي وأمي أوي.

جوهر: انت اخترت الطريق.

نادر: طب أعمل إيه ده شغلي.

جوهر: مش شغلتك بس، انت حابب تعمل ده.

نادر: طب والعمل؟

جوهر: ربك الحافظ، قوم يا بني الناس بيدوروا عليك عند

محل الكشري وخلي بالك على نفسك

ووصيتك الشجر الورور،

ومش كل طيب طيب!

نادر: يعني إيه؟



جوهري: يعني دلوقتي تمشي وأنا هقوم أرجع الفنجان ولو

عوزتني هتلاقيني هنا!

اديتها إللي فيه النصيب ومشيت..

لاقيت موبايلي بيرن، رديت لقيت (فاطمة) وروحت قابلتهم عند  
محل الكشري طلعا متصلين (10) مرات وأنا مسمعتش التليفون،  
ركبت معاهم عربيتهم..

وأول حاجة سألتهم عن (جوهري)..

قالولي هي مش من أهالي الشرقية. هي هنا ومنعرفش لها أصل...  
في ناس بتعطف عليها وناس بتسمع لها وناس بتخاف منها  
ويعتبروها شؤم..


تطرقنا للحديث عن المكان إللي رايحه قالولي انت هتقابل أهل  
البيت وتسمع منهم بنفسك...



# الفصل الأول

## عمارة الفزع الأولى (الشرقية)







وصلنا القرية ونزلنا من العربية قدام عمارة من ثلاث أدوار غير الدور الأرضي، لاقيت في استقبالي رجل في الخمسين من عمره، ربح بينا جداً.

لكن (فاطمة) وزوجها استأذنوا عشان أولادهم لو حدهم ومشوا رغم إصرار صاحب البيت انهم يقعدوا يشربوا الشاي.. دخلت قعدت مع الحاج وإللي عرفت بعد كده ان اسمه (الحاج مخلص)..

وطلب من الجماعة عنده الشاي والفطير يتقدم لي وقال: أنا معرفش حضرتك لأنني مليس في النت والحاجات دي، بس (فاطمة) وجوزها قالوا انك هتساعدنا صح كده ولا اني غلطان؟ نادر: ربنا المستعان يا حج.

الحاج مخلص: أنا عندي ولدين (يحيى وطارق) جوزت الاتنين بنتين من أعيان البلد وعملت لهم ليلة الكل كان بيحكى ويتحاكى عنها لحد دلوقتي والحمد لله مراتاتهم الاتنين حملوا وخلفوا..

(يحيى) عنده (عبد الله ونسرين) في ابتدائي.

و(طارق) عنده (محمد).



وأنا والحاجة مراتي اللي تعبانه دايمًا عايشين هنا تحت وكل واحد فيهم واخذ دور لو حده عايش فيه وكننا يا بني والله العظيم كويسين جدًا لحد ما في يوم جه خبط علينا (رفاعي)..  
نادر: (رفاعي) مين؟!!

الحاج مخلص: (رفاعي) إللي بيصطاد التعابين وبيطلعهم من البيوت لو حد شافهم، هو اسمه الحقيقي عبد السلام بس من زمان اللي بيخرجوا التعابين اسمهم الرفاعية فاتعودنا نقوله يا رفاعي

قالي يا حج (مخلص) أنا شوفت حية قدام البيت ودخلت تجري جوا..

خليته يدخل علطول، وقلب يا بني البيت حته حته ملقهاش نهائي..

في الآخر رش فيه مبروكة وقرأ الأحرار على البيت كله ومشى.

بعدها بيومين صحينا على صوت البت (نسرين) بنت (يحيى) طلعتنا كلنا فوق نجري لاقيناها في حزن أمها وقالت أنها شافت تعبان كبير في دولابها وهي بترص هدومها، قلبنا البيت كله وجبنا (رفاعي) تاني ومفيش فايده..

مفیش یومین لقیئت (محمد) نازل یجری علی السلم  
ویقولی: «الحقنی یا جدی التعبان شوفته فی الحمام.» دورنا  
تالت وعاشر ولا فیہ آی اثر یا أستاذ (نادر)..

العیال بقت تخاف تنزل من علی السرایر والمشکلة کمان ان  
مفیش حد من الکبار شاف التعبان ده، بقینا ننام وجنبنا شوم  
وعصیان عشان لو حد فینا شافه یموته علطول.

بعدها بأسبوع كانت الدنیا هدیت لاقیئت (رفاعی) جاي  
یقولی: «یا أبا الحج أنا عرفت إلیی انا شوفته والولاد إیه.»  
الحاج مخلص: إیه یا (رفاعی)؟

الرفاعی: ده مش تعبان ده جن والعیاذ بالله.

الحاج مخلص: جن؟؟!! ده إزای ده وعرفت منین؟!

الرفاعی: شیخنا (طلبة).. جالی زیارة وبالصدقة حکیت له  
علی إلیی حصل وقالی مدام محدش شایفه من الکبار جوا  
البت یتقی جن أو جنیة، قولهم او عاک حد یأذیه أو یقرب له.

الحاج مخلص: طیب هو شایف نعمل إیه عشان العیال  
متفضلش مرعوبة کده علطول ومیظهرش لهم تانی؟

الرفاعی: هو عنده استعداد یجی یزورکم ویحصن البیت.



الحاج مخلص: يتفضل أهلاً وسهلاً.

رفاعي: بس هو له طلبات.

أولاً مش هياخد ولا مليم غير لما تشوف بنفسك التعبان  
الجن وهو مخرجه.

الحاج مخلص: وثانياً..

الرفاعي: هيبعت لكم حاجات تعملوها قبل ما يجي.

- وافقت يا نادر يا بني وجالنا (رفاعي) بورقة مكتوب فيها الطلبات،  
إننا أولاً نقول كلنا جملة مكتوبة في الورقة..

نادر: جملة إيه؟

الحاج مخلص: مسموح لكم بالدخول والتصرف دون قيد  
أو شرط.

نادر: حلاوتك!

الحاج مخلص: وبعث إزازه ميه كبيرة قاري عليها قرآن وقال  
كله لازم يشرب منها وشربنا..

وجه اليوم الثاني جه (رفاعي) ومعه الشيخ (طلبة) كان راجل  
عنده يجي (54) سنة، دخل وكان معه غابة (عصا) طويلة  
وتخينه عمال يخطط بها في كل ركن في البيت ويقول:

«اخرج واترك البيت لأهله.»

«نقسم عليك بالعهد الذي بيننا وبينكم أن تخرج»

«اخرج لا تأذينا ولا نأذيك.»

«اخرج وارجع لعشيرتك.»

كنت ماشي معاه يا بني لحد ما دخل أوضة (نسرين) البت  
أول ما شافته استخبت ورا أبوها وكان (محمد وعبد الله)  
بردو ماشيين وراانا...

(طلبة) وقف وقال: الجن هنا...

يا رب الناس اصرف الوسواس...

يا مساعدين أظهروا الخناس..

«اخرج واترك البيت لأهله»

«نقسم عليك بالعهد الذي بيننا وبينكم أن تخرج.»

«اخرج لا تأذينا ولا نأذيك.»

«اخرج وارجع لعشيرتك.»

وبعدها بدأ يقول كلام غريب وينادي على ناس مش  
موجودة، أساميهم غريبة ويتعرش وهو واقف وفضل يخبط  
بالغابة المرة دي أكثر من أي مرة..



وقام راشش ميه من إزازه صغيرة، بعدها لاقت التعبان  
بيتلوى في الأرض..

العيال الصغيرة فضلووا يصرخوا... جريت عشان أموته  
(طلبة) منعني وقالي لأ ده مش تعبان.

بصراحة ماستتتش ونزلت عليه بشومة كانت في إيدي..

(طلبة) الحقيقة شدني بس مقدرش عليا وسابني....

التعبان كان بصراحة مستسلم تمامًا لقدره ومحاولش حتى  
يهرب..

قالي: ماكنش له لازمة تموته يا حج (مخلص) قولتلك ده  
مش تعبان ده جن.

الحاج مخلص: يعني إيه كنت اسيبه لما ياكل حد من العيال؟  
طلبة: يا حج مخلص انت موت جن.

الحاج مخلص: وانت مامنعتنيش ليه؟

طلبة: حاولت بس أنت زقتني جامد ووقعيني.

الحاج مخلص: أنا آسف والله بس اللي حصل هنا خلاني  
مش شايف قدامي.

27

- (رفاعي) كان مستنينا تحت أول ما عرف باللي حصل ميل  
عليا وقال لي كافي شيخنا يا حج .

- قولته أديلو كام يا (رفاعي) يعني..

رفاعي: اديلو (004ج) حلوين أوي.

- وفعلاً إديته (ال004ج) وشلنا التعبان رميناه والبيت بقا

أهدا، لكن يا بني واضح أن دي كانت البداية..

بعد أسبوع بالضبط كنا الساعة (12) بالليل

(عبد الله) نزل عندنا وقعد يتفرج معايا أنا وستة على التليفزيون  
وبعدها بشويه قام وشال الفيشه بتاعت التليفزيون ودور وشه للحيطه  
وبدا يخبط دماغه فيها..

في الأول افكرناه بيهزر لكن الخبط زاد ، قومت اشوف ماله لاقيت  
عينيه ابيضت كلها وعمال ينزل من بوقه رغاوي ، شديته لورا وفوقته  
وغسلت له وشه ودخلته أوضه عندنا تحت ونيمته .

وكان بيخرف وبيقول: سكنوا البيت..

سكنوا البيت..

سكنوا البيت..

مفيش ربع ساعة كنا أنا وجدته بنتكلم إن الواد ده أول مرة يمشي  
وهو نايم كده!



سمعنا مرات (يحيى) ابني بترقع بالصوت، طلعت أجري لاقيت  
(نسرين) بنتها قاعده في الحمام في ركن في الأرض وكل ما حد يقرب  
منها عنيتها تبيض وتطلع صوت يخوف ولما نبعث ترجع عادية..

أنا عملت كده بنفسى قربت منها عنيتها ابيضت وطلع منها صوت  
حشرجة مخيف... بس اتكلمت وقالت:

انت إللي قتلت جوزي هحرق قلبك عليهم واحد واحد.. سكنا  
البيت.. سكنا البيت..

بعدها (نسرين) قامت مشيت زي (عبد الله) زي النايمة ومشيت  
ناحية أوضتها وراحت لسريها ونامت..

أما (محمد) فاخطفى محدش لاقينه في أي شقة ولا عندي تحت  
ولا عند أبوه ولا عمه..

لحد ما سمعنا صوته هو كمان بيصرخ من فوق الدور الأخير - إللي  
مش مفروش - طلع أبوه وعمه وسمعت صوت ضرب وخبط فوق  
وانا عاوز أطلع وراهم بس رجليا مش قادرة تشيلني!

ولاقيت (طارق) شايل ابنه (محمد) ونازل به..

أما (يحيى) فنازل ورابط تعبان تخين بحبل بعد ما موته..

وقالي: طلعتنا يا بابا لاقينا (محمد) في الأرض والتعبان عمال يلف  
في دايره حوالية وأول ما شافنا بخ علينا لكننا موتناه الحمد لله..

كانت ليلة سودا يا أستاذ (نادر) ما يعلم بها إلا ربنا سبحانه وتعالى..

تاني يوم وقت صلاة الفجر لاقيت (نسرين) نزلت تحت وقعدت  
معايا وقالت لي:

نسرين: جدو أنا عاوزة أحكي لحضرتك على حاجة..

الحاج مخلص: انسي يا حبيبتى الموضوع ده ومتفكريش فيه  
تاني .

نسرين: أرجوك يا جدو اسمعني.

الحاج مخلص: خير يا حبيبتى.

نسرين: الراجل إल्ली اسمه (طلبة) عمل حاجة وهو واقف  
بيقراً في أوضتي وأنا واقفة مستخبية ورا بابا كنتوا كلكم  
مركزين معاه قام راشش فيه من الإزازة اللي كانت معاه،  
كلكم غمضتم عنيكم وقت بسيط وقام هو ضارب العصا  
التخينة اللي كانت معاه ضربها في الأرض جامد أوي نزل  
منها تعبانين واحد جري وخرج بسرعة جداً بره الأوضه  
والتاني كان عامل زي ما يكون نايم فضل على الأرض  
وبعدھا انتوا شوفتوه.

الحاج مخلص: يعني ايه يا نسرين؟

نسرين: يعني محدش منكم أخذ باله أن الغابة اللي معاه دي  
فاضية من جوا وكان جواها التعبانين دول.



الحاج مخلص: بس احنا مشوفناش الكلام ده.

نسرين: أنا كنت فاكره انها تخاريف، بس لما التعبان الثاني  
ظهر أنا أتأكدت ان كلامي كان صح..

الحاج مخلص: انتي متأكدة من كلامك؟

نسرين: والله العظيم متأكدة.

الحاج مخلص: يبقى الراجل ده لا شيخ ولا نيلة نصاب  
و(رفاعي) أفندي بقى متفق معاه ولا ضاحك عليه هو كمان،  
قومي يا حبيبتى صلي الفجر ونامي والصبح أنا هتصرف في  
الموضوع ده كله... بس أنا واخذ على خاطري منك كان  
لازم بردوا تحكي إللي حصل... وموضوع اننا مانصدقكيش  
ده مش سبب.

نسرين: ما أنا محكتش عشان في سبب تاني.

الحاج مخلص: سبب إيه؟

نسرين: الست العجوزة... بتجيلي في الحلم وبتقولي قتلوا  
جوزي لو اتكلمتي وقولتي انك شوفتي اخوه هولع في البيت  
كله وهسخطك تحت رجلي..

قامت بعدها (نسرين) وأنا قولت فعلاً النهار له عينين يا (طلبة)

الكلب!

تاني يوم الصبح لاقيت الباب بيخبط وداخل علينا الشيخ (طلبة) ووشه مخطوف وبيقول: أنا عرفت إللي حصل وفهمت كل حاجة.

الحاج مخلص: منين بقى يا فضيلة المفتي؟

الشيخ طلبة: جولي وقالولي انهم هينتقموا منك.

الحاج مخلص: هم مين؟! التعابين بقا ولا العصا المسحورة؟

الشيخ طلبة: عيلة الجن إللي انتوا قتلته..

الحاج مخلص: طب على فكره احنا موتنا تعبان تاني بليل.. إيه

رأيك بقا؟

الشيخ طلبة: أخوه.. قتلته وأخوه ومراته مش هتسيبكم.

الحاج مخلص: والعمل بقا يا ماردا الجبل؟

الشيخ طلبة: لازم الترضية.

الحاج مخلص: ودى إيه الترضية بقا؟

الشيخ طلبة: حاجة من اتنين، يا حد من أحفادك يبقى ضحية ويتدبح

ونرش دمه فوق ال..

الحاج مخلص مقاطعًا: امشي اطلع برا يا راجل يا مخبول يا ابن

ال.....

الشيخ طلبة: طب استنى هقولك الترضية الثانية.

الحاج مخلص: قوم غور من هنا.. برا يا نصاب يا ابن ال.....



الشيخ طلبة: أنا واخذ بالي انك عمال تتريق على كلامي من الصبح  
وتغلط فيا...

خليك اتريق وبكره لما مراته تشييكم وتوريكم الويل وتموت  
أحفادك، انت هتيجي تبوس رجليا عشان الحقكم وخلي تريقتك وقلة  
أدبك تنفعك وهنشوف ماردا الجبل هينفعكم ولا لا.

- محستش بنفسي غير وانا عمال اضرب فيه لحد ما خرج يجري..

نادر: طب وبعدين يا حج (مخلص).

الحاج مخلص: ولا قبلين قلبت الدنيا على (رفاعي) اختفى،

بس مفيش يوم والثاني و(محمد) بقى يصحى من النوم يصرخ

وبعده (عبد الله) ومن وراهم (نسرين)، اقولك،،

أنا هناديهم لك واحد ورا الثاني تسمع منهم.

وقام الحاج (مخلص) ورجع ومعاه ولد صغير شكله في ابتدائي

ومعاه والده ووالي ده (محمد) وأبوه (طارق)، سلمت عليهم واستأذن

الحاج (مخلص وطارق) وسابولي (محمد) اللي ابتسم لي ابتسامة

طفل بيحاول يعمل انه خبيث ووالي: أنا عارف انت جايبني ليه.

نادر مبتسمًا: ليه بقا يا فصيح؟

محمد: عشان أحكيك!

نادر: عن إيه؟

محمد: عنهم!

نادر: هم مين؟

محمد: صلي على النبي.

نادر: عليه الصلاة والسلام.

محمد: زيد النبي صلاة.

نادر ضاحكًا: اللهم صلي عليك يا نبي.

محمد: من بعد ما جدي طرد (طلبة) وأنا و(عبد الله) بنشوف

حاجات غريبة.

نادر: طب و(نسرين)؟

محمد: ما بتكلمش! عندك ابقى اسألها.

نادر: طب انت بتشوف إيه؟

محمد: صحيت في ليلة على صوت ماما بتقولي يا (محمد)

قوم اظفي نور الحمام فضلت عامل نفسي نايم ومرضتش

أقوم،

قامت جت جنب السرير وخبطتني جامد على ضهري وقعدت

تزعق: قوم قووووم

قومت بصيت حواليا ملقتهاش خالص، والله كان صوت ماما زي

ما تكون نايمة جنبي على السرير،



المهم قومت عشان مزعلهاش وروحت لاقيت الحمام نوره والع  
فمديت إيدي عشان أظفي زرار النور بس لاقيت حاجة غريبة.

نادر: لاقيت إيه؟

محمد: جلايبة بابا إليلي متعلقة على شماعة في جنب من  
الحمام لاقيتها زي ما يكون حد لابسها.

نادر: ازاي يعني؟

محمد: منفوخة كده زي ما يكون حد لابسها وملوش راس  
ولا رجلين والإيدين متربعة ومتعلقة ف الشماعة، وقفت  
متنح مش مصدق المنظر... دخلت اتسحبت بالراحة عشان  
أفهم في إيه، بمجرد ما دخلت الباب اترزع وأنا جوا الحمام  
والجلايبة فضلت تتحرك وكانت زي ما تكون بتنط عشان  
تفك من الشماعة وفكت فعلاً وبقت حرة ومش ماسكة  
في أي حاجة ووقفت على الأرض وبسرعة قربت ناحيتي،  
حطيت إيديا على وشي عشان خايف منها وغمضت..

أنا فضلت شويه مغمض بس حاسس بحاجة بتلمس شعري زي  
الإيدين وحاسس بالجلايبة بتلمس هدومي.. فتحت عنيا بالراحة  
مشوفتش أي حاجة كأنني لسه مفتحتش عنيا..

الدنيا ضلمة حواليا ولا أنا اتعميت... سمعت صوت حاجة ماشية  
أو بتزحف على الأرض..

سمعت من برا صوت ماما بتقول لبابا: «الكهرباء عملت قفله، شوف صلحها يا (طارق).»

جيت أنادي على ماما صوتي ماخرجش، اتحركت ناحية الباب مديت إيدي ناحية المقبض لاقيته مش موجود وتاني حسيت بايد بتلمس شعري وأنا عمال أترعش من الرعب وبعدها حاجة بتمشي على رجليا دافية جدًا وناعمة، فضلت تمشي وتلف حوالين رجليا أكثر وأكثر لحد ما اتمكنت مني وضغطت على رجليا فاتكعبلت ووقعت على وشي..

الحاجة دي سابت رجليا وبدأت أسمع الصوت بتاع التعبان ده.. عارفه؟

نادر: فحيح آه.

محمد: أيوه هو الفحيح ده درسناه السنة إللي قبل إللي فاتت.. سمعت الفحيح ده جنب ودني، حسيت بلسان التعبان بيخبط في وشي ووداني وبردو مش عارف أصرخ...

لسان التعبان كان سخن جدًا لدرجة أنه لسعني من سخونته حتى انت بص على وشي شايف الخطوط الرفيعة دي؟ هي مش باينة أوي بس كانت في الأول واضحة جدًا ولونها أحمر أكثر من دلوقتي.. شايفها؟ نادر: آه شايفها.



محمد: أهى دى كانت مكان لحس التعبان لوشى، كنت حاسس أن وشى بيتكوي، حاولت أقوم جسمى كله متكفف وكمان خايف أعمل أى حركة يقوم الحنش واكلنى.

نادر: الحنش!!

محمد: آه الحنش ما أنا جايلك فى الكلام، سمعت أبويا بيقول لماما ان خلاص هيوصل الكهرباء وبعدها علطول الكهرباء رجعت فى الحمام وشوفته مكانش تعبان زى اللي موتناهم فى البيت خالص ده كان عامل زى اللي بيحوا فى برامج الحيوانات، هو تخين لكن رأسه مبططة وكبيرة، ولما النور جه وعيني جت فى عينه قام وقف.

نادر: قام وقف؟

محمد: آه والله نصه وقف وقام راجع براسه ورا عشان يهجم عليا وانا عماله دموعى تنزل من الرعب ونفسي صوتى يرجع عشان أصرخ... رجعت سمعت من برا صوت بابا بيقول لماما: معرفش.

ده لما هي سألته: ماشوفتش (محمد)؟

وبعدها قالها: «نور الحمام منور يمكن جوا.» جه وخبط على الباب وينادى ولكنى مش عارف أنطق..

وبعدها فتح الباب ومع فتحة الباب أنا صوتى خرج، وصرخت بكل عزمى:

الحقنى يا بابا اااا..

نادر: وبعدين يا (محمد).

محمد: التعبان بعد ما كان بيستعد انه يهجم عليا اتلف حوالين نفسه  
بسرعة وبعدها جري بسرعة رهيبه ودخل جوا البلاعة...

فضلت أعيط وبابا حضني وشالني دخلني الأوضه .

نادر: ده على فكرة اسمه تعبان الكوبرا بالوصف إللي انت وصفته  
ده يا (محمد).

محمد: آه ما هي ماما برده قالت الاسم ده.

نادر: طب بابا شاف التعبان؟

محمد: آه ، بابا جاب مية نار ودلقها جوا البلاعة، قامت مولعة وطلع  
منها دخان كثير وصوت زي ما تكون واحدة ست بتتحرق جواها،  
جريت من الأوضه روت عند بابا وماما،

بابا شغل الشفاط بتاع الحمام وخرجنا كلنا وقفل الحمام عشان  
ما نموتش من الريحة وسمعنا خبط جامد على الباب يرعب وصوت  
الست الللي بتصوت جوا البلاعه كان بيزيد وبيخوف أوي وسمعتها  
والله بتقول:

الويل لكم مني .. الويل لكم مني .

ومن بعدها كل يوم يدلقوا فيها مرة مية نار ومرة سم ومرة جاز عشان  
لو لسه مستخبي أي حاجة تانية جوا تموت، بعدها أنا سخنت جدًا  
وعملولي كمادات وحلمت تاني بالتعبان إنه لما لحس وشي اتكلم  
وقالي ..



نادر: اتكلم؟!

محمد: آه وربنا،

قال لي كمان: سنحرقكم الويل لكم مني.

(طلبة) قال لجدي إن احنا هنندم وهنرجع نتحايل عليه ينقذنا وتيته  
قالت لجدي بعد ما حصل إللي حصل: هات (طلبة) وراضيه بكلمتين  
وقولو يحل الموضوع ده قبل الحكاية ما تزيد عن كده.

لكن جدي رفض وقالها لما يكون آخر يوم في عمري، ده راجل  
نصاب..

نادر: طيب وانت عامل إيه يا (محمد) دلوقتي؟

محمد: أحلامي كلها كوايس، تعابين كثير بتجري ورايا  
وبتبقى عاوزه تعضني وتاكلني..

نادر: طب وانت صاحي بتشوف حاجة؟

محمد: أنا من يوم ما شوفت الكوبرا دي وأنا بنام جنب أبويا  
وأي حاجة بسمعها بحضنه واستخبي فيه ولما باجي أدخل  
الحمام بخليه واقف برا الحمام يستتاني، بس بصراحة في  
مرة كنت في المدرسة لما (عبد الله) جت له الحالة.

نادر مقاطعًا: حالة إيه؟

محمد: هيبقى يحكيك هو بنفسه، المهم لما (عبد الله) جت له الحالة جريت أروح أشوفه وانا نازل على سلم المدرسة أجري لاقيت واحدة ست عجوزة منكوشة قاعدة تحت في الأرض

وقالت لي: جوزي يا ملاعين،

وصوتت وقالت تاني: جوزي جوزي يا ملاعين،

وطلعت تجري ناحيتي على السلم على أيديها ورجليها زي الكلاب، طلعت اجري تاني فوق قومت خبطت في أبله (عبير) اللي كانت بتزعق وهي نازلة على السلم للعيال، فالست دي أول ما سمعت صوت الأبله جريت واستخبت في بير السلم..

نادر: طب وبعدين؟

محمد: ما شوفتهاش تاني بس كل شوية أشوف التعبان .  
آخر مرة شوفته وأنا داخل أوضة بابا وماما كان على الكومودينو وعمال يلف بسرعة رهيبه حوالين الأبا جورة، زعقت وصرخت على ما صحبوا كان اختفى خالص، ومرات تانية بس كل مرة بتفزع أكثر من إللي قبلها، هو ما بقاش بيقرّب مني بس لازم كل مرة اسمع صوت الست بتقول: هنتقم منكم يا ملاعين، والحاجات دي..

نادر: طيب (عبد الله ونسرين) بيشفوا التعبان؟

محمد: (عبد الله) لا مبيشوفش إنما (نسرين) معرفش.

اسالها !



محمد: هيبقى يحكيك هو بنفسه، المهم لما (عبد الله) جت له الحالة جريت أروح أشوفه وانا نازل على سلم المدرسة أجري لاقبت واحدة ست عجوزة منكوشة قاعدة تحت في الأرض

وقالت لي: جوزي يا ملاعين،

وصوتت وقالت تاني: جوزي جوزي يا ملاعين،

وظلعت تجري ناحيتي على السلم على أيديها ورجليها زي الكلاب، طلعت اجري تاني فوق قومت خبطت في أبله (عبير) اللي كانت بتزقق وهي نازلة على السلم للعيال، فالست دي أول ما سمعت صوت الأبله جريت واستخبت في بير السلم..

نادر: طب وبعدين؟

محمد: ما شوفتهاش تاني بس كل شوية أشوف التعبان .

آخر مرة شوفته وأنا داخل أوضة بابا وماما كان على الكومودينو وعمال يلف بسرعة رهية حوالين الأبا جورة، زعقت وصرخت على ما صحبوا كان اختفى خالص، ومرات تانية بس كل مرة بتفزع أكثر من اللي قبلها، هو ما بقاش بيقترب مني بس لازم كل مرة اسمع صوت الست بتقول: هنتقم منكم يا ملاعين، والحاجات دي..

نادر: طيب (عبد الله ونسرين) بيشوفوا التعبان؟

محمد: (عبد الله) لا ميشوفش إنما (نسرين) معرفش.

اسالها !

نادر: اشمعنى.

محمد: مبتحكيش حاجة لحد.

نادر: طيب ممكن تنادي لي على (عبد الله).

محمد: حاضر هو مستني فوق، جدي زمانه قال له ومستني

دوره.

- في الوقت ده ظهر الحاج (مخلص) وقال:

الحاج مخلص: هنكمل كلامنا بعد العشا بقايا أستاذ (نادر)

اتفضل جوا في الصالون.

دخلت لاقيت وليمة عظيمة مش ممكن دي تكون عشا أبدًا (كرم الشراقة لا يحتاج لشرح).

الحاج مخلص: احنا اتلهينا في الكلام وأكد انت ماتعشتش فناكل لقمة سوا.

نادر: ماكنش له لازمة التعب ده كله.

الحاج مخلص: ولا تعب ولا حاجة.. نادي على اخواتك وعمك يا (محمد).

- شويه وكان الرجالة الكبار و(محمد وعبد الله) والحاج (مخلص) وأنا قاعدين بناكل وسألت عن (نسرين) فقالوا انها قالت مش جعانة دلوقتي.



طارق والد محمد: إيه رأيك في الموضوع ده يا أستاذ (نادر)؟

نادر: والله أنا لسه بسمع وعاوز أجمع خيوط على أد ما أقدر.

طارق: أكيد لما تسمع من باقي الولاد هتقولنا رأيك.

يحيى والد عبد الله ونسرين بتهكم:

هو حضرتك بقا صحفي؟

نادر: أيوه.

يحيى: وهو من امتي الصحفي بيعالج؟

نادر: هو حد قالك إني بعالج!!

يحيى بأسلوب سخيف:

أومال أنت بتعمل إيه عندنا؟!

نادر بأسلوب أسخف: أنا هنا عشان اتم طلبتم إني آجي!

يحيى: وعلى كده هتكتب عننا وهتفضحنا في الجرايد؟

نادر بأسلوب مستفز: أيوه طبعا ودي محتاجة سؤال.

يحيى: تمام ما هو الحق مش عليك، الحق على إللي سمح

لك تيجي وتدخل وسطنا.

تدخل الحاج مخلص: جرى إيه يا (يحيى) في إيه؟

يحيى: مفيش يا حج! أظن ان أنا اتكلمت معاك في الموضوع ده وقلت لك رأيي من الأول.

الحاج مخلص: أنا صاحب الكلمة في البيت ده ولا نسيت؟!  
يحيى: وهو مين كان دخل الغم ده كله البيت؟!

- (يحيى) قام من على الأكل وسابنا وخرج!

طارق: معلىش يا أستاذ (نادر) أصل اللي العيال شافوه كوم.

نادر: فاهم فاهم ما (محمد) حكالي.

طارق: سييني أكمل كلامي، بقولك اللي العيال شافوه كوم واللي شافته (نسرين) كوم تاني!

نادر: أنا محتاج أقعد معاها.

الحاج مخلص: لأ الصبح بقا... حضرتك تشرب الشاي وتطلع تريح في الشقة إلكي فوق، فرشنا لك أوضه فيها ومن الصبح تقعد مع (عبد الله ونسرين).

نادر: إلكي تشوفه يا حج (مخلص).

خلصنا العشا والشاي اتحط وشربته و(محمد) قاللي اتفضل يا عمو (نادر) هطلعك اوضتك، عجبتي كلمة عمو دي أول مرة أسمعها.

مشيت ورا (محمد) طلع الدور الأخير عندهم فتح لي شقة ما شاء الله كبيرة..



الصالة لوحدها فيها (3) مكاتب واضح إنه لمذاكرة الأولاد وفي

(4) أوض فتح لي واحدة منهم لقيت فيها سرير واضح انه لسه مفروش من شويه صغيرين ودولاب صغير..

و(محمد) قالي بحذر: خلي بالك الشقة دي إللي طلع فيها أخو الجن.

نادر: حاضر يا حنش وضحكت.

ونزل محمد وقفل باب الشقة وراه وطلعت شوية حاجات من الشنطة وبدأت أكتب ملاحظاتي عن كل إللي سمعته :

إن الموضوع واضح جدًا، (طلبة) ورا كل المصايب دي وإني محتاج أسمع من (نسرين) تحديدًا، لأنه كلهم بيتكلموا عنها وكأنها شابة كبيرة مع إنها مجرد طفلة في ابتدائي، و(عبدالله) هتكلم كمان معاه عشان أكمل أطراف القصة..

بس أرجع وأقول واضح ان (نسرين) اتعرضت لحاجات كبيرة وغيرهم كلهم..

أنا هنام دلوقتي لأنني محتاج افصل دماغي شويه والصبح أكمل

القصة دي كلها...

## العاصفة الأولى

مددت على السرير وعيني بدأت تروح في النوم.. بس ملحقتش  
لأن باب الأوضه خبط قومت قعدت وقلت: مين؟  
مجاليش رد!!

قلت وانا بضحك: أهلاً وسهلاً! احنا بدأنا!  
سمعت همس جاي من برا الأوضه... همس كثير متداخل..  
اتعدلت في قعدتي ونزلت رجليا من على السرير بالراحة وقومت  
وقفت قدام الباب عشان أفتحه..

لكن الباب اتفتح بمنتهى القوة وخبطني في وشي وقعت في الأرض  
من قوة الخبطة ودوخت جداً ودخل ضوء أحمر رهيب جداً عمى عنيا،  
حاولت أفتحها بصعوبة مش قادر من قوة الضوء، وصوت رهيب قال  
كلمة واحدة: ارحل... ارحل.

(ارحل) دي اتقالت وكأنها خارجة من قلب جهنم، من قوة الضوء  
حطيت إيديا على عنيا بحميها من شدته..  
الباب اترزع واتقفل لوحده بردو...



فضلت أحاول أستوعب اللي حصل لكن الهمس رجع من جديد..  
 اتحركت ناحية الباب بسرعة جدًا وفتحته بسرعة ملقتش أي حاجة!  
 بس سمعت حاجة ورايا جوا الأوضه فدخلت الأوضه تاني.. لقيت  
 راجل واقف عند الشباك تحديدًا واقف ومديني ضهره! واتلفت لي  
 وكان آخر حد ممكن أتوقع اني أشوفه..

المهندس (عادل)... والد (هالة)!!!!

(لمعرفة مين عادل وهالة يرجى مراجعة الجزء الثالث من سلسلة  
 نادر فوده «النقش الملعون»)

نادر: إيه ده؟

عادل: انت فاكرني هسيب حقي وحق بنتي.

نادر: أنا عارف إنك ميت.

عادل: وهو اللي مات غدر هسيب حقه، ما انت سيد  
 العارفين.

نادر: وانا مالي مش انت اللي أصريت تنزل لها.

عادل صرخ: انت ما منعنيش لبيبييه؟

نادر: هو انت تعمل المصيبة ووقتها تهددني بالقتل لو  
 مساعدتكش فيها، وترجع دلوقتي تقولي انت ما منعنيش

ليه!!





وقالي: شوفت يا ندل!

نادر: شوفت بس بردوا مش ذنبي، أنا مليش يد في اللي حصلك.

عادل صرخ: لأ ليك، ليك وفتح باب الأوضه ورجع النور الأحمر المتوهج الشديد جه تاني ودخلت نفس الكائنات من الباب ومن كتر النور أنا مش عارف أميزهم هم فين بالضبط لحد ما حسيت بألم رهيب في رجليا وحاسس انها بتحاول تكعبلني عشان اقع وتعمل فيا زي ما تعمل في عادل، فضلت اتنطط وأستعيد بالله من شر ما خلق!

الباب اتقف ولقتني واقف لوحدي ومفيش أي حاجة حواليا، حسيت بدوخة شديدة وألم رهيب في رجليا، اتحركت واترمت على السرير وأيقنت ان أعدائي زادوا واحد وقرر ينتقم بس في زمان ومكان غلط تمامًا!

بعد انتهاء العاصفة الأولى، رجعت مددت على السرير عشان أنهي الليلة دي ونمت بالفعل..

صحيت بعد مدة أعتقد طويلة على صوت الحاج (مخلص) وهو واقف على باب الأوضه، قومت بسرعة فتحت..

قالي: ناموسيتك كوحلي يا أستاذ (نادر) شكلك بقالك كثير منمتش.

قولته: فعلاً، أنا جايلكم من الشغل والله.

الحاج مخلص: طيب يالا قوم عشان تفطر.

نادر: هي الساعة كام؟

الحاج مخلص: الساعة اتنين وعشرة بعد الظهر.

نادر: ياااه.

الحاج مخلص: هسالك سؤال بأمانة.

نادر: اتفضل.

الحاج مخلص: حسيت بأي حاجة غريبة؟

نادر: حاجة زي إيه؟

الحاج مخلص: أصل العيال مصممين أن الشقة دي فيها

حاجة غريبة من يوم ما حصل اللي حصل، وأنا طلعت نمت

كذا مرة ولا شوفت ولا حسيت بأيوها حاجة.

نادر ضاحكاً: شكلك نومك خفيف.

الحاج مخلص: خفيف ازاي؟ ده أنا بنام زي الميتين.

نادر: وعاوز تحس بحاجة... انزل يا حج انزل وأنا جاي وراك.

غسلت وشي ونزلت ورا الحاج (مخلص) وكان الفطار متجهزلي

لوحدي..



والحاج (مخلص) قالي: ما تقلش في الأكل عشان الغدا قرب.

بعد ما فطرت لاقيت (عبد الله) جه وقعد جنبي..

قولته: جاهز يا (عبد الله)؟

عبد الله: أيوه.

نادر: أنا ممكن أسجل كلامك.

عبد الله: ماشي مش انت سجلت لمحمد؟

نادر: أيوه طبعًا وان شاء الله مفيش أي مشكلة هتحصل ثاني

خالص.

عبد الله: يعني مش هشوفها في المدرسة.

نادر: هي مين؟

عبد الله: العفريته .

نادر: لأ بص بقا احكي لي من الأول يا (عبد).

عبد الله: أول مرة شوفتها كنت في حصّة العربي بتاعة أبله

(أحلام) كانت الابله واقفة بتشرح لاقيتها شكلها بيتغير

وعنيها بقت واسعه اوي ووشها بقا اسود، أنا في الأول

ضحكت اوي على شكلها بس بعد شويه شكلها بقا مخيف..

شكلها بقا عجوزة أكثر من جدتي

وعماله تقولي: يا (عبد اللا لالا لالا لالا لالا) وصوتها وحش أوي.

فضلت مبرق لها ومش عارف أتكلم، ببص على الواد (عبد الرحمن) اللي جنبني لقيته بياكل وبيبلغ زي الجاموسة وبصيت على (عاطف) زميلي بر دو لقيته باصص لها وفاتح بوقه زي ما هو بيعمل على طول... تحس بوقه بيصطاد الدبان!

أبله (أحلام) زعقت لي فبصيت لها تاني لقيتها رمت الكتاب اللي في إيديها ومسحت السبورة وبدأت تكتب بسرعة، كتبت جملة واحدة:

«الويل لكم، الهلاك لمن قتل أسرتي.»

وفضلت تعيد فيها بسرعة جدًا.

أبله أحلام خلصت، ورجعت بصت لي وضحكت بصوت يخوف ومدت إيدها جوا بوقها وبدأت تخلع سنانها من بوقها بإيديها..

خلعت سنة والثانية والثالثة والرابعة وأنا متنح ومرعوب من اللي

شايفه!

كان بوقها عمال ينزل دم على حجابها الأبيض وفتانها لحد ما بقت زي ما تكون مدبوحة، كان شكلها وحش أوي وقامت ماسكة سنانها كلهم في إيديها وحذفتني بهم ونفس الوقت صرخت بصوت مزعج خرم وداني..

لما حذفت السنان في وشي وصرخت، قومت انا كمان مصوت وحاطط إيديا على وشي، الفصل كله قام صرخ والعيال كلها قامت



تتنطط من الخوف، وأبله (أحلام) رجعت بسرعة لشكلها العادي  
وجت تجري ناحيتي، استخيت تحت المكتب وفضلت أقولها: حرام  
عليكي يا أبله (أحلام) أنا معملتش حاجة، ده جدي جدي والله مش انا  
ماتموتنيش.

قومتني وقعدتني وطببت عليا وقالت لي: إيه يا حبيبي مالك؟

قولتلها: سنانك فين يا أبله (أحلام)؟

فزعلت مني، افكرت إني بتريق عليها.. بس سنانها كانت رجعت  
لها زي الأول والكلام اللي كتبه على السبورة اتمسح لوحده ورجع  
مكتوب، التاريخ وعنوان الدرس!

نادر: وبعدين؟

عبد الله: طول اليوم ده وأنا قاعد ساكت وخايف أبله (أحلام)  
ترجع تبقى جنية من غير سنان تاني.

نادر: الموضوع اتكرر؟؟

عبد الله: تاني يوم دخلت أبله (أحلام) فضلت أبص لها وأنا  
قلقان لكنها معملتش حاجة،

لحد ما بفتح المقلمة بتاعتي، لاقيت سنانها فيها قومت رامي  
المقلمة في الأرض، أبله (أحلام) وطت جابتها من الأرض وبسرعة  
لقيتها قدامي بشكلها اللي كله دم تاني واتكلمت وصوتها كان مخيف  
وقالت لي: يا ويلك مني يا (عبد الله).

ورجع شكّلها إلهي يرعب من جديد، خبيت عينيا وفضلت أعيط  
واصرخ وقومت خرجت اجري من الفصل وعمال اقول:

أبله (أحلام) عاوزه تموتني، أنا ومحمد ونسرين،

أبله (أحلام) عاوزه تاكلني عشان موتنا عيلتها العفاريت.

نادر: يخرب بيتك، فضحت الست المسكينة وبعدين؟

عبد الله: ودوني لأستاذ (فتحي).

نادر: مين أستاذ فتحي ده؟!

عبد الله: الأخصائي النفسي ولما حكيت له فضل يضحك

عليا ويقول بطل استعباط وكذب وإلا هجيب ابوك ووالي

اني عاوز اعمل منظر ونمره قدام زمايلي في الفصل!

نادر: وبعدين يا نمره؟

اليوم إلهي بعد كده لما أبله (أحلام) دخلت الحصّة جت لي علطول

، وقالت لي:

ها يا (عبد الله)؟ هتصوت وتتعفرت امتي؟!

قام الفصل كله ضحك عليا، قولت لها: والله العفاريت موجودة

وكانوا لابسينك انت يا أبله.

أبله أحلام: عفاريت مين يا عبد الله؟ بطل تخريفك ده شويه.



عبد الله: أنا مش بخرف، أقسم بالله ما بكذب.

أبله أحلام: عبد الله بطل أفلامك الهندي بدل ما ازعلك بجد  
وازعل عفاريتك دول كمان، اقولك على حاجة قولهم لما  
ييجوا أبله أحلام بتقولكم: ماتقدروش تقربوا منها! احنا ورانا  
درس مش فاضيين لكم يا عفاريت انتوا.

في نفس اللحظة سمعت همس في ودني، صوت بيقولي: قولها  
احنا هنزعلك.

بلغتها الرسالة، قالت لي: فعلاً؟ طب قولهم أعلى ما في خيلكم  
اركبوه، عبد الله بطل شغل ال...

أبله (أحلام) ملحقتش تكمل الجملة، أبله (أحلام) سكتت فجأه  
وعينيها برقت للسقف ووقفت ساكتة زي التمثال، بعدها بصت لنا كلنا  
في الفصل وعينيها بقت بيضا كلها ومدت أيدها وشاورت عليا، قومت  
جريت لآخر الفصل وهي بتمشي بالراحه ورايا، الفصل كله قام يجري  
فوق بعضه من الرعب ناحية الباب، حاولنا نفتحاه لكنه ما تفتحش،  
بدات تجري ورانا في الفصل واحنا نقع فوق بعض والكل بيصرخ،  
سمعنا خبط المدرسين من برا على باب الفصل واحنا كلنا بنصرخ  
ونقولهم: الحقووونا.

كسروا الباب وبمجرد ما كسروه، نص الفصل خرج يجري والنص  
التاني وقف مرعوب خايف يعدي يخرج لأنها واقفة منعانا نخرج،  
أستاذ توفيق بتاع التربية الدينية قال:

أعوذ بالله، الأبله أحلام شكلها ممسوسة والعياذ بالله.  
أعوذ بالله، أعوذ بالله من همزات الشياطين والجن ومن مسهم  
وحضورهم.

أبله (أحلام) اتلفتت له وطلع منها صوت زي صوت الكلب اللي  
بيجهز يهجم على حد يهدله..

أستاذ توفيق خاف جدًا منها..

وأبله (إحسان) اللي كانت واقفة،

قالت: يا أمه هو في إيه؟

أعوذ بالله من الشيطان الرجيم، مالك يا أحلام فيكي ايه يا حبيبتى؟  
اتصرف يا أستاذ (توفيق) اقرأ عليها قرآن ولا حاجة، دي بقت واحدة  
تانية خالص.

أستاذ توفيق:

اللهم يا غالبًا على أمره، ويا قائمًا فوق خلقه، ويا حائلًا بين  
المرء وقلبه، حل بينها وبين الشيطان!!!ان.

اللهم اجعل بينها وبين من مسها سدًا من نور عظمتك وحجابًا  
من قوتك وجندًا من سلطانك، إنك حي قادر قهار.

بسم الله أحصنك بذى الملك والملكوت، وبسم الله  
أعصمك بذى العزة والجبروت.



بحق رب القرآن والكتاب المقدس، اخرج، اخرج اخرج،  
اخرج، اخرج.

فجأة أبله (أحلام) وقعت في الأرض وفضلت تتشنج ويطلع من  
بوقها رغاوي بيضا، أستاذ (نعيم) جري عليها سنداها وخط قلم في  
بوقها معرفش ليه! فتحت بوقها على الآخر أوي وخرج منه تعبان شبه  
اللي شوفناهم قبل كده، خرج من بوقها يجري على الأرض وكان  
غرقان دم، الكل اتفزع. التعبان فضل يتلوى في الأرض واحنا كلنا  
واقفين حتى العيال اللي خرجوا رجعوا كلهم يتفرجوا معانا.

نادر: حد موته؟

عبد الله: هو لما خرج بسرعة، الكل من الخضة ما لحقش يتحرك  
ما عدا أستاذ (نعيم) بتاع الألعاب والتربية الرياضية، شال مكتب  
من على الأرض ورزعه فوق التعبان فعصه في الأرض،  
بعدها أبله (أحلام) صرخت بصوت مرعب ومخيف مش صوتها  
ولا صوت أي إنسان،

وقالت: ابني ي ي ي ي.

ومن يومها أبله (أحلام) بطلت تيجي المدرسة وعرفت انها علطول  
عيانه، زمايلي اتفقوا يجيبوا لها هدية ويروحوا يزوروها، في الأول  
خوفت أروح بس أنا حسيت إن انا السبب في اللي حصل لها، فقولت  
هروح معاهم وخلص..

خلصنا المدرسة واتجمعنا اشترينا كيلو تفاح وكيلو عنب وروحنا  
بيتها وخبطنا على الباب، فتحت لنا الباب بنتها الصغيرة وقعدتنا في  
الصالون واستنيناها .

أبله (أحلام) طلعت لنا، كانت عماله تكح وماسكه في إيدها منديل  
بتمسح به بوقها كل دقيقة، قعدنا معاها شويه، وبعدها قالت لنا: روحوا  
يا ولاد عشان متأخروش على البيت.

مشينا احنا الخمسة وكنت أنا آخر واحد خرج من باب الشقة، لسه  
بخرج لقيت إيد بتشدني من القميص بتاعي رجعتني جوا الشقة تاني،  
دخلت والباب اتقفل، بصيت لقيت أبله (أحلام) بقت العفريته بس  
شكلها كان أوحش أوي من الأول، منكوشة وبوقها عمال ينزل دم وهي  
تمسحه بالمنديل لما المنديل بقا كله أحمر من الدم، وصوابعها كانت  
طويلة اوي مش زي صوابعنا.

وقالت لي: جوزي واخوه وابني، الويل لكم، كل الويل، قول لجدك  
يدخل (طلبة) البيت.

حاولت أفتح الباب بأي طريقة مفتحش، مدت صوابعها الطويلة  
المرعبة ومسكت إيدي، حسيت بنار شديدة فسيبت مقبض باب الشقة  
وجريت جوا الشقة،

دخلت المطبخ لاقيتها جايه ورايا بس ماكانتش جايه بتمشي زينا،  
كانت بتجري على إيديها ورجليها زي القطط والكلاب كده، وقامت



نطت وكانت هتقع عليا، طلعت أجري من المطبخ لاقيت أبله (أحلام)  
الحقيقية واقفه في الصلاة، مسكت فيها وقولت لها: الحقيني يا أبله  
العفريته بتاعتك عاوزه تموتني انقذيني منها.

بس أبله (أحلام) كانت واقفة زي التمثال مبتتحركش وباصه  
للسقف، قالت لي جملة وفضلت تعيد فيها:

كلامك كان صح.

كلامك كان صح.

كلامك كان صح.

جريت ناحية الباب، لاقيت العفريته نطت ووقفت عنده ومسكت  
مقبض الباب وفتحت الباب وقالت لي: روح قول لجدك يدخل (طلبة)  
وإلا هاكلكم لباقي عيالي.

خرجت أجري من بيت أبله (أحلام) وجيت البيت أجري وحكيت  
لجدتي كل إللي حصل..

نادر: بعدها أبله (أحلام) حصل لها أي حاجة تاني؟

عبد الله: هي لسه لسه أجازة،

انا في مرة نمت وأنا في الفصل وحلمت أن الأبله جت الفصل  
ومعاها الحنش اللي (محمد) بيثوفه وأول ما دخلت الفصل وشها  
اتقلب للعفريته إياها وقامت رامية التعبان عليا وزعقت وقالت لي: قول  
لجدك تاني وإلا هخلي التعبان ياكل (محمد) والمارد ياكل (نسرين).

نادر: ماردايه ده كمان؟

عبد الله: معرفش ابقى أسألها انت بقا، المهم أول ما حدفت  
التعبان عليا اتلف حواليا بسرعة، فضلت أرفض وأحاول  
أفك نفسي منه، وقربت مني وقالت لي: هخلي الكل يقول  
عليك مجنون، لآخر مرة خلي جدك يدخل (طلبة).

بعدها فوقت لقيتني في الأرض في الفصل عمال أرفض واتلوى  
وأزعت والفصل كله عمال يبرق لي بحذر وقلق.

بعدها جيت قولت لجدي يمكن دي المرة الخامسة: يا جدي سيب  
(طلبة) يجي البيت أرجوك عشان العفريته متجيش ليا تاني، أنا حاسس  
انها المرة الجايه هتموتني يا جدي.

نادر: وجدك كان رده ايه؟

واحنا بتتكلم انا وعبد الله سمعنا صرخة جايه من فوق.. قومت  
وقفت..

عبد الله: ماتخافش ماتخافش دي (نسرين) أختي.

نادر: يعني إيه دي نسرين أختك؟

عبد الله: لأ ما هي كل شويه تفضل تصرخ لنا كده وبابا وماما  
يقوموا مانعين أي حد يطلع يشوفها - ده وقت ما بتكون  
بتصوت يعني - انت لو طلعت ربح نفسك مش هيدخلوك.

نادر: طب هي بتصوت ليه؟



عبد الله: بقولك معرفش، المرة الوحيدة إللي سمعتها كانت بتقول لماما: المارد هياخدني ومن يومها عرفت أن بيطلع لها عفريت زي العفريته إللي بتطلع لي والحنش إللي بيطلع لـ (محمد) بس عفريتها اسمه مارد .

(عبد الله) كان بيحكى ببراءة شديدة وفي نفس الوقت إللي شافه أثر على اتزانها، فعمال يعمل حركات غريبة بإيديه وعينه طول ما هو بيحكى! ظهر الحاج (مخلص) فقولت له: دلوقتي فاضل لي (نسرين) أقعد معاها وأقول لحضرتك انطباعي عن الموضوع كله واقتراحي إزاي يتحل، هل نجيب (طلبة) ده ولا إيه.

الحاج مخلص: (نسرين) صعب دلوقتي، أكيد لسه سامعها. نادر: آه وما فهمتش.

الحاج مخلص: ولا انا يا ابني، أبوها وأمها مانعين حد يتكلم معاها.

نادر: طب وأنا مش هقعد معاها؟

الحاج مخلص: لا هتقعد بس شويه لأنها أكيد دلوقتي تعبانة، اصبر بس بعد المغرب تكون هديت شويه.

نادر: طب المغرب ما فضلوش كثير، بس أنا قلقان من يحيى أبوها لأنه مش طايقني وممكن كمان يمنعني أشوفها.

الحاج مخلص: ده كلام وحياتك، كنا لسه قاعدين أنا ويحيى  
وكان بيقولى أنه عاوز يقولك على سنه الحقيقى.

نادر: يعنى إيه؟

الحاج مخلص: (نسرين) فى سنة ستة ابتدائي بس هي سقطت  
كثير، فالمفروض إنها فى ثانوي مثلاً دلوقتى.

نادر: وسقطت كل ده ليه!؟

الحاج مخلص: أول مرتين عشان جسمها صغير كنا احنا  
اللى بنسقطها، كان عندنا أمل السنة اللى تعيدها جسمها يكبر  
شويه بس هي جسمها فضل قليل كده علطول.

نادر: آه، طب والسنين الثانية.

الحاج مخلص: (نسرين) بقت هي إلى بتسقط نفسها لأنها  
كبرت وبدأت تعرف إلى بتمر به البنات إلى فى سنه، فبقت  
أحياناً ماترو حش الامتحانات ولما نودىها بالعافية بقت تروح  
تكتب فى ورق الامتحان أغاني عشان تسقط، احنا مقدرين  
جداً سنه والظروف إلى بتمر بها وكلنا بالبلدى كده بنحس  
عليها، لحد ما حصل إلى حصل وبقت هي كمان بتعرض  
لأذى عشان نجيب (طلبة) تاني وندخله البيت عشان يثبت إنه  
انتصر عليا ويدلني مش أكثر.



نادر: بس انا عندي سؤال؟ انتوا ايزاي ساكتين عليه؟ ده انتوا تجيبوه مربوط هنا ويطرز علقه موت أو تبلغوا عنه.

الحاج مخلص: بس احنا معندناش دليل ضده، الراجل كان عاوز يخلصنا من نتيجة غلطة إحنا غلطاناها.

نادر: الله مش انت قلت أن (نسرين) شافته بيرمي التعبان بنفسه.

الحاج مخلص: واشم عنى أصدقها هي؟

نادر: حاج (مخلص) أنت بتبرر لنفسك انك تجيب (طلبة)؟

الحاج مخلص: انت جيت وانت اللي هتقولي اعمل ايه،

(فاطمة) اللي قالت لنا عنك، قالت لي انك عارف شيوخ

وناس واصلة فوق وتحت ..

نادر: فوق وتحت! ما شاء الله.

الحاج مخلص: ياللا هنتغدى أنا وانت على ما المغرب يأذن.

نادر: طيب والباقيين؟

الحاج مخلص: اتغدوا من بدري بعد ما انت فطرت يجي

بنص ساعة، أنا قولت أستنى ونتغدى سوا.

نادر: ماشي يا عم (مخلص).

- قعدنا على الغدا العامر، ودار بينا أحاديث مختلفة، بحاول منها  
أقرا شخصيته على قد ما أقدر.

أقدر أقول أن الحاج (مخلص) شخصية قوية جدًا، لكن الموضوع  
لما قرب من أحفاده أصبح ضعيف جدًا لدرجة أنه بقي إنسان هش،  
ممکن جدًا يسلم لدجل ونصب واحد من نوعية (طلبة) في مقابل إن  
أحفاده ميتأذوش..

«أعز الولد ولد الولد.» المثل ده الحاج (مخلص) قاله فوق العشر  
مرات واحنا قاعدين بناكل ولما سألني عن انطباعي عن (طلبة)، قولتله:  
أنا ما قابلتوش بس كل إللي أقدر أقول ههولك ان الراجل ده سواء بيستعين  
بجن أو لا فهو نواياه سيئة وله حاجة في دماغه محدش يعرفها على  
الأقل لحد دلوقتي.

الحاج مخلص: ما هو قالها عاوز ترضية حد من أحفادي  
يبقى أضحية.

نادر: يا عم (مخلص) وأنت بتاكل من الكلام ده!

ده احنا لو فرضنا أن الجن عاوز ترضية زي ما الخبير (طلبة) قال،

هيجي يقولك إدينا عيل من عيالك ندبحه على العيد!؟

أنت قولتلي أنه قالك ان قدامك حل من اتنين، الحل الأول الترضية

دي..

الحاج مخلص: آه.



نادر: الحل الثاني إيه؟

الحاج مخلص: ملحقش يقوله لأنني ضربته وطرده.

نادر: أهو الحل الثاني ده بقا إللي مخلص عاوزه.

الحاج مخلص: يعني إيه؟

نادر: يعني هو الأول قالك احتمال مستحيل تنفذه، فلما

يقولك الثاني هتوافق انت عليه علطول.

الحاج (مخلص) سرح وفضل ساكت ومعلقش..

نادر: أنا خلصت أكل، هقوم شويه تكون (نسرين) جهزت.

الحاج مخلص: أنا عندي سؤال بدون زعل.

نادر: اتفضل.

الحاج مخلص: هو أنت بتصلي ولا لأ؟

نادر: آه فهمتك... أنا بحاول أكون منتظم في صلاتي ومش

صلاتي بس! كل حاجة لها علاقة بربنا.

الحاج مخلص: ربنا يهدينا كلنا كده والله بس الصلاة يا (نادر)

يا بني مش الحاجة إللي نقول إننا بنحاول نكون كويسين فيها،

دي بالذات نلتزم بها وبعدها كل حاجة هتضبط لوحدها...

صدقني دي بس تستقيم وكل حياتك هتستقيم بعدها.

نادر: أنا عارف والله، ادعيلي يا حج (مخلص) ده أنا لما بسيب فرض بيبقى عندي تأنيب ضمير شديد أوي، بس والله صدقني أنا لما بلتزم ببقى كويس جدًا والله.

الحاج مخلص: أنا عارف أنك كويس.. سيماهم على وجوههم يا بني والله..

وبعدين كل سنه وانت طيب رمضان قرب أهوه، اللهم بلغنا رمضان ودي فرصة لنا كلنا نجدد إيماننا واستغفارنا وأحب أقولك حاجة محدش فينا يفضل ماشي على السطر علطول، لازم هنقع من عليه كل شويه بس الشطارة إننا ناخذ بإيدينا بعض ونطلع تاني نكمل وإلا ربنا مكنش أوجد لنا التوبة، ربك بيحب المستغفرين.

نادر: ربنا يجعلنا جميعًا منهم، على فكرة أنا ماقولتلكش ان أنا تربية شيخ مسجد.

الحاج مخلص: ما شاء الله.

نادر: آه والله اسمه الشيخ (لطفي) وكان دايمًا يقول لي لما تضيق بيك افضل قول:

«لا إله إلا أنت سبحانك إني كنت من الظالمين.» هتلاقي الكرب فك والسكك اتفتحت، ولو حسيت أنك قصرت



أوي في حق ربنا وغلطت الزم الاستغفار، الاستغفار هو سلاح التائب..

الحاج مخلص: شوقتي أتعرف عليه.

نادر: ما حدش عارف يمكن نعوزوا وأكلمه يجي.

الحاج مخلص: ربنا يختار الخير لنا جميعًا، أنا هقوم أبلغ الجماعة فوق أنك جاهز عشان (نسرين) تجهز هي كمان.

وسابني....

زي ما يكون ربنا دايماً بيعت لي أشخاص يشدونني تاني أرجع للسطر زي ما هو بيقول..

يا رب أنت عارف إنني لما بيبعد بيكون بسبب لهو الدنيا، يا رب قربنا كلنا منك.. يا رب انت عارف اننا بنحبك بس ذنوبنا دايماً بتحاول تاخذنا منك، يا رب قوينا على نفسنا.

استنيت عشان الحاج (مخلص) يديني إشارة أو يناديني أطلع أقابلها... والأقي عندها مفتاح اللغز أو حتى حاجة توصلني لجزء من حل اللغز.

صليت المغرب بعد ما خلصت، لاقيت الحاج (مخلص) واقف مستني..

الحاج مخلص: نسرين مش هتقدر تنزل، ممكن أنت تطلع عندها فوق؟

نادر: أوي أوي مفيش مشاكل.

الحاج مخلص: وماتقلقش من والدها هو ووالدتها فوق  
مستنينك ومش هيقولوك أي حاجة تضايقتك.

طلعت ورا الحاج (مخلص) السلم ودخلنا شقة ابنه أستاذ (يحيى)  
الحقيقة قابلني كويس على عكس المرة إللي فاتت وزوجته كمان  
مقابلتها كويسه جدًّا، قالت لي:

العشا عندنا الليلة يا أستاذ (نادر) ثانية واحدة هنادي لحضرتك على  
(نسرين).

دخلت ورجعت معاها (نسرين)..

بسبب كلام الحاج (مخلص) إللي حكهولي عنها مشوفتهاش  
طفلة، شوفتها بنت في منتصف مرحلة المراهقة..

قعدت (نسرين) وأستاذن والدها أستاذ (يحيى) ونزل مع والده

وفضلت والدتها معانا، فبدأت أنا الحوار..

نادر: (نسرين) أنا عاوز أقولك قبل أي حاجة انا مصدق إن

(طلبة) ده ورا كل المصايب الللي بتحصل لكم.

نسرين: بجد؟ طب فهمهم بقا.

نادر: فاهمين وبعد ما أعرف منك إللي حصل، ليا قعدة طويلة

مع جدك.



نسرين: انت (عبد الله ومحمد) حكولك عن إللي شافوه، صح؟  
نادر: أيوه، ومستني أسمع (نسرين).

والدة نسرين: (نسرين) مش حاكية التفاصيل لحد غيري  
ومحلفاني ماقولش لوالدها ولا جدها أي حاجة.  
نادر: ليه كده؟!!

والدة نسرين بتردد: عشان عشان عشان.  
نسرين: عشان إللي أنت متعرفوش أني مش طفلة، أنا لا قد  
(محمد) ولا (عبد الله) أخويا.

ماما خلفتني واتطلقت من بابا مرة وبعدها رجعوا وخلفوا  
(عبد الله) أخويا، يعني أنا مش طفلة.  
نادر: طب ما أنا عارف.

نسرين: طب كويس أن جدي قام بالمهمة دي، وقالك اني  
ساقطه، تحب تسمع إيه؟  
نادر: كل حاجة.

نسرين: أنا مشكلتي مبدأتش زي (عبد الله ومحمد) بعد  
خلاف جدي مع (طلبة).  
نادر: أو مال امتي؟

نسرين: بدأت أول ما انا قولت لجدي إن (طلبة) نصاب وكان  
جايب التعابين معاه.

نادر: آه حكالي دي كمان.

نسرين متجاهلة ردي: ليلتها بالضبط بدأت كل حاجة لما كنت في  
الحمام باخد دش وأنا بحب أسخن الميه أوي لقيت على زجاج المرايه  
المليانة بخار، مكتوب (هتدفعي التمن يا نسرين!)

وبعدها البخار سال ومسحهم، كدبت عينيا وعديت الموضوع  
ودخلت أوضتي أنام، أنا من عادتي بحب أطفى كل النور وأنام في  
الضلمة، بس ده كان زمان بقا قبل ما يحصل إللي حصل..

نادر: حصل إيه؟

نسرين: صحيت من النوم فجأة مخنوقة مش عارفه أتنفس  
وقلبي عمال يدق بسرعة وحسيت زي ما يكون في جبل  
طابق على صدري، عاوزه أتحرك مش عارفه، حتى دراعاتي  
مش قادرة أحركها عشان أنور الأباجورة اللي جنبني، بتنفس  
بصعوبة شديدة، حاولت أصرخ صوتي ما بيطلعش، عمال  
أنادي على ماما، بوقي بيتحرك وكل حاجة لكن مفيش صوت  
خارج نهائي، وقلبي عماله دقاته تزيد أكثر.



انا قولت أنا بموت خلاص، عاوزه أنطق الشهادة مش عارفة، عاوزه أقول أي آية من كتاب ربنا مش فاكرة ولا قادرة، وفي وسط الضلمة حسيت إن في حد قاعد على صدري، والله ما بكذب..

في شيء فعلاً كان قاعد على صدري وهو إللي كان خانقني، مش شايفه ملامحه لكني شايفه كتلة سودا كبيرة لها قرنين طوال معوجين، كيان اسود مخيف باين وسط الضلمة، وكتافي مغروس فيهم مخالب بتقطع فيهم..

بعدها حسيت بهوا سخن كأن في حد بينفخ في وشي وبردو مش قادرة أتحرك، كل إللي قادرة أتحكم فيه هو عينيا وكان كل ما الهوا السخن يجي في وشي أغمض عينا من قوته وبشاعة ريحته. الهوا بدأت أحس انه مش اي هوا، ده حد بيتنفس بس صوت نفسه عالي عامل زي صوت نفس القلط وهي بتروح في النوم ويمكن أعلى كمان!

- لو بتربي قلط هتبقى عارف القطعة لما بتيجي تنام بيبقى صوت نفسها عالي جداً ازاى..

بقيت متحاوطه بالشيء الأسود اللي فوقني والصوت المخيف والهوا إللي بيجي في وشي كل شويه وانضم لهم هزة عنيفة جداً في السرير.. وضيف لهم اني لسه فاقدة القدرة على النطق والحركة!

من جوايا قولت في عقلي، مفيش غيرك اللي هينجدني من الذعر اللي انا فيه ده.. انت يا رب

ياااا رب.. يااااا رب..

حسيت إن الكلمة دي أد إيه مريحة ولقتني بقدر أخرجها من عقلي  
وقادرة أهمس بها...

فقلت يا رب أول مرة بصعوبة شديدة، بعدها قولتها أسهل  
وفضلت أكررها وعليت صوتي وحسيت إن إيدي فكت، فمدتها ناحية  
الأباجورة وضغطت الزرار! ونورتها!  
شوفت أبشع مخلوق في الدنيا!!

شيطان اسود بقرنين، عينيه حمرا منورة بنار جهنم، وشه في وشي  
وفاتح بوقه وعمال ينفخ في وشي والهوا اللي خارج من بوقه كان عبارة  
عن دخان اسود، وكان ماسك كتافي الاتنين بإيديه ومكتفني وشالل  
حركتي..

صرخت بأعلى صوت وهو كمان صرخ بس صرخته كانت بشعة  
لا تحتمل، فتح بوقه أكثر لدرجة أن وشه اختفى وماكنش باقي غير بوق  
مفتوح على الآخر! وصرخ أكثر وخرج من بوقه دخان كثير جدًا حسيت  
انه بيحرق وشي به..

بعدها اغمى عليا وما حستش بأي حاجة غير وماما بتصحيني!  
نادر موجهًا كلامه لوالدة نسرين: ملاحظتيش أي حاجة غريبة على  
(نسرين) وانتي بتصحيتها؟

والدة نسرين: هو انا لحقت! ده لسه بقولها اصحي يا نوسه،  
قامت راقعة بالصوت وفضحت الدنيا وأبوها جه من بره



فاكرني بضربها وحكت لنا إليلي حصل، بعدها جدها طلع  
رقاها وبقت كويسه.

نادر: طيب ما هم عارفين أهوم؟

والدة نسرين: لأهم عرفوا إليلي حصل اليوم ده بس، لكن  
حاجات كتير بعد كده محكيتهاش لهم عشان (نسرين) إليلي  
طلبت ده، بعد إليلي حصل (نسرين) نادت عليا يا استاذ نادر  
دخلت أوضتها وورتنني كتافها، شوفت حاجة زي رسمة جبل  
على كتافها.

نادر: أو تعبان مثلاً.

نسرين: أيوه هو فعلاً كان رسمة تعبان، بالإضافة لحوافر  
المارد.

نادر: وليه سمته مارد؟

نسرين: عشان تاني يوم بالليل لاقيت على مرآة الحمام  
مكتوب «عروس المارد هو لن يتركك».. أدخلني طلبه.

أدخلني طلبه . أدخلني طلبه

نادر: وبعدين يا (نسرين)؟

نسرين: عدى يومين محصلش فيهم أي حاجة لدرجة أنني  
صدقت إنه خلاص مش هيتكرر تاني، لكن وأنا نايمة حسيت

أن هدومي بتترفع من على رجليا، كنت فاكرة نفسي بحلم  
بس طلع بجد، صحيت لاقيت فعلاً الهدوم مرفوعة نزلتها  
وشديت الغطا عليا وكنت تعبانة فكملت نوم، شويه وحسيت  
إن في إيدين على رجليا قومت نظيت من على السرير  
ووقفت أبص من بعيد على السرير بعد ما نورت الأباجورة،  
بس ماشوفتش حاجة!

دخلت الحمام غسلت وشي في الحوض وأنا بقوم ببص في المراية شوفته!  
تاني نفس الكائن البشع ببص من جوا المراية وعينه كلها شر،  
ونزل من عينه دم، والدم ده كتب على مراية الحمام: (طلبة) يدخل  
والا ستكونين لي.

بعدها مد ايده من جوا المرايه خنقني ورماني بكل قوته في جنب من  
الحمام فضلت قاعده وكل ما حد من البيت يقرب مني الاقيه هو جاي  
بسرعه ويرمي عليا تعبان ماسكه من ديله يفضل يعضني افضل اتألم  
واترعب ولما يبعدوا هو يسحبه بعيد عني!

واتكرر موضوع إني أصحى وأحس ان حد حاطط إيديه عليا كذا  
مرة، آخرها كان امبارح نمت شويه العصر وحصل....

تعرف؟ أنا بقيت علطول بنام وانا لابسة شتوي!!

مممكن تفهمني في إيه؟

نادر: خير يا (نسرين) خير.



## العاصفة الثانية

سيبت نسرين ووالدتها وكان الوقت اتأخر، طلعت الشقة إللي بنام فيها اطمنت إن كل إللي سجلته تمام وأضفت شوية ملاحظات، ولاقيت الحاج (مخلص) سايب لي لبس بتاع حد من ولاده فقولت كويس جدًا..

أخذت الهدوم ودخلت الحمام وتأكدت إن الميه الساخنة شغالة كعادتي، فتحت الدش الساخن وغمضت عينيا ونزلت الميه الساخنة على جسمي لأنها بتريحني من ألم وتوتر الأيام إللي فاتت كلها، وأنا بغسل شعري من الصابون إللي عليه وعلى عينيا حسيت بحاجة ملمسها غريب في شعري، مش ملمس رغوة صابون أبدًا...

ده ملمس حاجة والثانية والثالثة والرابعة والخامسة، دي دي صوابع!

فيه إيد وسط شعري!!

حاولت افتح عينيا حرقطني ومعرفتش من الصابون، رجعت ادور على الإيد دي تاني لقيتها اختفت لكن انا لاقيت ملمس حاجة تانية! حاجة زي الدهن ولزجة!

نزلت ميه كثير عشان أخلص منها لكنها مابتخلصش حاولت أفتح تاني عينيا حسيت بنار فيهم والرؤية بقت ضبابية..

فجأة سمعت صوت ستارة البانيو بتقع بالماسورة بتاعتها في أرض الحمام وبعدها حسيت بالإيد تاني بس بتقبض بإحكام على راسي في نفس المكان، اتكعبلت واتزحلت وفضلت أحاول أمسح وشي بإيديا مفيش فايده زي ما تكون المادة اللزجة الغريبة عماله تزيد أكثر..

أنا حتى مش عارف اقوم من البانيو وأقف!

سمعت صوت ماسورة ستارة البانيو بيتحرك على الأرض كأن حد يسحبها بالراحة وبهدوء شديد..

بعدها مية الدش اتقطعت ومبقاش فيه صوت غير صوت ماسورة الستارة المعدنية وهي بتتحرك على الأرض، كأن حد بيشدتها وصوت دقات قلبي بيعلى وبيتسارع...

سمعت صوت الماسورة نزل على البانيو جنبي بقوة، صرخت وما فهمتش لكن حاجة جوايا قالت لي اتحرك، فاتحركت من مكاني فلاقيت الماسورة بتنزل على البانيو مكاني ومعها صرخة مدوية بتقول ارحل..

ده معناه إن حد ماسك ماسورة الستارة وبيضرب على الأرض أو بيحاول تحديداً يضربني أنا، حاولت أقوم أقف بردو مش عارف، الخبطة الثالثة جت على دراعي خلتنى أتحرك وأخرج بره البانيو.

كنت مش شايف أي حاجة بسبب اللي على عينيا لكني قدرت أوصل للبشكير فمسكته وأنا قاعد برا البانيو على الأرض مسحت وشي، كنت



حاسس إني بمسح شحم ثقيل، الرؤية بدأت تتضح فشوفت أشباح في الأرض زي التعابين بدأت تختفي..

وواحدة واحدة رجعت اشوف، بصيت على الأرض مفيش تعابين، بصيت على البشكير لقيته كله دم مخلوط بمادة سودا ثقيلة وكثيفة زي الشحم...

أما ستارة الحمام فلقيتها متعلقة في مكانها الطبيعي على البانيو وما وقعتش من أساسه!

غسلت وشي ولبست وخرجت بسرعة وكتبت كل إللي مریت به وإللي بياكد أن البيت مرصود والرصد إللي فيه مش من فراغ، ده وراه سبب كبير وهعرفه!

مرت الليلة ..

والصبح كنت قاعد مع الحاج (مخلص) بندردش مع بعض.

الحاج مخلص: تحب تقعد مع طلبة؟

نادر: نوعية (طلبة) دي أنا قابلت زيه كتير ومش هيديني ردود مباشرة.

الحاج مخلص: ما تقعد معاه مش هتخسر حاجة، هجبهولك وتقعد معاه.

نادر: لأ... بلاش تدخله البيت تاني كفايه اللي حصل. وبلاش يحس إنك ضعفت، أرجوك بلاش يدخل تاني ماتنولهاوش!

الحاج مخلص: ما هو أصل...!

نادر: أصل إيه؟!!

الحاج مخلص: أصل أنا جييته.

نادر: امتى ده؟!!

الحاج مخلص: وأنت فوق عند (نسرين).

نادر: مش قادر تصبر شويه؟!!

الحاج مخلص: أحفادي بيضيعوا مني وقولت أحاول أعمل

أي حاجة.

نادر: وعملت؟

الحاج مخلص بحزن: ولا أي حاجة، أنا بعث له فوق العشر

مرات، وجالي بعد ما روحت له البيت إللي مأجره وعاملني

بطريقة بايخة جدًا وقالي قولتلك أنت الللي هتتحايل عليا

عشان آجي، وفعلاً اترجيته يجي.

نادر: وبعدين؟

الحاج مخلص: جه وقالي إننا قتلنا جن وأخوه وابنه وعيلته مش

هتسينا ولازم الترضية، فأنا طبعًا قولتله أرجوك شوف حل تاني.

نادر: شوفت! زي ما قولتلك.



الحاج مخلص: أنا أصلاً عملت كده لأن كلامك كان مقنع  
جداً، كنت متخيل أنه هيطلب فلوس.

نادر: لأ لأ إللي زي ده الفلوس متكونش غايته، دي كده كده  
هياخذها بس في حاجة بتكون أهم وأكبر من الفلوس بكتير  
عاوزها، هو وإللي مسخرهم أو مسخرينه، وكده كده الفلوس  
هياخذها بعد كده منك بطريق مباشر أو حتى غير مباشر..

الحاج مخلص: أنا قولت له عاوز كام؟

ضحك وقال: ولا مليم أنت فاكرني نصاب زي النصاب  
إللي أنت جايه عندك. (يقصدك أنت)  
نادر: فاهم فاهم.

الحاج مخلص: قولت له طب انت عاوز إيه؟ قالي: أبداً أنا  
عاوز أنقذ بيتك من الحزن إللي هيسوده، أحفادك بيضيعوا  
ولازم يتلحقوا.

فسألته: يتلحقوا ازاي، أرجوك عرفني.

اشترط قبل ما يقول أي حاجة شرط واحد وقال لي: الشرط ده غير  
قابل للنقاش.

نادر: إن أنا أمشي، صح!

الحاج مخلص بذهول: أيوه... انت عرفت ازاي؟!!!





الحاج مخلص: قاللي بس منعني أقولك.

نادر: عرفني يمكن أفيدك.

الحاج مخلص: طب هقولك بس تمشي بعدها، قال لي:

علاج أحفادك في مشروب السر الترياق الأعظم، كل واحد

منهم هياخذ منه شفقة، بعد منها مفيش مخلوق سواء إنسان

أو جن هيقدر يأذيههم، والمشروب ده موجود في أماكن قليلة

جدًا في العالم ومن الصدف أنه موجود هنا في البيت.

نادر: هنا!

الحاج مخلص: آه هو قال كده، وقال بعد ما انت تمشي

هيجي يطلعه.

ويتم فك اللعنة... وبعد ما أحفادي هيشربوا هيدي الباقي

لزوجة الجن إللي قتلناه وهتقبل به كتر ضية.

نادر: مشروب إيه ده إللي هيجي يطلعه من البيت!

الحاج مخلص: مش هينفع أقولك اسمه.

نادر: لا أقولك أنا... اسمه الزئبق الأحمر الروحاني.

الحاج (مخلص) برق لي وقال لي: عرفت منين؟!

نادر: مش محتاجة تفكير... بس انا حابب اقولك ان لو  
(محمد وعبد الله ونسرين) شربوا الزفت ده أضمنلك انك  
هتدفنهم في نفس اليوم.

الحاج مخلص: بتقول ايه؟

نادر: الزئبق الأحمر ده معظم الآراء بتأكد انه ملوش وجود  
لكن الآراء اللي بتقول إنه موجود ومقتنعين بقدراته الفائقة  
محدثش فيهم قال إن البشر يشربوه، ده له مواويل تانية كلها  
خاصة بالجن السفلي، ده اذا كان له وجود من الأصل.

الحاج مخلص: طب هو ليه بيقول لي كده، عاوز يموت  
أحفادي ليه؟

نادر: ركز معايا كده يا عم مخلص وافتكرك، فيه أي حد قبل  
كده جالك وقالك إن بيتك تحته آثار؟؟

الحاج مخلص سكت شويه: آه، الصيف إللي فات (رفاعي)  
جاب لي واحد قالي بيتك تحته مقبرة فرعونية كاملة وأوض أميرات  
هطلعها لك وأخذت اللي فيها.

نادر: (رفاعي) تاني؟ هو فين الزفت ده!!؟

الحاج مخلص: محدش عارف له طريق جره!  
وفضل الراجل ده ينط لي كل شويه لدرجة أنه قالي: هديك مليون  
جنيه قبل ما نحفر أي حاجة...



لكنني رفضت وطلبت من (رفاعي) مي جيوش ثاني.

نادر: (رفاعي) ده حرامي وشيخ منصر ومتفق معاهم كلهم عليك، أنا ما بفهمش في الآثار وما عرفش تحت بيتك آثار ومقبرة والكلام ده ولا لأ...

لكن إلي أحب أقولك ثاني عليه موضوع الزيتق الأحمر، ده كدبة كبيرة لأنني دورت وقرت عنه كثير، أغلب المكتوب أنه ملوش وجود وانه مجرد وهم نشره (طلبة) و(رفاعي) واللي زيهم عشان ينبشوا المقابر الأثرية ويسرقوها ويبيعوا حضارة وتاريخ آلاف السنين لبلاد ثانية معدومة التاريخ زي ما ياما بلاد باعت تاريخها قبل كده...

الحاج مخلص: ما أنا رفضت.

نادر: وهم مازهقوش ودخلوك دخلة جديدة بساحر المرة دي، قلب لكم كيان البيت كله، سلط خدامه عليكم عشان بردو في الآخر ينفذوا الخطة ويحفروا ويطلعوا الآثار، بس المرة دي المقابل مش فلوس، لأ المقابل حياة احفادك والمشروب السحري إلي هينقذ (محمد، عبد الله، نسرين) من بطش قصة الجن الوهمية اللي من تأليف وإخراج (طلبة) و(رفاعي).

الحاج مخلص: يعني احنا ما موتناش اي جن؟

نادر: غالبا لأ.

الحاج مخلص: طب ما ابني يحيى كان مصدقهم اوي .

نادر: ويحيى يقول ايه؟ أحب أعرف من باب العلم بالشيء بس .

الحاج مخلص: بيقول إن الجن الراصد والحارس للمقابر

الفرعونية بيحتاج المشروب ده عشان يطول عمره، وأنه

مبيقدرش يخرج بنفسه من المقابر لأنه مرصود برصد أعلى

منه، وأنه لو حاول بس يقرب منه هيتحرق فورًا وأنه الحل

الوحيد لازم إنسان هو إلهي ينزل المقبرة بمساعدة الجن

ويحصل على الزيتق الأحمر وفي المقابل الجن بيحقق له

أمني لا حصر لها، وإنه ممكن تسخر به قبائل جن كاملة..

نادر: خلي حد من أحفادك يدخل على النت يا حج

(مخلص) ويكتب كلمة (الزئبق الأحمر) هتلاقي نصاين

بالبهل كاتبين للبيع الزئبق الأحمر الروحاني للبيع، وتلاقي

أسعار بالملايين!

الحاج مخلص: وحد بيشتري؟

نادر: المغفلين كثير .

الحاج مخلص: يحيى ابني مقتنع جدًا بالكلام ده، وواضح

انه من المغفلين .

نادر: طب انت هتعمل إيه؟



الحاج مخلص: مش أنا... أنت هتفضل تروح وكتر خيرك  
لحد كده.

نادر: بعد كل اللي قولتهولك!؟

الحاج مخلص: أنا يا بني مقتنع بكل كلامك، بس بردو  
كلامك أكد لي إن (طلبة) مش هيسيب أحفادي وبيتي غير  
لما ياخذ إللي هو عاوزه!

نادر: يا حاج (مخلص) ده مش الحل.

الحاج مخلص: من فضلك امشي لأنه قاللي كمان أن الجن  
الموجود هنا غاضب جداً منك، ولو فضلت موجود مش  
هيسيبوك وحتى بأمانة باب اوضتك بيعتلك لك منه ناس بتخاف  
منها، بيقولك دول مش حقيقيين دول هو اللي باعتهم لك هدية!  
نادر: حاضر يا حاج (مخلص) همشي حالاً.

الحاج مخلص: لأ بعد الغدا، اتفضل جهز شنطتك والبس  
هدومك على ما الغدا يكون جاهز.

## العاصفة الثالثة

خدت بعضي وطلعت الشقة فوق جهزت شنطتي وجمعت كل حاجتي ودخلت الحمام وخذت هدومي عشان أغير وأغسل وشي..  
 علقت هدومي على الشماعة وغسلت وشي، وانا بغسل وشي حسيت بحركة في الحمام، بصيت حواليا مشوفتش حاجة، لكن شويه ولاقيت حركة بسيطة في هدومي المتعلقة، القميص تحديداً!  
 قلعت بسرعة الهدوم بتاعتهم ولبست هدومي تاني . المراية بتاعة الحوض لاقيت مكتوب عليها بلون اسود (ارحل) قومت ماسح الكلام بإيدي بعصية وغسلت ايدي..  
 فجأة ستارة الحمام اتفتحت بعنف وانا واقف ومديها ضهري، شوفت في المرايه انعكاس ماسورة الستارة وحواليها تعبان تخين جداً..  
 اتلفت ورايا لاقيت الماسورة طارت من مكانها في سرعة البرق ونزلت على نافوخي ضرب ضرب ضرب..  
 ملحقتش حتى أدافع عن نفسي، خبطة والثانية والثالثة..  
 الدنيا ضلمت ووقعت...  
 غبت عن الوعي أد إيه معرفش..  
 لكني بدأت أفوق واحدة واحدة..



بفوق ودماعي وجعاني جداً..

الدنيا ضبابية..

نفسي ثقيل..

حركتي مشلولة..

حاجة قماش لازقة في وشي..

أنا متكثف تماماً..

محاولات يائسة للحركة بدون فائدة!

معقول تاني!

كفن تاني!

قبر تاني!

لأ لأ..

الفكرة في حد ذاتها مرعبة، بس ملمس الشيء إللي على وشي مش  
كفن، ده حاجة مانعة عني الهوا تماماً..

الأكسجين بيخلص وأنا بحاول بحاول!

نفسي بيتحول لبخار بيغرق وشي، الدنيا مش ضلمة..

الصورة مش واضحة، فيه نور جاي من ورا الشيء إللي على وشي

ده، لكن المحاولات قلت والقوه بتنهار واليأس بيتسلل ليا...

لحد ما سمعت صوت رقيق جاي من بعيد بيقرّب مني..

الصوت: اهدا يا (نادر).

صوت مميز جداً وعمري ما هنساها..... صوتها.... (هالة).... أيوه هي. نطقت اسمها بصعوبة جداً..

هالة: أيوه يا (نادر).

حسيت بعدها بإيدين كثير على جسمي وبعدها الشيء إللي مكتفني حسيت انه بيفك عني، لحد ما إيديا اتحركت فشيلت الشيء ده عن وشي، وأخذت نفس عميق جداً، وأصابتني نوبة من الكحة الشديدة وضيق التنفس.

استعدت توازني وإدراكي واحدة واحدة، أول حاجة بصيت حواليا أدور عليها ملقتهاش!

بس لقتني في البانيو وملفوف بستارة الحمام وفيه تعابين صغيرة برا البانيو متقطعة ودمها مغرق أرض الحمام..

مين أنقذني غيرها؟

فعلاً (هالة) كانت هنا... قومت وقفت وبصيت حواليا وناديت عليها كذا مرة لكنها ماردتش...





## هالقة

87

للمزيد من الروايات والكتب الحصرية  
انضموا لجروب سحر الكتب

sa7eralkutub.com

او زيارة موقعنا



خرجت من الحمام وخذت شنطتي ونزلت للحاج (مخلص)  
استغرب شكلي قولتله: أنا ماشي حالاً يمكن فعلاً لما امشي الموضوع  
يتحل، بس خلي بالك الناس دي معملوش ده من فراغ، في حد  
مساعدهم.

الحاج مخلص: يعني ايه مش فاهم؟

نادر: اسأل يحيى.

الحاج مخلص: نعم!

ماردتش ومشيت بعد ما خد مني أكثر من وعد

أولهم: عدم ذكر أسماء كاملة للأسرة..

ثانياً وده الأهم عنده: إني مرجعش تاني وأنساهم تماماً.

طلبت منه أسلم على الأحفاد..

فنادى لهم جميعاً وسلمت على الجميع وطلبوا مني إني أبعت لهم

نسخة من العدد إللي هتنزل فيه قصتهم..

أما (نسرين) فخرجت ورايا..

قالت لي: انت هتمشي خلاص؟

قولتلها بصوت واطي: متخافيش.

قالت لي: مسألتش نفسك أنا مقولتش لبابا وجدي أي

تفاصيل تانية ليه..



نادر: سألت، بس سألت سؤال ثاني كمان ،

انت ليه أخذتي جدك في الرجلين؟

نسرين: عشان بابا ما يفهمش اني عارفه، بابا (طلبة) مسيطر على تفكيره وأقنعه انه لازم نتعب شويه في مقابل الحصول على كنوز الأرض وانك لازم تمشي والا الجن هيغضب عليه.

نادر: أبوكي اتجنن! عارف اللي حصلك ومكمل؟

نسرين: اديك قولتها.. اتجنن.

نادر: ماتقلقيش يا (نسرين).

نسرين: ماقلقيش ازاي وانت ماشي وسايينا؟!!!

مشيت من الشرقية.. بس قبل ما امشي من هناك كان في مشوار مهم لازم اعمله.. وعملته

ورocht شقتي من جديد (مملكتي الصغيرة) عشان الصبح أسلم  
تحقيقي الجديد... بعنوان (عمارة الفرع) وما استنتش للصبح، كتبت  
جواب باسم (نسرين):

(نسرين)..

بعد ما مشيت من عندكم روحت لأقرب قسم شرطة بلغت عن  
(رفاعي).. وقولت انه حرامي آثار في القرية عندكم ويساعده دجال

اسمه (طلبة) وأنه يقوم بتهديد كل أسرة في القرية، إنها لو ما استجابتش  
لطلباته إنه هيلحق بها الضرر..

أحب أقولك الظابط اهتم جدًا بالموضوع..

وبكره الصبح أنا هصعد الموضوع ، وأوعدك الموضوع الصبح  
هيكون خلصان و(طلبة ورفاعي) مش هتسمعوا عنهم أي حاجة ثاني!  
بس أتمنى ان (يحيى) ما يتجرش في الموضوع، أنا تعمدت ما  
اجيش سيرة جدك أو أي حد من البيت خالص عشان ما يفكروش  
يجيوا سيرة والدك!

وخلال أسبوع بالكثير هيكون عندكم شيخ محترم من طرفي  
هيفلصكم من الجنية الملعونة وأعوانها واللي أعتقد انهم هيبعدوا  
عنكم لأن اللي مسخرهم هيكون عنده مليون حاجة يفكر فيها قبل ما  
يفكر يبعثهم ليكوا ثاني!

تحياتي

نادر فوده





# الفصل الثاني

## (بين العمارتين)

رَبِّهِمْ وَأَبْنَاءَهُمْ

(رَبِّهِمْ) لَمَعَاتُ الْعَرَبِ



نومي في شقتي وعلى سريري متعة ما بعدها متعة، نمت كأني  
مانتمش من سنين، بسبب كتر إللي بمر به بقيت بدرجة كبيرة بقدر  
أفضل وأنسى كل حاجة، ما هو مش معقول هقضيها تفكير في كل  
حاجة بمر بيها، يبقى كده مش هبطل تفكير ولا هعرف أنام وحتى لو  
نمت هيبقى نوم قلته أفضل بكثير، ففعلاً نمت..

ومع دقائق السادسة صباحاً كنت صاحي،

ونص ساعة كنت في الشارع متجه لشغلي وإللي حاسس إني بقالي  
سنة ماروحتوش، الكل رحب بيا، وأنا كمان دخلت مقبل على الكل  
زي الطفل في أول يوم مدرسة بعد أجازة طويلة.

توجهت لمكتب (حاتم) مديري المباشر وتعاملت معاه بمتهى  
الاحترام عكس ما حدث سابقاً!

(ارجع لرواية النقش الملعون لتفهم المقصود)

قعدت وحكيت لـ (حاتم) شوية حاجات عن (عمارة الشرقية)...

اتبسط إني جايب له تحقيق جديد وأن غيابي مبرر وخصوصاً إن

الجواب بتاع عمارة الشرقية كان هو إللي استلمه لو تفتكروا! (الرواية

السابقة)..

## مفاجأة غير متوقعة

دخلت مكثبي وطلعت أدواتي وبدأت أعيد صياغة التحقيق الجديد  
إللي هنشره وقررت أسميه عمارة الفزع (العائلة الملعونة)  
اخترق ودني صوت بيقول: تشرب إيه يا أستاذ (نادر)؟



مدبولي





مدبولي: ماتقدرش!

نادر: ما تستفزنيش!

مدبولي: وأنا مالي روح اسأل حبيبة القلب!

نادر: (مدبولي) أقسم بالله هقتلك بإيدي المرة دي!

مدبولي: خلاص خلاص هريحك..

بعد ما انت سببتي وانت فرحان أوي إن حبيبة القلب جت

تموتني... سابتني!

نادر: نعم ببساطة كده!

مدبولي: آه سابتني.

نادر: عملت لها إيه انطق؟

مدبولي: أنا اللي عملت لها! بقولك سابتني من غير مناسبة،

قالت لي إني لو ضايقتك هتخلص عليا المرة الجايه، وإنها

هتسييني المرة دي بس لأنها مش جايه تقتل حد، وأنا هنفذ

طلبها ومش هأذيك، طب عيني في عينك كده... بدمتك هو

أنا أذيتك أولاني أصلاً؟

أنا كل إلهي طلبته منك القلادة وإنك تكتب عني وانت بقا لا

عملت دي ولا دي، فكثر خيرك.



شوفت بقا.. انت ظلمتني ازاي في الأول وفي الآخر..

نادر: آه تصدق.

مدبولي: طب اكتب عني بقا ههههههههههههه.

نادر: وانت رجعت الشغل وفاكرني مش هفضحك!

مدبولي: هتقول إيه! إني بنصب ع الناس، طب ما أنا وانت

زي بعض.

نادر: اخرس.

مدبولي: وحياتك زي بعض، أنا بعالج الناس وباخد منهم

فلوس وأنت بتروح تكتب عنهم وتنشر قصصهم ويردو

بتاخذ في الآخر فلوس على قفاهم...

عارف الفرق بيني وبينك إيه يا (نادر)?

أنا صريح مع نفسي..

انت بقا بتعمل نفس إللي بعمله وساعات كمان من ورا الناس

ومش صريح ولا دوغري..

نادر: لأ الفرق كبير، أنا صحفي وبتكتب تحقيق وباخذ أجري

من شركة محترمة، ولما بيكون قدامي أقدم مساعدة من نوع

تاني مبتأخرش، إنما انت دجال ونصاب وبتستغل الجن في  
أذية الناس.

مدبولي: أذية؟ أنا! حاشا لله.

نادر: أنا هبلغ (حاتم) وأعتقد أنه مش هيحب يشغل عنده  
نصاب.

مدبولي: مين؟ (حاتم) ههههه!

الله أكبر عليه ما انت عارف انه نصاب بس على كبير، وبعدين  
أنا لو مشيت هتمشي قبلي، أنا هفتح كل حاجة، أنا هاتطرد يا  
دوب، إنما واحد صاحبنا هيتلف جبل المشنقة حوالين رقابته  
يا حلو..

تكونش فاكر اني ماتبلغتش باللي حصل مع المهندس  
(خيري) اللي انت سميته عادل!

نادر: وإللي بلغوك مقالولكش إنني ماقتلتوش.

مدبولي: ياما في الحبس مظالم يا (نادر) يا بني.. وياما ناس  
اتعدمت ظلم في العالم كله!

وحلني بقا على ما تعرف تلاقي طريقة تثبت بها إنك برئ  
يكون حكم الإعدام اتنفذ...



ده إذا عرفت تثبت من الأساس !!

وأقولك على حاجة (حاتم) أفندي ده أول واحد هيبيعك  
وهيشهد ضدك، او عاك تفكر أنه ناسي إنك هزقته قدام الناس  
كلها.. استهدى بالله وقولي اجملك إيه تشربه وصدقني أنا  
مليش دعوة بك ولا بها، عندي أبواب تانية بسترزق كويس  
اوي منها..

بس هفكرك إنك انت إللي هتكتب عني مش حد تاني بس لما  
ربك ياذن.. بالإذن..

هعملك الشاي بتاعك أنا عارفه وماتخفش مش هحطلك فيه  
سم...

مشي (مدبولي) وطلعت ورقة وقلم ولقتني بعمل قائمة بالأسماء:

(مدبولي) عايش وزى القطط بسبع أرواح.

(مروة) ؟

(ماما) ؟

(أمنية) ؟

(عم مختار) ؟

(الشيخ لطفي) ؟

(خالتي صفية) ؟

دي قايمة لازم أطمئن على وضع كل اسم فيها سواء وضعه كويس

أو غير....

وبدأتها بـ (مدبولي) خلاص وقفلت الخانة بتاعته...

وعالعموم النهارده التلات، والخميس بعد الشغل هسافر البلد

وهقفل كل الخانات... خانة خانة.

دقايق ولاقيت (حاتم) داخلي وعلى وشه ابتسامه عريضة وقاللي:

نادر بقولك إيه، أنا بقتراح نعمل موضوع العمارات المسكونة ده

سلسلة، إيه رأيك؟

نادر: وأنا هجيب عمارة منين مسكونة تاني؟

حاتم: ماتستعجلش على رزقك... اتفضل.

حاتم طلع جواب وكالعادة فاتحه وقاريه..

نادر بضيق: (حاتم) أنا مش عاجبني موضوع إنك بتفتح

الجوابات إللي جايه لي!

مممكن أعرف الجواب ده جه امتي؟

حاتم وهو عامل محرج: ده من بعد اللي فات علطول بس

كنت خدته معايا البيت ونسيته هناك.



نادر: فعلا؟! طيب يا (حاتم) ثاني من فضلك أي جواب  
يجيلي أنا الوحيد إللي ليا الحق افتحه، ولو فتحت أي جواب  
ثاني روح انت حقق وراه!

حاتم: احنا لحقنا! ما انت لسه كنت كويس!

نادر: انت مش شايف إن كلامي صح؟!

حاتم بغضب: لأ طبعا مش صح، أنا مدير كالمباشر وملهمك  
كمان.

نادر: موو إيه؟! (حاتم) ماتخلنيش أمشي وأسبهاك  
مخضره خالص.

حاتم: ياااه! خلاص خلاص الحق عليا اني بحاول أساعدك.

نادر: هات الجواب يا (حاتم) من فضلك وماتساعدنيش  
ثاني.

حاتم: أهو يا سيدي، بس هيعجبك أوي.

نادر: اتفضل يا (حاتم) مع السلامة.

انسحب (حاتم) وأنا متأكد أنه لو يطول يرفدني مش هيتأخر ثانية  
واحدة..

ودخل (مدبولي) حط الشاي وبص لي البصة السخيفة بتاعته  
وخرج، وطلعت الجواب من الظرف وبدأت أقراه..

السلام عليكم ورحمة الله..

تحياتي لأستاذ (نادر فوده) الصحفي المحترم

معاك (ولاء) طالبة في كلية الهندسة - الفرقة الثالثة، أنا أصلاً من البحيرة وكنت من الطالبات إल्ली التنسيق ظلمهم، كان حلمي أدخل كلية حكومية لكن لما مجموعي ماساعدنيش، والذي أصر إنني آجي هنا القاهرة وأدرس في جامعة خاصة وقالني: «انتي ماقصرتيش، تعليم بلدنا هو إल्ली عاوز يتغير كله.»

أکید أنا مش بعثالك الجواب عشان نناقش مشاكل التعليم والتنسيق. كل إल्ली أقدر أقولك عليه إن سكن الطالبات بتاعنا مسكون!! ده من الآخر!

وده مش كلامي لوحدي

ده كلام كل البنات هنا

هستناك تيجي تقابلنا

ده رقم تليفوني 6-----010

كلمني قبل ما تيجي عشان هقابلك الأول بره، وبعدها أبله (عايدة) المشرفة هتخليك تدخل المبنى من غير ما حد يعرف من أولياء أمور البنات اللي لسه مكملين!  
شكرًا.... (ولاء صلاح)







- برغم إنني مش طايق (حاتم) بسبب فتحه للجواب لكن الحقيقة هو عنده حق، شكلها قصة حلوة هعمل بها تحقيق العمارات المسكونة ده على جزئين..

خلاص أنا هأجل زيارتي للبلد لحد ما أرجع من التحقيق..

لأ!! مش معقول الشغل هياخدني أكثر من كده عن أمي وأختي، ده اليوم إللي بيعدي ما حدش عارف ممكن يحصل فيه إيه..

كل يوم بيعدي بياخد من عمر أمي يوم.. أيوه فووووق كل يوم بيعدي بياخد من عمر ابوك وامك يوم!

ماما مش عايشالك العمر كله!!

وأختي إللي دوري ناحيتها سلبي وكنت مقرر أركز معاها.. راح فين كلامي ده!؟

خلاص خلاص..

أنا بكره هنزل البلد والخميس أروح أقابل (ولاء) دي..

دخلت لـ (حاتم) قولت له: أنا مسافر بكره البلد.

حاتم: انت لحقت يا (نادر)؟

نادر: هو انت محتاج قعدتي جنبك هنا في إيه؟ مش انت ليك

التحقيقات!

التحقيقات مبتعملش على مكاتب يا (حاتم)..



حاتم: خدت عليا انت اوي يا (نادر).

نادر بابتسامة ساخرة: من العشم يا (تومي).

حاتم: ماشي يا (نادر)، السبت هكون مستني التحقيق على

مكتبي وبعدين بلاش تومي دي تاني!

نادر: بس متقاطعش.

حاتم: ألا صحيح هو أبو (هالة) فين؟

نادر: مين؟!

حاتم: (عادل) مش هو اسمه (عادل)!

بعدها ابتسم..

نادر: آه آه... معرفش هو أنا هصاحبه.. أنا بمجرد ما بخلص

التحقيق بتنتهي علاقتي بأبطاله...

حاتم: أنا لسه عاوز عنوانه.

نادر: مش فاكراه.

حاتم: أنت بقيت بتنسى بسرعة أوي يا (نادر).

نادر: هحاول أفكره واجيهولك، ده إذا افكرته، وبعدين

مش انا ادتهولك قبل كده وانت ضيعته،

المشكلة عندك انت يا حاتم.

حاتم مبتسمًا: لأ ما أصلي نسيت أقولك، مش واحنا بنفرغ الكاميرات شوفتك وانت في مكتبي وبتقطع الورقة وبعدها حتى اتقلبت على وشك في الأرض!

- لمزيد من التفاصيل ارجع للرواية السابقة (النقش الملعون)..

نادر: (حاتم) هات من الآخر.

حاتم: أنا أقدر دلوقتي ألبسك سرقة لأي حاجة تضيع من الجورنال، أنا بس عاوز أعرف خدت العنوان ليه؟

نادر: لبسني يا (حاتم)، مش هريحك ومش هقولك ليه بردو.

حاتم: وأنا مسيري هعرف يا (نادر).. ع العموم ركز أنت في مشوارك الجديد وماتتعبش نفسك وتيجي تدور على العنوان ده كمان عندي.. لأنني حفظته... عرفت ليه أنا بفتح جواباتك؟

نادر: بردو ده مايديكش الحق.. وأعتقد في حاجة في الصحافة اسمها (الحق في الاحتفاظ بمصادري الصحفية)..

حاتم: مع السلامة يا (نادر).. وابقى سلم لنا على الوالد... آسف... نسيت أن والدك اتوفى... الوالدة أقصد.

نادر: كل يوم بكتشف فيك صفة أقدر من إللي قبلها.

حاتم: same here baby.





## حاتم

107

للمزيد من الروايات والكتب الحصرية  
انضموا لجروب سحر الكتب

sa7eralkutub.com

او زيارة موقعنا



خرجت من الجورنال ودماعي هتفجر، كنت لوهلة شكيت في  
(مدبولي)، بس كده لأ. (حاتم) كل إللي في باله إني بخبي العنوان  
منه نفسنة وكده، أعتقد أنه لو عرف حاجة تانية ماكنش هيستنى دقيقة  
وهيبيلغ فيا فوراً أو هيبترني بأقدر الطرق.

- من موقف عبود بالقاهرة انطلقت لمحافظةتي عشان أكمل  
الخانات إللي وريتها لكم قبل كده..  
وأنا قاعد في المكروباص وسرحان لمحتها معديه.. إيه ده هي  
فعلاً!!

الست بتاعة الفنجان... أيوه هي..  
نزلت من العربية وجريت وراها..

نادر: يا حاجة، يا خالة، يا يا يا جواهر يا حاجة، إنتي مش  
فاكراني.

اتلفتت وبصت لي: جوهر جوهر رررر، انت نسيت اسمي يا  
(نادر)؟

نادر: خالة (جوهر) انتي بتعملي إيه هنا عندنا؟

جوهر: عندكم؟ بس انت مش من هنا!

نادر اتلخبط: أنا ليا شقة هنا.

جوهر: بس بيتك وعيلتك وناسك هناك، وانت مسافر لهم  
اهوه.



نادر: طب بتعملي إيه وسأيبه بلدك وعيلتك وناسك انتي  
كمان ليه؟

جوهر: الشرقية مش بلدي.. أنا بسرح في كل حته.

نادر: بس صدفة غريبة إننا نتقابل تاني.

جوهر: اللقا نصيب يا بني.

نادر: طب ممكن تقري لي الفنجان تاني، هشوف أي مكان  
فيه قهوة.

جوهر: هات إيدك.

نادر: ليه.

جوهر: هقرالك الكف.

نادر: بس ده حرام.

ضحكت (جوهر) وقالت لي: هات هات يا راجل..

وبدأت جوهر:

إيه ده انت شوفتها تاني أهو..

جتلك... اللي عشقاك..

نادر مقاطعًا: عاشقاك، رايداك، كارهاك، بالله عليك يا شيخة

بلاش كلام الأغاني ده تاني.

جوهر: حاضر.. انت ساعدت اللي كنت عندهم أد ما قدرت

وهربت في الآخر ونفدت بجلدك، ولما كنت في ضيقة

وخنقة موت، هي ساعدتك.

نادر: أنا ماهر بتش، هم مكانوش عاوزني وانا كمان بلغت عن  
اللي أذاهم.

جوهر: البيت ده في واحد منهم بيساعد الشر يدخل، بس انت  
وقفته، إللي أنا شايفاه إن البيت كله في ناحية حالاً وفي واحد  
واقف لوحده.

نادر: (يحيى).

جوهر: حوالية نار وانت اللي ولعتها..

نادر: يعني اتاخذ معاهم واتقبض عليه؟!!

جوهر: ما عرفش اللي انا شايفاه، ان في حد في البيت ده عاوز  
كل حاجة، عاوز سلامة أهل البيت وعاوز الكنوز، عاوز  
المال والبنون، يكبش ويملاهم الاتنين من غير ما كفة منهم  
تنقص! بس انت لخبطت له كل حاجة بالولعة اللي ولعتها.

نادر: أنا اللي يهمني سلامة الأطفال.

جوهر: شايفه تلات وردات فتحوا ونوروا من جديد، بعد ما  
كانو دبلوا والفرح كان عنهم بعيد.

نادر: الحمد لله.

جوهر: انت رايح لأهلك؟

نادر: آه.



جواهر: بس في حد فيهم عليه غيوم.

نادر: مين ويعني ايه؟

جواهر: مش عارفه!

جواهر: وبعدها رايح تساعد ناس تانية؟

نادر: آه.

جواهر: الحالة هناك صعبة.. بس ادعي ربك يقويك.

نادر: هي دي العين المخفية؟

جواهر: لأ لسه شويه..

جواهر: يالا امشي ودور ورا اللقمة.

نادر: ايه؟

جواهر: يالا امشي بقا... تعبتني يا ولا..

طلعت لها فلوس واديتها لها ورجعت تاني ركبت المكروباص،  
فكرت أتصل بـ(أمنية) اختي اتظمن منها لكني قولت أنا هروح أشوف  
كل حاجة بنفسي أحسن.

على المغرب كنت نازل من المواصلات في موقف البلد عندنا،  
ومنه توجهت للبيت..

أمي طارت من الفرحة لما شافتني وكذلك اختي (أمنية) وسألتهم  
عن أخبار البلد؟

كنت حاسس زي ما اكون غايب بقالي زمن طويل، الأخبار كانت  
عادية جدًا، يعني لا جديد بخصوص أي حد أسأل عنه من العيلة.

نادر: ماما هو في حد اختفى؟

والدة نادر: إيه؟

نادر: في حد اختفى من قرايينا؟ أو مشي مثلاً وساب البلد؟

والدة نادر سكتت شويه وبعدها قالت: لأ مفيش.

أمنية: لأ فيه... (مروة) بنت خالتك صفية.. اتجوزت

(كساب) وفعلا اختفت حاجه بسيطه بس رجعت وعرفنا انها

اتجوزت وعاشه في القليوبيه

نادر: اشمعنى القليوبية؟!

أمنية: مانعرفش.

نادر: بس هي أكيد اتجوزته فعلاً؟

أمنية: ده كلامها.. بس غالباً ده حصل لأنها جت وكانت

فرحانة أوي.

- لمزيد من التفاصيل ارجع للرواية الثانية (كساب)..

نادر: وخالتك؟

أمنية: وهي في إيديها إيه تعمله!

والدة نادر: ابقى روح راضي (صفية) خالتك بكلمتين عشان

هي واخدة على خاطرها منك من وقت ما انت قولت لها مليش

دعوة بـ(مروة).

نادر: حاضر.. طب هي خالتي عامله إيه كويسه؟



والدة نادر: لأ والله يا (نادر) مش كويسه خالص، من وقت

ما (مروة) مشيت وهي حالها اتبدل، أي أم تتمنى تشوف بنتها

أحسن بنت في الدنيا وتجاوزها أحسن جوازة وتعمل لها

أحسن فرح.. (مروة) خلصت على خالتك باللي عملته ده!

دخلت أوضتي إللي كانت وحشاني جدًا، غيرت هدومي وطلعت

لاقيت ماما في زمن قياسي زي أي أم محضرة وليمة ربنا يخليها لي يا

رب، كنت مفتقد أكل أمي فعلاً، خلصت أكل وتغاضيت إني شوفت

طبق السبانخ العجيب إللي بيني وبينها تار قديم.. وماما قالت جملتها

المعتادة: طب دوقها المرة دي يمكن تعجبك.

فانفجرت (أمنية) ضاحكة وأنا من وراها لأن دي جملة ماما الدائمة

عن أي أكلة ما بحبهاش: طب دوقها يمكن تعجبك المرة دي.

- كوياية شاي من إيدين (أمنية).

وماما دخلت ترتب المطبخ..

نادر: احكي لي عامله إيه؟

أمنية: أنا كويسه الحمد لله.

نادر: مفيش حاجة مضايقاكي، مفيش حاجة عاوزه تاخدي

رأبي فيها، أنا عارف إني مقصر معاكي.

بس سامحيني وأنا جاي أسمعك أهو، جاي لك والله العظيم

مخصوص المرة دي.

أمنية: والله وأنا مقدره شغلك وظروفك.







ماما الحمد لله كويسه جدًا  
أمنية الحمد لله كويسه جدًا

عم مختار؟ لسه

الشيخ لطفى؟ لسه

خالتي صفية؟ لسه

كده قفلت خانة ماما و(أمنية) كمان وبكرة أكمل..

صباح الأربعاء..

الساعة تسعة الصبح كنت لابس وطالع واستأذنت ماما تكلم خالتي  
(صفية) تقولها (نادر) جاي يفطر معاكي..

مفيش ربع ساعة كنت على باب بيتها، فتحت لي وخذتني بالحضن  
وكانت مجهزة الفطار..

(قشطة وعسل وبيض وجبنة قريش وفول معتبر)

خلصنا فطار وطلعنا البلكونه نشرب الشاي سوا..

صفية: أمك حكيت لك على إللي (مروة) عملته فينا يا نادر؟

نادر: أنا مش شايف أنها عملت حاجة.

صفية: إزاي بقا؟

نادر: هي كانت عاوزه تتجوزه واتجوزته، ربنا يسعدنا بقا.

صفية: انت إللي بتقول كده، وانت أكثر واحد عارف هي

اتجوزت مين؟!!!

نادر: عارف، بس كمان اعرف انه كان متمسك بيها جدًا  
وواضح انه بيحبها وبعدين مش يمكن حاله يتعدل على  
إيديها؟!!

صفية: واللي زي ده بيعرف يحب!  
أنا كنت واقفه بطولي في وشه لحد ما اتقلب.  
نادر: اتقلب يعني ايه؟!!

صفية: جالي هنا ووالي أنا هتجوزها وبلاش تخليني اقلب  
عليكي يا حماتي، قولت له أعلى ما في خيلك اركبه.  
نادر: حلاوتك وطبعًا هو ماسكتش.

صفية: ما ستناش، ليليتها صحيت على خبطة في الأوضه زي  
ما يكون حاجة وقعت، ولعت نور الأباجورة مالمقتش حاجة  
واقعه، قولت في عقلي أنا بحلم..  
بعدها الدولاب إللي في وش السرير، سمعت حاجة زي صوت  
خربشة جواه.. وسمعت صوت خبطة من جواه، خبطة حد عاوز يطلع  
منه ..

مفيش دقيقة ولاقيت صوت عيل صغير بيقولني وصوته بيخوف:  
افتحي لي يا صفية.  
افتحي لي يا صفية.  
افتحي لي يا صفية.

أنا كنت قاعده مشلولة على السرير، مش مصدقة إللي سمعاه!



خبط تاني وقاللي : بقولك افتحي لي يا صفيه..

زعقت وقولت له: انصرف.. انصرف.. انصرف.. حرام عليك انصرف..

إفتحي لي يا صفيه..

افتحي لي يا صفيه.

بعدها العيل ده ضحك وهو جوه الدولاب، صوته كان يخوف أوي يا (نادر) يا بني..

والخبط جوه الدولاب عليّ وبقا شديد وورا بعضه بسرعه لحد ما الدولاب اتفتح بالراحة لوحده..

الدولاب كان جواه مضلم زي القبر، حاولت أقوم جسمي كله لازق في السرير وانا متخشبة، الدولاب كله اتهمز زي ما يكون الأرض بتتكسر من تحته، قولت أعوذ بالله من الشيطان الرجيم..

لمحت حاجة منورة جوا الدولاب زي ما تكون عينين، أنا برقت على الآخر عشان أشوف أكثر، ماشوفتش.

لحد ما الصوت ده اتكلم من ورايا وقاللي بصوت مخيف: انتي مافتحتيليش لبيسيه؟

صرخت وخطيت إيديا على وداني وغمضت عينا وفضلت أقول:

انصرف عني..

انصرف عني..

انصرف عني..



انصرررررف.

ماحصليش حاجة، فشيلت إيديا بالراحة من على وداني وفتحت  
عينيا وبصيت بالراحة ورايا مشوفتش أي حاجة..

بس الدولار كان لسه مفتوح زي ما هو....

سمعت صوت ضحكة العيل الصغير طالعة تاني من الدولار  
، ولاقيت إيد رفيعه اوي بتطلع من الدولار وبتتمد تطلع برا  
الدولاب ، استنيت أشوف دي إيدين مين ولا إيه !! لكن  
مفيش حد ظهر... الذراع هو الحاجة الوحيدة اللي خرجت!  
وكان ذراع طويل يجي أد ذراعنا ثلاث مرات، كان طويل  
أوي أوي، واتمد برا الدولار وكان جاي ناحية السرير،  
قولت: أعوذ بالله منك إن كنت جاي تاذيني.

وقف وماكملش، كررت الجملة لما حسيت انها وقفته:

أعوذ بالله منك إن كنت جاي تاذيني.

أعوذ بالله منك إن كنت جاي تاذيني.

أعوذ بالله منك إن كنت جاي تاذيني.

دخل الذراع بسرعة في الدولار كأن حاجة شفطته واختفى  
جوه الضلمة.

جسمي كله كان عمال يتنفض بس الطفل دا اتكلم بصوت  
واطي وقاللي:

سيبي سيدنا يتجوز (مروة) ومتضايقيهاش تاني.

سيبي سيدنا يتجوز (مروة) ومتضايقيهاش تاني.











وصلت للباب أخيراً ومديت إيديا أدور بالراحة على مقبض الباب،  
نزلت بإيديا بالراحة لاقيته، بس المقبض كان متغير، ده مش مقبض  
الباب... ده... ده

ده مقبض الدولاب! فتحت عينيا بالراحة لاقيته فعلاً الدولاب.  
إزاي أنا جيت ناحية الدولاب وهو اتقفل امتى تاني؟  
لسه بشيل إيدي من على المقبض، البابين بتوع الدولاب الاتنين  
اتفتحوا جامد يا بني وخطبوا فيا طيروني وقعونني على ضهري في  
الأرض على الزيت ولا الدم إليلي مالي الأرض...  
لاقتلك رجل خرجت من الدولاب، رجل كلها شعر اسود زي  
القرود وخرج بعدها جسم غريب شبه البني آدمين بس كان قصير أوي  
وتخين وجسمه كله شعر وشعره طويل، ضوافره عامله زي حوافر  
الحيوانات.

خرج من الدولاب ومشيت ناحيتي.. اتحرك خطوتين وبعدها  
وقف...

سمعت صوت من ورا وداني، صوت الطفل الصغير إليلي نط على  
السريير... صوته من ورايا:  
سيبي مروة لسيدنا.

متضايقيهوش...

سيدنا زعله وحش اوي يا صفية.

شايفه إليلي قدامك ده..

مستني الأمر عشان ياكل لسانك اللي رافضة به الجوازة يا صفية..



أول ما قال كده... الحيوان إللي قدامي كشر وطلع منه صوت زي الكلاب وسنانه بانة ونزل من بوقه دم اسود..  
ورجع الصوت تاني يقول لي:  
وافقي يا (صفية)..

قولت له: وانتوا فارق معاكم موافقتي؟

قال لي: مش فارق طبعا، بس مش عاوزين عروسة سيدنا تكون متضايقة وانت السبب انها متضايقة، وافقي ياللا..

بعدها لاقيت الدم الللي انا واقعه عليه عمال يكثر ويغطيني ويملا الاوضه لحد ما غطى جسمي كله ومش باقي غير راسي الللي لسه ماغرقتش فيه!

صرخت: خلاص خدوها في ستين داهية وسيبوني وابعدوا عني.  
الصوت: ده عهد يا (صفية) ولو خلفتية انت عارفة ومجر به عينة من الللي هيحصلك،

أول ما أمشي تبغني (مروة) انك موافقة والا.....

ومن ورايا حط إيديه الاتنين الصغيرين على عينيا وضغط ضغط ضغط جامد جداً وأنا صرخت من الألم وجيت امسك إيديه ملقيتهاش،  
اختفت!

فتحت عينيا لاقتني نايمة على السرير والدولاب مقفول والدم وكل حاجة اختفت.. ومفيش أي أثر لأي حاجة من الللي حصلت.  
خرجت أجري من الأوضه.. لاقيت (مروة) نايمة..



صحتها وقولتها: أنا موافقة موافقة.. لو عاوزة تتجوزيه بكره  
اتجوزيه.. أقولك اتجوزيه حالاً.

حسيت يا (نادر) إنها كانت عارفة باللي حصل لي.. لقيتها وشها  
مخطوف وقالت لي:

سامحيني يا ماما، أنا نبهتك وده مش بإيدي..  
صدقيني يا ماما، أنا هكون مبسوطة مع (كساب) كساب معندوش  
مشكلة مع حد..

ده حتى (نادر)  
(كساب) قالي إنه مش فاضي له دلوقتي على الأقل! إلا لو نادر  
نكش على هلاكه بإيده!

نادر: وبعدين؟  
صفية: سلّمت عليا بعدها بيوم وقالت لي أنا ماشية... ممكن  
يا نادر؟

نادر: ممكن ايه؟  
صفية: أديك عرفت كل اللي حصل لخالتك، ممكن تبقى  
تروح ترجعها؟

نادر: أروح إيه؟!!! انت مش لسه قايله انه قالها انه مش فاضي  
لي إلا لو نكشت على هلاكي بإيدي، انت عاوزاني اروح له  
برجليا تاني يا خالتي؟ طب بتتك ودلوقتي بقت مراته، أنا بقا  
اروح له اقول ايه بعد اللي عمله فينا واللي انا عملته في ابوه!!!  
صفية: ومين السبب في المعرفة السودا دي من الأول يا نادر؟

نادر: يووووووه أنا السبب وبتتك حبته، مليش فيه انا بعد  
كده، وبعدين أنا في كلمتين محشورين في زوري من زمان  
ومن قبل خطوبتها من أكرم وجوازتها الأولانية من اللي مش  
فاكر كان اسمه ده كمان وأعتقد إن ده الوقت المناسب جدًا  
انك تسمعيهم:

ريحي نفسك، أنا مش هتجوز (مروة) لا بحبها ولا هي بتطيقني!  
أنا عارف ان انت وماما من زمان نفسك في ده، بس احنا الاتنين  
رافضين الموضوع ده من زمان!

صفية: لا، قول الحقيقة، عشان هي ما بقتش بنت بنوت؟

نادر صارخًا: بنت بنوت مين يا خالتي؟

هي مش كانت متجوزة أصلاً قبل كساب! فيه ايه؟؟؟

وتاني وعاشر بقولها لك، لا دلوقتي ولا بعدين!! انت مش عاوزة

تفهمي انت وماما ليه، مروة أختي مش أكثر من كده!

وبعدين حد يعرف لهم طريق هم الاتنين أصلاً؟!

صفية بلهفة الأم: (كساب) في بيت أبوه..

(مروة) لسه مكلماني يا (نادر) وقالت لي إنها جايه تزورني..

وبالمناسبة عارفة إنك جاي.

نادر: يبقى أنا همشي بعد الكلام الحامض اللي انت وأمي لسه

بتهروا فيه ده!



## مرورة والوجه الآخر

ماخلصتش الجملة، سمعت صوت الباب بيتفتح ولاقيت (مرورة) داخله وعلى وشها ابتسامه عريضه ولابسة لبس عجيب ، عبايه ألوانها كثيرة وسلاسل كثير ذهب وشعرها متظبط على أحلى هيئه ..  
نادر: أهلاً وسهلاً بالعروسة.

صفية: كنا لسه في سيرتك بالخير يا بنتي.

مرورة ضاحكة: واضح انه خير بدليل وش (نادر) المقلوب ده، كويس أني جيت ولقيتك يا (نادر) اوعي يا ماما تكوني لسه بترغي في الحوار بتاع كل يوم قبل ما أتجوز.

صفية هروباً من الموقف: أقوم اعملكم حاجة تشربوها.

نادر: واضح انكم كان ليكم صولات وجولات في الموضوع ده.

مرورة مستنكرة: احنا؟! لا يا حبيبي، أنا برا الفيلم الهندي ده، أمك وأمي من زمان وانت عارف،

يقولوا انك كنت هتكون العوض، عوض مين يا (نادر) صحيح

هههه مش الأخ اسمه (نادر) بردو؟

وضحكت بصوت عالي وقالت:

الحقيقة انت عارف انك مش التيب بتاعي خالص يا كحيان انت.

نادر ضحك وقال: الحمد لله، ده شيء يسعدني اني مش (الطين)  
بتاعك يا عروسة، يا مرات الثري.

نادر: المهم إزيك يا (مروة)؟

مروة: فل يا (نادر) مع كساب أكيد انا في نعمة.

نادر: يا شيخة... (كساب) ونعمه.. مايركبوش مع بعض.

مروة: لا ده (كساب) طيب خالص.

نادر: آه انتي هتقول لي! ما انا مجرب طبيته وطيبة أبوه.

مروة: خلاص يا (نادر) هو قال لي إنه خلاص خد حق أبوه منك  
وأنتك بقيت من غير أب زيه.

وضحكت..

نادر: ما صدقش، ده بني آدم كله شر.

مروة: (نادر)! من فضلك لاحظ إنك بتكلم عن جوزي.

نادر: مش عارف ليه يا (مروة)... حاسك كدابه أوي!

مروة: كدابه إزاي يعني؟

نادر بصوت واطي: (كساب) مش متجوزك عشان بيحبك، ده  
مبيعرفش يحب غير نفسه، ده واحد دفن أمه بالخيا، خليك فاكه دي  
كويس طول عمرك!

(مروة) شفائفها اترعشت وحاولت ترسم ابتسامه مصطنعة وقالت:



أنا مليش دعوة بكل ده... أنا ليا... إنه علاقته بيا كويسه..

وتجاوزت الموضوع ده وقالت:

إنت عارف يا (نادر) إنه فرحنا كان عامل زي الأفلام.

نادر: إزاي يعني؟

مروة: حضر الفرح ناس كتير شكلهم فخم جدًا وكانوا جاينين بعربيات، واكتشفت بعدها إن (كساب) معالجهم كلهم أو معالج أولادهم هو و(الوقاد).. فكانوا جاينين يردوا الجمایل للعيلة.. ده غير الهدايا الذهب اللي كانت بتترمی تحت رجلیا!

طبعًا ما عدا أمي اللي حلفت ما تيجي وحلفت على أمك كمان ما تحضرش كأني مش بنتهم..

نادر: خالتي ما جابتش سيرة الموضوع ده.

مروة: أصلها بعد ما (كساب) أقنعها بالجوازه بطريقته، فضلت مقاطعاني شويه لحد ما جيتلها وبوست راسها وجبت لها طقم ذهب محترم (كساب) باعته لها، ما انت فاهم الستات بقا يتكلموا ويتحمقوا اوي وأول ما تبرز لهم الهدية يجيبوا ورا في ثانية ههههه..

نادر مقاطعا: (مروه) إنتي بجد مبسوطة معاه؟ أنا عارف إنك شايلة مني، أنا عاوز أكفر عن غلطتي بأي طريقه.

مروة: (نادر) أنا اخترت (كساب) بإرادتي الكاملة.. وكان قدامي إنني أنسحب على فكره، بس أنا كملت برغم معاناة ما قبل الزواج معاه، يعني دلوقتي أنا متجوزاه بمزاجي..

شيل انت بس من دماغك حته تأنيب الضمير من ناحيتي، هو أنا  
فعلاً كنت مش طايقاك في فتره بس إللي انت مریت به بعدها واللي  
(كساب) حكاهولي مكنش شويه بردو،

خلاص يا (نادر) وأنا بجد شايفها فرصة النهارده عشان أقولك إني  
مسامحاك ومش هفضل شايله منك لآخر عمري يعني!  
انت غلطت وكفرت عن ذنبك ودفعت تمن غلطتك غالي اوي  
فخلاص بقا.

- كلام (مروة) نزل عليا زي الميه الباردة في عز الحر، عمري  
ما كنت أتوقع أنها تغفر لي إني استغليتها في الدخول لعالم (الوقاد)  
وكانت هي الطعم اللي مكني منه! (\*)

نادر: (مروة)...

مروة: يا نعم.

نادر: ممكن بما إنك سامحتيني تقولي لي انتي سعيده مع (كساب)  
فعلاً؟

مروة: ولو مش سعيده يعني.. هتعمل إيه؟

نادر: هحاول على الأقل.

مروة: مفهوم السعادة نسبي يا (نادر)....

نادر: بمعني؟

(\*) لمزيد من التفاصيل اقرأ روايات (نادر فوده) السابقة (الوقاد وكساب).



مروة: بمعنى في ناس السعاده عندها الفلوس، وناس عندها السعاده  
يعني المعامله الطيبه، وناس راحة البال وناس النفوذ.

نادر: وانتى أي نوع في دول؟

مروة: أنا نوع اسمه الرضا.. أنا اتجوزت وراضية، (كساب) يوم  
حلو ويوم لأ، يوم موجود ويومين لأ، مانكرش هو بيحاول يكون  
كويس وبيقولي أنا مش عاوز أكرر مأساة أمي،

لكن انت مش غريب طول ما هو ماشي في السكة دي للأسف  
هتفضل حياتنا غريبة ..

طب انت عارف؟

يوم فرحنا بعد ما المعازيم مشيوا دخل أوضة أبوه وقفل على نفسه  
وقالي ممنوع تماما تخبطني عليا.

شويه وسمعت صوت وفضل يعيط وينادي على أمه (حفيظة) كثير  
ويقولها: كان زمانك معايا الليلة دي.

بعدها سمعت أصوات ناس بتغني بطريقة عامله زي العجر،  
أصواتهم تخوف مرعبة، وناس عماله تضحك، الفضول قتلني، وقفت  
جنب الباب أسمع لاقيتها فعلاً حاجة زي الحفلة..

بصيت من خرم الباب شوفت حفلة جوه كان بطلها (كساب)...  
لكنها أغرب حفلة شوفتها في حياتي..

## طقوس زفاف

مروة: متخيل عروسة بفستان فرحها واقفة يوم فرحها تشوف جوزها  
وعفاريته بتحتفل به؟

نادر: شوفتي إيه؟

مروة: الأوضه كانت مفيهاش غير كرسي وكلها فاضية مع إني  
دخلتها قبل كده وشوفت الفرش إللي فيها، الكرسي ده كان (كساب)  
قاعد عليه، وحوالين رجليه كائنات صغيرة غريبة، كلها واقفة على  
رجليها الخلفية.. كانوا كتير وعمالين يقفوا ويوطوا مع بعض في نظام  
وترتيب مخيف.. ومعاهم خمس كلاب سودا حجمهم قدك كده مثلاً!

نادر: نعم؟

مروة: خلاص يا عم قدي أنا.. كانوا عمالين رايعين جاينين في كل  
أركان الأوضه..

أما في الحيطه فكان فيه فتحة كبيرة، كان بيدخل منها أعداد متزايدة  
من الكائنات الصغيرة دي، ودخل معاهم 3 بنات أو الحقيقة جنيات  
لابسين لبس زي بتاع زمان بتاع ألف ليلة وليلة (حاجات ملونة واسعة  
وغريبة) لما قربوا لاقيت مكان عندهم فاضي (فراغ اسود) وكل واحدة



في أيديها حاجة زي أبريق، فضلوا يلفوا حوالين (كساب) ويزيدوا من سرعة لفهم والتلاته كانوا بيغنوا مع بعض كلام مش مفهوم لكنه متلحن، كان غنا مقبض يخوف وزودوا سرعتهم أكثر في اللف أكثر وأكثر حواليه زي ما يكون حد بيتحكم في سرعة فيلم بيتفرج عليه لدرجة إنني مبقتش شايفاهم من كتر سرعتهم ورجعوا يكونوا أبطأ واحده واحده لحد ما وقفوا، و(كساب) كانت راسه مميلة قدامه زي إللي نايم.

أول جنية منهم رفعت الأبريق اللي معاها وصبت على رجلين (كساب) ميه لونها ازرق وهو ولا هنا، خلصت ورجعت خطوة لورا، التانيه خدت مكانها وبدأت تصب على بطن (كساب) ورجليه، السائل إللي كانت بتصبه كان لونه اسود، خلصت دورها ورجعت لورا هي كمان، والتالته أخذت مكانها وبردو (كساب) لسه فاقد الوعي وصبت على ضهره من الأبريق سائل لونه أبيض زي اللبن، في الآخر بقا عامل زي العفريت من الألوان إللي مغطياه،

رجعوا التلاتة يلفوا من جديد حواليه بهدوء ويغنوا من تاني بس المرة دي كانوا بيغنوا بالعربي!

نادر: فاكرة كانوا بيقولوا إيه؟

مرودة: أيوه فاكرة طبعًا، دول فضلوا يكرروها كثير جدًا لحد ما حفظتها..

أتينا للعرس السعيد  
من النار برجيم الوعيد  
نبارك قدوم الضيف الجديد

أتينا للعرس السعيد  
من النار برجيم الوعيد  
نبارك قدوم الضيف الجديد

أعددناه لعروسه حتى قدوم مولانا  
جهزناه لحياته حتى تشریف مولانا  
سرقناه من وعيه حتى حضور مولانا  
نوقظه الآن من سباته لبياركه مولانا

فليحضر مولانا

فليحضر مولانا

فليحضر مولانا

فضلوا يا (نادر) يعيدوا جملة (فليحضر مولانا) يجي عشرين  
مرة ويعلوا صوتهم لحد ما بقا صوتهم صراخ لا يحتمل، والكائنات



الصغيرة دي من صوتهم رقدوا في الأرض وفضلوا يتشنجوا شويه  
وبعدھا سكتوا خالص معرفش ماتوا ولا إيه، أما الكلاب فاتجنت  
وبقوا يجروا في الأوضه زي المجانين!

ومن الفتحة إللي في الحيطه... ظهر...

ظهر كائن كبير طويل جدًا وحواليه حاجة زي هاله من نار، وله  
قرنين فوق رأسه، أول ما دخل دخل التلات جنيات دول ركعوا في  
مكانهم، والكلاب قعدوا حوالين (كساب) والكائنات الصغيره وقفوا  
تاني على رجليهم الللي ورا.

لما شوفت خلقتة، رجليا ماكانتش قادرة تشيلني وجسمي كله  
فضل يتنفض، تحاملت على نفسي عشان أكمل إللي شايفاه، وشه يا  
(نادر) كان كله شر وغضب معندوش جلد زي وشنا، كان زي ما يكون  
مسلوخ، اللحم باين، عينيه واسعة وكبيرة جدًا عن عينينا ومعندوش  
جفون، هما فتحتين كبار مدورين وجواهم عينين كبيرة جاحظه لبرا،  
وقف وبرطم بكلام مش مفهوم، الجنيات التلاته اتحركوا ناحيته  
والغريب إن بالرغم من إنهم مكانش عندهم عينين لكن كل إللي كانوا  
بيعملوه من أول ما ظهوروا مايقولش كده أبدًا..

اتحركوا ناحية الغول إللي دخل ده، أخذت بالي إنه في إيده أبريق  
زي إللي كان معاهم بس أكبر شويه. إللي كان معاهم كان لونهم فضي

لكن إللي معاه كان نحاسي، فضلوا يقربوا منه ويحاولوا يشدوا الأبريق ده منه، واحدة ورا الثانية لكنه صرخ صرخة خلعت قلبي وفزعتهم هم كمان فانسحبوا لورا زي الحيات وقعدوا في الأرض مستنيين.

قرب هو من (كساب) ووقف ورا ضهره، أما الجنيات فبنظرة منه رجعوا تاني يلفوا حوالين (كساب) بهدوء ورجعوا تاني يغنوا بلغتهم المجهولة والكلاب واقفة حوالين (كساب) زي الحرس.

الغول جه من ورا (كساب) وهو قاعد على الكرسي وقام شاده من شعره وشد راسه لورا...

جربوا التلات جنيات يفتحوا في بوق (كساب) بالعافية، لحد ما فتحوه بالفعل والغول رفع الأبريق وبدأ يصب منه على وش (كساب) كان بينزل منه دم، دم غرق وش (كساب) ومفيش لحظة و(كساب) بدأ يترعش ويتنفض زي إللي بيتكهرب، الجنيات كتفته، والكلاب بسنانهم مسكوا إيديه ورجليه، خلاص كان حرقياً بيتقطع قدامي، فضل (كساب) يقاوم، لكنهم مبطلوش، الدم غرق كل جسمه، الغول نزل الأبريق على الأرض وبإيديه الاتنين مسك بوق (كساب) من فوق وتحت وفضل يفتح فيه على الآخر و(كساب) بيصرخ وأنا بموت برا لحد ما بوق (كساب) اتفسخ ووشه اتشق تمامًا وفكه غالبًا اتكسر وشال الإناء من الأرض وصب كل إللي كان باقي منه في بوق (كساب) أو حطام بوقه!

وفضل يجعرو ويقول:

الآن الآن الآن الآن..



فجأة لاقيت عين حمرا جت في وشي بتبص لي من فتحة الباب،  
 أنا رقت بالصوت غصب عني وفضلت أصرخ أصرخ وأنا  
 متخشبة مكاني، مش قادرة حتى اتحرك متجمدة ووبص للعين وهي  
 بتبص لي، بعدها الباب اتفتح بمنتهى العنف!!

ولاقيت (كساب)..

أيوه (كساب) إللي بيفتح وبيبص لي بهدوء ومفيهوش أي حاجة  
 وابتسم ابتسامه خبيثة وقال لي:

خير يا عروستي.. مالك؟ في حاجة؟!!

- وقعت من طولي على الأرض قدامه..

الفترة إللي غيبتها عن الوعي حصل فيها حاجات أغرب من اللي  
 شوفتها! كنت شايفه وحاسه بكل حاجه لكني مسلوبة الوعي والاراده!

شوفت (كساب) بيجرني من رجليا على الأرض وأنا فاقدة القدره  
 على الحركة وشالني ونيمني على السرير في أوضتنا!

وشد كرسي وقعد جنبي، ودخل من باب الأوضه الكائن الغول ده  
 وفي إيده نفس الإبريق النحاسي، أول ما دخل (كساب) قام وقف له،  
 وده جه قرب وشه مني جدًّا، كان جوايا شعور اني لازم أصحى لكن  
 جسمي بالكامل كان مشلول ومش عارفه أصحى من الكابوس ده!

رفع إيدو وكان عنده مخالب طويلة ومررها جوا شعري، حسيت بنار بتولع في راسي، بعدها شال إيدو ورفع أبريق الدم وصب منه على بطني بهدوء شديد... فستان فرحي اتلطح دم زي ما اكون مدبوحة!

نادر قاطع مروة: (مروة) هسألك بصراحة سؤال ومن غير عصبية.  
مروة: إيه اسأل؟

نادر: انتي كنت وقتها حامل؟

مروة: حامل ازاي يا بني؟ ده كان يوم فرحي.

(مروة) سكتت شويه وكأنها بدأت تدرك المقصود من السؤال،  
وقالت: يا نهارك اسود ومنيل!!

أنا ما كنتش فاهمه

انت تقصد اللي في بالي؟؟!!

نادر بتوتر شديد: أنا أنا أنا مقصدش حاجة.

مروة: ماتقصدش!!

نادر: أصل إللي انتي بتحكيه ده حصل حاجة قريبة جدًا منه في أم  
(كساب) (حفيظة) لما كانت حامل فيه.

مروة: لا أنا ماكنتش حامل يا محترم، ولا أنا حتى دلوقتي حامل،  
وبلاش تكرهني فيك تاني.

نادر: يا (مروة) افهمي قصدي، أنا أقصد انك اتجوزتوا قبلها مثلاً؟



مروة مقاطعة: ممكن تسكت!

نادر: خلاص أنا آسف، طيب الغول ده ما قالش من الأب للابن؟  
مروة: لأ هو مقالش حاجة مفهومة، هو صب المية وخلاص،  
هتسيني أكمل ولا أخرس خالص!؟

نادر: خلاص يا (مروة) ما انا ساكت من الصبح ومانطقتش غير  
حالاً.

مروة: وياريتك ما نطقت يا أخي خالص.

نادر: خلاص يا ستي، أنا آسف تاني، كملي خلاص.

مروة: رجع الغول بعدها مرر إيده ومخالبه في شعري و(كساب)  
واقف مبسوط وانا حاسه بنار بتضرب في كل جسمي والجنيات واقفة  
عند الباب بيراقبوا وماييدخلوش، الحرارة حواليا زادت وبدأت أسمع  
صوت النار بتمسك في شعري وشميت ريحة شياط شعري، وراسي  
ولعت، عاوزه اصرخ صوتي ما بيخرجش وحركتي مشلولة تماماً،  
والغول يقول:

أزد .. أزد .. أزد.

فضلت أجاهد عشان أصحى وأقول في عقلي: اصحي يا (مروة) ..

فوقي ..

اصحي يا (مروة) ..

بعد صراع رهيب صوتي خرج أخيراً وصرخت ومع صرختي فتحت  
وشلل جسمي اتفك وقومت قعدت ومسكت شعري بإيديا وهو مولع

ونظيت من على السرير أجري في الأوضه والنار اشتعلت في جسمي  
كله لحد ما وقعت في الأرض فاقدة الوعي وانا سامعة الغول يقول:  
كفى! كفى!

صحيت بعدها بأد ايه معرفش!

صحيت لقتني قاعدة على السرير بتاع أوضتنا و(كساب) مش  
موجود بس الكرسي كان موجود قدام السرير..

قومت جريت بصيت في المراية، لقيت شعري سليم، حطيت إيدي  
على بطني، بصراحة كان فستان الفرحة مكانها مرطب زي ما يكون كان  
اتبلى لكن لونه أبيض زي ما هو!

باب الأوضه اتفتح لاقيت (كساب) بصيت له برعب، قال لي:

إيه يا (مروة) هو انتي كل ما هتشوفيني هتبرقي؟! وانت هتقضيها  
نوم علطول كده ولا ايه؟

مروة: (كساب) انت دخلت أوضة أبوك وقفلت الباب عليك ليه؟

كساب: إيه ممنوع؟!!

كساب: بصي يا (مروة) لو فضلتي تفتشي ورايا هتتجنني واحنا  
اتفاقنا من الأول ان ملكيش دعوة بشغلي.

مروة: بس الغول إللي قسم وشك نصين.

انفجر (كساب) ضاحكًا: قسم وشي إيه؟ أو مال وش مين ده؟!!



مروة: أنا أعرفك! خلاص مش عاوزة أعرف.

كساب: أيوااا برافوا عليكى، امشي بالمبدأ ده (معرفش ومش عاوزه أعرف) هترتاحي.

مروة: طب وشعري؟

كساب: إشمعنا؟

مروة: العفريت ولع فيه.

كساب: لااااا دانتى مخك ضرب رسمى!

مروة: وبطني! أنا عارفه انك فاهم كلامى كويس ماتستعبطش..

كساب بخبث: ايه يا حبيبتى، مش بيظمنوا الوريث مكان استقباله مستعد له ولا لا؟

مروة: (كساب) متخليهو مش يقربوا منى تانى.. عكوا انتوا مع بعض بعيد عني وأنا مليش دعوة بأى حاجة.

نادر: الله! طب ما انا لما سألتك كان قصدي كده.

مروة: لا يا (نادر) إنت بتتهمنى اتهام ما قبلوش أبدًا.

نادر: انتى غبية ومادتنيش فرصة اتكلم.

مروة: ما علينا يا (نادر).

نادر: لا مش ما علينا، هو بعد كل إللى حكيتيه ده وسعيدة معاه

إزاي!!

مرودة: (نادر) قولتلك مبسوطه.

نادر: (مرودة) إنتي اتجوزتي على إيد ماذون؟

مرودة: أيوه طبعًا... انت ليه مصر تطلعني سيئة الخلق بأي شكل؟!

نادر: (مرودة) أنا خايف عليكى.

مرودة: متشكره.

نادر: هم حاجة من اتنين، يا إما (كساب) مهددك بخالتي (صفية) لأنها أقرب حد ليكي أو هو مسيطر على دماغك بشكلٍ ما، وبصراحة أنا برجح الاتنين مع بعض.

مرودة: وأنا اتأخرت ولازم أمشي عشان مسافرة القليوبية!

نادر: ماشي يا (مرودة) بس أنا متأكد إن حياتك دي مش هتكمل كده!

مرودة: ماتقلقش هبقى أكلمك لما حياتي تقف تيجي تزوقها.

نادر: (مرودة)... أنا آسف.

مرودة: خلاص يا (نادر) أنا بجد نسيت موضوعك وعندي حاجات

تانية أفكر فيها..

- مشيت (مرودة) وسايه لي لغز كبير عن العلاقة الغريبة بينها وبين

(كساب)!

علاقة ملهاش مسمى عندي غير انها علاقة تحت التهديد..

نادر: ربنا يسترها بجد على (مرودة).

صفية: يا رب يا ابني، ساعات احس انها كويسه ومبسوطه وساعات

احس انها حزينة وتايهة وضايعة.



نادر: ربنا يقدم اللي فيه الخير، هستأذن أنا.

وانا في الشارع طلعت ورقة من جيبى وقلم وكتبت:  
كده يبقى:

مدبولي عايش وزى القطط بسبع أرواح.

مروة تحول كبير ومريب جدًا

ماما الحمد لله كويسه جدًا

أمنية الحمد لله كويسه جدًا

عم مختار ؟ لسه

الشيخ لطفي ؟ لسه

خالتي صفية مرت بتجربة صعبة جدًا

كده باقى لي خانتين لازم اخلصهم النهارده..

مشيت وطلعت دوغري على الجامع، عارف انا رايح فين ولمين

وليه..

دخلت صليت الظهر ودورت عليه بعينيا كثير ماشفتوش، سألت

عليه واحد من المصلين:

- هو فين الشيخ لطفي؟

رد: بقاله كذا يوم عيان في البيت ما بيخرجش.

نادر: طيب انا متشكر جدًا.

## عودة الثلاثي المرح

طالع الشارع لقيت عم (مختار) خدني بالحضن ووقفنا اتكلمنا شويه وسألته عن الشيخ (لطفي) قاللي انه تعبان وانه بيروح له كل شويه عشان هو لوحده، طلبت منه نروح له سوا، وفعلاً روحنا لاقيته إلى حدّ ما الحمد لله بيتعافى وقال لي:

أنا خفيت لما شوفتك يا (نادر).

نادر: مالك بس يا شيخ (لطفي)؟

الشيخ لطفي: واضح اني كبرت خلاص يا نادر.

عم مختار ضاحكاً: إزاي بتقول كده يا راجل انت، ده انت لسه

شباب وهنجوزك اهوه .

الشيخ لطفي: لولاك يا (مختار) كان زماني مش لاقى هدمه نضيفه

ألبسها.

عم مختار: او عاك تقول كده تاني، واحنا ربنا خلقنا عشان نعيش

لنفسنا وبس ولا إيه؟

الشيخ لطفي: ربنا يعزك ويبارك لك في عيالك.

نادر: تحب أوديك لدكتور؟

الشيخ لطفي: الطيب هو ربنا.

نادر: ونعم بالله، بس...



الشيخ لطفى: مابسس، زي ما بقولك كده، أنا بس كبرت وإللى كنت بشوفه زمان وبتحمله دلوقتي بقا صعب عليا أتحملة، وجودك كان فارق معايا يا (نادر).

نادر: ما هو يا شيخ (لطفى) أنا ما كنتش هفضل طول عمري معاك، كان لازم هيجي اليوم إللى أكمل فيه حياتي بعيد عنك.

الشيخ لطفى: عارف يا بني، أنا أهم حاجة عندي إنك بقيت ما شاء الله صحفى ناجح وبعدت عن سكة اللى اسمه (كساب) ده. نادر: المهم هو اللى ينساني.

الشيخ لطفى: حصل حاجة تاني؟

نادر: لأ محصلش.. ربنا يكفيننا شره هو واللى زيه.

عم مختار ببساطته المعتادة: انت عارف يا شيخ (لطفى) الناس في البلد بيقلوا إنك أغمى عليك وانت بتطلع العفاريت من على الواد عامر. الشيخ لطفى: بطل تروج إشاعات، اكبر بقا يا (مختار).

عم مختار مندهشاً: إشاعات مين يا شيخنا؟

دي البت (لواحظ) مراته هي إللى دايره في البلد تحكي كل حاجه، وبالأمارة قالت إنك اتخنقت وسندتك وكنت هتروح فيها كمان.

نادر: إيه إللى حصل يا شيخ (لطفى)؟

الشيخ لطفى: ما انت عارف يا (نادر) مش المفروض إننا نحكي

إللى بنشوفه لأي حد.

نادر بحزن مصطنع: ايه ده؟ هو أنا خلاص بقيت أي حد!

الشيخ لطفني: لأ يا بني والله مش القصد.. ده انت زيارتك دي نسيتهني أي زعل قديم.

عم مختار: احكي يا شيخنا احكي، وانا هدخل المطبخ بتاعك المملخبط ده أعمل لنا دور شاي محترم لحد ما الجماعة يجهزوا لنا الغدا واهي فرصه (نادر) حبيبك وحببي يتغدا معانا.

الشيخ لطفني: ولو الكلام طلع برايا مختار؟

عم مختار: يبقى بحق عرب.

نادر: عم (مختار)!! مفيهاش هزار دي بجد.

عم مختار باندهاشه المعتاد: جرى ايه يا جماعة؟ انتوا ليه محسني

إني عيل صغير وسطكم!

نادر ضاحكا: لا لا العفو ما حدش قصد كده يا سيد الناس.

مختار: أنا هقوم اعمل الشاي أحسن.

الشيخ لطفني: بعد ما صليت الظهر من كام يوم وانا على باب

الجامع، لاقيت واحدة بتنادي عليا وعرفتني بنفسها، طلعت (لواحظ)

بنت (عبخالق صبيح)..

قالت لي: يا شيخ (لطفني) (عامر) جوزي حاله اتقلب من آخر

مرة راح الغيط يروي الزرعه، طلع الساعه واحده بليل هو و(مصطفى

خليل) جارنا عشان يرووا الغله (القمح) زي كل مره ...

مفيش ساعة ونص لاقيتهم راجعين و(مصطفى) ساند (عامر)

جوزي وقالني: (عامر) تعب شويه.

بعدها يا شيخ دخلنا (عامر) ينام.. كانت عينيه زايله وعمال يقول

ابعدوا العفريته عني!



نادر مقاطعًا: شيخ (لطفي)... أنا عاوز أطلب منك طلب.

الشيخ لطفي: لأ يا (نادر).

نادر: هو إيه إللي لأ.. مش لما تعرف الأول أنا عاوز ايه؟

الشيخ لطفي: عارف وعينيك فاضحاك، لما بتلمع كده بفهم انت عاوز ايه، عشان كده لأ!

انت عاوز تقابل (لواحظ).. يا (نادر) صح؟

نادر: صح.

الشيخ لطفي: مش قولتلك.

نادر: إيه المشكله طيب، أنا مش فاهم!

الشيخ لطفي: عشان إللي كنا بتتكلم فيه من شويه، بقا أنا بحلفكم ماتحكوش لحد، تقوم انت عايز تروح وتسجل معاها ومصر كلها تعرف؟!!

نادر: ده على اعتبار إن حد يعرف مين (لواحظ) دي!

عم مختار جه من المطبخ شايل الشاي: بصراحة (نادر) عنده حق يا شيخنا، هو لما يكتب إللي حصل معاها حد يعني هيعرف! هي مين لواحظ دي؟ تكونش فيفي عبده يعني!

الشيخ لطفي: مين فيفي عبده، دي عندنا من البلد؟! بنت حد اعرفه؟ انفجر مختار ونادر ضاحكين...

نادر مبتسمًا: يا شيخ انت مش عاوزنا نحكي لحد هنا، أنا متفق معاك جدًّا في ده.

لكن قراء الجورنال اللي انا بكتب فيه مش أهل البلد خالص، هنا مش بيشتروا إلا الأهرام والأخبار واخواتهم ده لما بيشتروا كمان، أهل

البلد هنا ما بيحبوش يقرأوا اللي يزعلهم. فالجرايد دي بتريحهم على الآخر! وشكرًا على كده.

الشيخ لطفى: أنا مش هروح أقولها عاوزك تحكي لنادر الصحفي على إللي حصل معاكي!

نادر: لأ قعدني معاها وأنا هعرض عليها بطريقتي.

الشيخ لطفى: مش هتوافق طبعًا.

عم مختار: وإللي يخليها توافق.

الشيخ لطفى: اسكت انت.

عم مختار: جرى ايه يا (لطفى) انت دايمًا كابسني ومقلل مني كده!

عم مختار: قوم يا (نادر) أنا هخليها تحكي ولو عاوز (عامر) نفسه

يحكيك هخليه يحكي..

نادر بخبث الصحفي: يا ريت يا عم (مختار).. ما انت قدوتي في

كل حياتي، انت عارف.

عم مختار مهللًا: يا سلام عليك.. أيوه كده ارجع كده (نادر) إللي

أعرفه.

نادر: ده انا هرجع ونص، وبعدين فين جملتك الشهيرة؟

عم مختار ضاحكًا: أيوه أيوه.. انت بتفكرني بشبابي، وفي الموقف

ده بالذات فكرتني لما كنت لسه بدور على عروسة أرتبط بها، كنت

ممکن أصور قتيل عشان أحقق طموحي ده.

نادر: عروسة!!! طيب!!

الشيخ لطفى ضاحكًا: يا فرحتي بيكو انتو الاتنين.



نادر: فرفش فرفش يا شيخ (لطفي) ما هي لو رفضت مش هطلع  
منها الكلام غصب عنها،

عم (مختار) هيعمل محاولة، سيبه يجرب يا يعرف يا مايعرفش..

مختار: الله!!!

الشيخ لطفي: لأ هيعرف.

نادر ضاحكا: اشمعنى يعني؟

الشيخ لطفي: أقول أنا ولا تقول انت يا (مختار) أفندي؟!!

عم مختار: جرى إيه يا شيخ (لطفي) ما تسبيني أساعد الجدع.

نادر مقاطعًا: هو انتوا ليه بتتكلموا بالأغاز، انتوا الاتنين؟!!

عم مختار: ولا ألغاز ولا حاجة، الشيخ (لطفي) عاوز يقلل مني

وخلص وانا هكبسه ان شاء الله.

الشيخ لطفي مستنكرا: لأ والله؟؟؟

عم مختار: أقولك بقا يا نادر...

من الآخر عمك لطفي مش عاوزك تنجح في شغلك، فترجع تشتغل

معاه تاني أصله كبير وعجز.

الشيخ لطفي: والله ما حد كبير وخرف غيرك يا مختار.

نادر: خلاص يا شيخ (لطفي) قولي انت الحقيقة.

الشيخ لطفي: أنا أقولك يا (نادر)...

مختار: شيخ (لطفي)!

الشيخ لطفي: (مختار) مطمئن أوي إنه لما يروح لهم هينفذوا طلبه

عشان هم مأجرين الأرض منه، ولو موافقوش هياخذها منهم، يعني من

الآخر هيحكوا بالغصب!

نادر: حقيقي الكلام ده يا عم مختار؟

عم مختار: الشيخ (لطفي) مبالغ اوي، الحكاية إني ليا عندهم خاطر.

الشيخ لطفي: خاطر مساحته فدانين يخليهم يفضحوا نفسهم.

عم مختار: انت محبكها كده ليه... في إيه يا شيخ؟

نادر: قول بصراحه بقا يا عم (مختار)! انت ناوي تبتزهم عشان

يحكوالي؟

عم مختار: انت كمان هتعلق لي المشنقه، أنا غلطان.

نادر: عم (مختار) من فضلك أفهم بس.

عم مختار: لأ هروح استأذنهم وهيحكوا لك، انت مش ليك تاخذ

الحكاية وخلاص؟

نادر ضاحكًا بخبث: وحتى لو ابتزيتهم شويه يعني مفيش مشكلة.

مختار انفجر ضاحكًا: أيوه كده اظهر وبان، وانا اقول الواد ماله بقى

حقاني اوي كده امتي، ده انت دخلت بنت خالتك للوقاد عشان تعمل

اللي انت عاوزه!

نادر: والنبي بلاش السيره دي يا عم (مختار) أنا الموضوع مأنبني

لحد دلوقتي والله.

نادر: يا شيخ (لطفي) في شغلتنا مفيش مانع من شوية شر كده عشان

احصل على المعلومات وخصوصًا إني مش هضر الكونتيسة (لواحظ)

واللورد (عامر).. ولا حد هيعرف دول فين ولا مين!

وبعدين بجد بعيدًا عن الهزار بقا، والله العظيم أقسم لك لو رفضوا

ما هخلي عم (مختار) يضغط بموضوع الأرض ده.



عم مختار: يا نادر (لواحظ) دايره تحكي في الناحيه كلها ولا فارق معاها، وجوزها خف وبقا زي الجحش وعمال يرمح يمين وشمال.

الشيخ لطفى: انتوا أحرار، أنا تعبت وعاوز أنام.

عم مختار ضاحكًا: ايه انت اتقمصت يا شيخ؟

الشيخ لطفى: (مختار) أنا مش فايق لهزارك.

عم مختار: ياللا يا (نادر) عشان عندنا مشوار مهم وسيب الشيخ

(لطفى) يكمل قمصته.

- مختار طلع لسانه للشيخ (لطفى) زي العيال الصغيرة.

بجد العلاقة بين الاتنين دول بجد من أجمل وأنقى العلاقات،

صداقة حقيقية مفيش وراها أي غرض، واقفين في شهر بعض علطول

وبرغم اني أصغر منهم إلا إني ساعات كثير بحس إن هم اللي أصغر

مني وزي الأطفال الصغيرة اللي بتعانده بعض.

- خرجنا،

عم (مختار) طلب مني أروح البيت وأقبله بعد المغرب ضروري

قدام بيته عشان يكون راح لبيت (عامر ولواحظ) واتفق معاها على كل

حاجه، أكدت عليه إني بكرة الصبح لازم أكون في القاهرة فمعنديش

وقت، قالي ما تقلقش...

روحت وانا مروح طول الطريق الصراع المعتاد شغال جوايا بين

صوت ضميري المتمثل في الشيخ (لطفى) وحبى لشغلي المتمثل في

شخصية عم (مختار) إللي بسط لي الموضوع تمامًا....

دلوقتي نكمل الخانات الباقية كلها..

مدبولي عايش وزى القطط بسبع أرواح.

مروة تحول كبير ومريب جدًا

ماما الحمد لله كويسه جدًا

أمنية الحمد لله كويسه جدًا

عم مختار لسه بيدور على نفسه المفقودة فيا.

الشيخ لطفي ما زال هو صوت كل حاجة كويسه

خالتي صفية مرت بتجربة صعبة جدًا

كده الخانات كلها قفلتها والمفروض أسافر لكن اتفتح لي باب

جديد، هعرف وراه إيه وبعد كده هسافر علطول..

قعدت في البيت واتغديت مع أمي و(أمنية) ودار بيننا حديث عائلي

بسيط كنت محتاجه ومفتقده جدًا..

ودخلت أوضتي حضرت شنطتي ووربتت هدومي إيلي والدتي

غسلتها و(أمنية) كوتها وطبقتها.

وطلعت بس مجموعة ورق وقلم وجهاز التسجيل عشان هاخدهم

معايا في مشوار (عامر) ولواحظ..

وسبت الشنطة عشان لما أرجع بليل أكون جاهز على السفر

علطول...

- صليت المغرب في البيت واتحركت ناحية بيت عم (مختار)

دوغري، وقفت حوالي عشر دقائق بعدها لاقيته جاي من أول الشارع

قابله قالي:

ماجتش تصلي في الجامع ليه؟ أنا افتكرتك غيرت رأيك!



نادر: لا طبعًا غيرت رأيي إيه، انت رتبت معاهم؟

عم مختار: عيب عليك ده أنا عمك (مختار).

نادر: طيب ممكن أعرف أقنعتهم ازاي.

عم مختار: زي الناس، خلي أسئلتك وشغل التحقيقات ده معاهم

أحسن.

نادر ضاحكًا: حاضر يا قدوتي.

عم مختار: يا سلام عليك يا واد يا (نادر) بتعرف تضحك عليا

بكلامك الحلو ده.

## سيدة القراقيش! أيوه انت قريرت صح، القراقيش مش قريش!!

مشينا حوالي ربع ساعة لحد ما دخلنا منطقة منعزلة شويه على أطراف البلد، تحديداً في شارع مفيهوش غير بتاع أربع بيوت جنب بعض، فوتنا ثلاث بيوت وعم (مختار) خبط على الرابع، فتحت لنا طفلة عندها حوالي 7 سنين بعدها ظهرت ست في الثلاثينات، وقالت: اتفضل يا عم (مختار) وبصت وقالت لي: اتفضل يا مخرج، مش حضرتك المخرج ولا الممثل اللي عم مختار قالنا عليه؟  
اتفضلوا.

اتفضلوا.

بدون ما نعلق دخلنا وراها وهي دخلت جوا ورجعت لنا معاها راجل ماشي بهدوء واضح انه (عامر) ورحب بينا وقعدوا الاتنين.  
عم مختار: (نادر) أهو هيسمع منكم زي ما اتفقنا.  
لواحظ: تحت أمرك يا سي الأستاذ.

نادر: طب أهم حاجة لو مش عاوزين تحكوا محدش غاصبكم على حاجة.



ابتسم (عامر) : وهي (لواحظ) سابت حد في البلد ما حكي تلوش  
إلي حصل.

لواحظ: يوه مش كنت خايقة عليك يا راجل!

ده لولا الشيخ (لطفي) الله يخليه كان زمانا طالعين عليك القرافه .

عامر: كتر ألف خيره شفاني بأمر الله ومخدش أبيض ولا أسود  
وكله بكتاب ربنا.

نادر: تاني بقولك لو مش عاوز تحكي يا (عامر) ماتحكيش.

عامر: يا أستاذ قولتلك هحكي عشان حتى الناس تعرف كرامات عم

الشيخ (لطفي).

مختار: جرى إيه يا (نادر) هو فيلم؟! ما خلاص قالوك إنهم

هيحكوا.

نادر: تمام أنا هشغل جهاز التسجيل واحكوالي.. مين هيبدا؟

لواحظ: أنا هقولك إلي حصل له قدامي وهو يقولك بقا على إلي

شافه.

عامر: هو أنا أقدر أبدا!!! ده انتي لازم تفضلي ترغي للصبح.

لواحظ ضربت بوقها بإيدها: خلاص انكتمت! بلاش أفتح بوقي

اهوه خالص ما انت خفيت وفوقت عليا يا (عامر).





## عامر ولواحظ

للمزيد من الروايات والكتب الحصرية  
انضموا لجزوب ساجو الكتب

sa7eralkutub.com

او زيارة موقعنا



عامر ضحك وقال: لأقولي قولتي.

لوا حظ زي ما تكون ما صدقت:

صلوا ع النبي، (مصطفى خليل) جالنا الساعة 12 بليل قعد هو و(عامر) وخذوا حاجة الشغل وكانوا متفقين مع حسين بتاع المواتير إللي هييجي يروي لنا الأرض، جالهم وشربوا الشاي كلهم وبعدها خد (عامر) كيس القراقيش وبرد شاي والشاي والسكر واتوكلوا على الله...

أنا دخلت بعدها نمت عشان كنت سهرت كده أوي يومها..

مفيش... حطيت راسي يا دوب على المخدة ولسه بشوف أول حلم يا أستاذ، لاقيت صوت رزع عالبااب قومت فزيت من على السرير وجريت فتحت الباب لاقيت (مصطفى) ساند (عامر) ودخل وراه (حسين)، أنا سيبتهم وطلعت الشارع ووقفت أرقع بالصوت!

نادر: سيبتهم؟

لوا حظ: أه عشان الناس تيجي تقف جنبي، أنا ست جدعة وصاحبة واجب مع الكل ولازم أهل البلد كلهم ييجوا..

صحيت الشارع كله والناس جم يجرُوا ودخلوا معايا، لاقينا (عامر) عمال يترعش و(مصطفى) قالي إنه داخ ووقع في الغيط ومفيش حاجة تستاهل كل اللي أنا عملته ده... (عامر) بقا شويه يخرف وشويه يقولي أنا كويس ماتخافوش.

قولتله: اجيبلك تاكل قراقيش يا راجل تاوتك.

قالي: لا مش عاوز آكل؟

الناس مشيت و(مصطفى) و(حسين) مشيوا وكانوا مخضوضين  
اوي هم كمان وانا قعدت جنب (عامر) حسيته سخن، عملت له  
كمادات وأكلته قرقوشتين بالعافية والله وكان كل شويه ينام ويخرف..  
وف مرة وهو بيخرف قال: ابعدها عني..  
ابعدها عني.. ابعدها عني..

الصراحة ظنيته بيتكلم عني قومت زغدته في جنبه وصحيته قولتله:  
هي مين دي اللي يبعدها عنك ياللي تتشك في معاميعك!  
لاقيته تايه ونام تاني..  
نمت انا كمان من التعب..

صحيت على صوته لاقيته قاعد على السرير..  
قولتله: عامل ايه دلوقتي يا (عامر) اجيبلك قرايش؟  
قام مزعق لي وقالي: ايه إللي صحاكي يا وليه!  
عينيه كانت بتطق شرار، أنا الصراحه شدت اللحاف فوق وشي  
وسبته ونمت.

تاني يوم فضل نايم طول النهار، صحيته بالعافية كل قرقوشه ونام!



الساعة تسعة بالليل كنت في المطبخ أنا والبنت (غادة) إللي فتحت لكم الباب، لاقيتها بتقوللي:

يا ماما، بابا عدا من قدام المطبخ وشكله غريب اوي!  
طلعت بسرعة من المطبخ، لقيته نايم زي ما هو في أوضته، زغدت (غادة) وقولتها: بطلي كذب يا بنت ابوكي!  
بس (غادة) فضلت تحلف لي إنه عدا وبص لنا وكمل مشي ناحية الصلاة!

بعدها يبجي بساعة كانت بنتي نامت وأنا كنت قاعدة في الصلاة بطبق الغسيل، ببص لاقيته قاعد على الكرسي وأنا كنت قاعدة في الأرض، والمصحف ما اعرف جه امتي وقعد على الكرسي!!

المهم قولت له: أعملك كوباية شاي وقراقيش؟

رد وقاللي: شربت، هي عملت لي.

قولت له: هي مين يا عامر؟

قال لي: انتي مالك يا وليه انتي!

اتضايقت من طريقة كلامه، فكملت تطبيق الغسيل وقولت له وأنا مدياله ضهري: لما تعوز تتعشى ابقا قوللي.

قال لي: عشا إيه، ما انتي أكلك ما يتاكلش، أنا عندي إللي بتأكلني دلوقتي!

اتلفت وقولت له: قول كده بقا، انت شايف لك شوفه تانية يا راجل!

بس لما اتلفت ملقيتوش! كان لسه صوته في ودني!

وقتها قلبي دق أوي وحسيت بحد لمس ظهري، قومت نطيت من مكاني ودخلت أجري ع الأوضه، لقيت (عامر) في سابع نومه! اترعبت زيادة!

قفلت الباب علينا بالمفتاح واتلفت ناحية السرير ملقتش عامر! قومت راقعة بالصوت، باب الأوضه خبط قولت: مين؟ محدش رد، لقيت إيد بتخرج من تحت السرير، دمي نشف، لاقيت (عامر) بيطلع من تحت السرير!

وقام وقف وعينه بيضا كلها ووشه مليون عروق زرقا وفاتح بوقه وطالع منه صوت زي ما يكون حد بينازع وييموت وفضل يقرب مني لحد ما بقا وشه في وشي.

باب الأوضه رجع خبط تاني و(عامر) اختفى من وشي فجأة، وسمعت بنتي (غادة) بتنادي وبتعيط، فتحت لها الباب، قالت لي: إلحقي يا ماما، بابا واقع في الحمام.

خرجت أجري لاقيت (عامر) واقع في الحمام، جريت عليه وأنا مش عارفه ده (عامر) ولا العفريت، فوقته فضل يعيط وطلب مني اني لازم أجيب الشيخ (لظفي) هو إللي هيقدر يلحقنا...

تاني يوم بعد صلاة الجمعة عملت لعامر كوباية عصير وخطيت له طبق القراقيش، بعدها روجت للشيخ (لظفي) وجه، وعمل اللازم والحمد لله زي ما انت حضرتك شايف (عامر) بقا زي الفل..



نادر: ما هو انا معرفش (عامر) كان عامل إزاي قبل كده.

عامر: كنت كويس الحمد لله ودلوقتي بردو في نعمة الحمد لله.

نادر: طب ممكن تحكي لي يا (عامر) إيه إللي حصل؟

عامر: حاضر.

نادر: استنى هقلب الشريط بس عشان اسجلك لوحدك أطول وقت.

لواحظ: يا عيب الشوم، أنا مقدمتلكوش حاجة، حالاً القراقيش هتكون جاهزة والشاي.

الحاج (مختار) ميل على (عامر) وضحك، وقال له: هي مراتك فاتحه فرن؟

عامر: أنا لما روجت الغيط مع (مصطفى خليل) و(حسين) بتاع ماتور المية، كان ليلتها القمر قمر 14 والسما منورة، ولعنا شوية حطب وخطينا الشاي على الولعة وقام (مصطفى) و(حسين) بتاع الماتور يرتبوا عشان نبتدي ري الأرض، وأنا قولتلهم: الشاي يغلي وهصبه وهستناكم نشرب سوا وهنقوم نروي علطول...

قاموا وقعدت جنب الولعة، وصبيت الشاي وناديت عليهم كذا مرة، سمعت (مصطفى) بيقولي: جاين خلاص..

بعد شويه لقيت (مصطفى) جاي بينادي عليا: يا عامر، يا عامر..

جه لوحده وخذ كوبايته يشربها وقال لي: خد الشاي بتاع (حسين) وديهوله عند راس الغيط، وأنا هعمل زي الناس وهاجي وراك.

خدت الشاي بتاعي وبتاع (حسين) وطلعت عند راس الغيط،  
لاقيت (حسين) بيجهاز الماتور ولاقيت (مصطفى) واقف معاه!  
مصطفى: مالك تنحت كده ليه يا (عامر) شوفت عفريت أو مال!  
عامر: أأأأ

مصطفى ضحك وقال: انت علقت؟ ناولنا الشاي والقراقيش بتاعة  
مراتك اللي قرفانا بها علطول دي ناول.

عامر: الشاي ده مش بتاعك يا مصطفى، ده بتاعي أنا و(حسين).

حسين ضحك وقال: معلش يا (مصطفى) معملش حسابك.

عامر: لأ عملت و(مصطفى) خد كوبايته هناك عند الولعة!

مصطفى: أنا؟! إنت يا جدع انت مش احنا سيبناك بتعملنا الشاي

ومشينا؟!!

عامر: وانت رجعت شربت كوبايتك حتى بالأمانة قولت لي روح

ودي لـ(حسين) كوبايته وأنا جاي وراك.

مصطفى: أنا!

عامر: آه أنت.

حسين: الصراحة يا (عامر) مصطفى ماتحركش من هنا خالص.

عامر: ماتحركش إزاي، بقولك أنا سايبه هناك.

مصطفى: يمين طلاق بالتلاتة ما حصل.

حسين: استرها يا رب.



مصطفى: في إيه؟

حسين: أنا خايف لا تكون النداهة ندهت (عامر)!

عامر: نداهة مين وهباب مين؟

حسين: أنا ياما إشتغلت في الغيطان بالليل وهي دايمًا بتعمل كده.

عامر: بقولك شوفت (مصطفى) تقولي نداهة.. نداهة ايه الذكر

دي؟!!

حسين: ما هي بتتشكل على هيئة أي حاجة وأي بني آدم.

مصطفى: بس الحاجات دي كانت زمان يا (حسين) دلوقتي الطب

اتقدم ومفيش حاجة من الكلام ده.

عامر: طب ايه إللي اتقدم!.. هو يقول نداهة وانت تقولي طب

اتقدم! انتوا مخكوا فوت خلاص.

حسين: (عامر) هسألك سؤال وجاوب عليا بصراحة واوعى

تكذب.

عامر: اسأل.

حسين: انت قبل ما (مصطفى) يجيلك..

مصطفى مقاطعًا: (مصطفى) مين إللي يجيله!!

إن شاء الله تجيلك بلوه تاخذكم انتوا الجوز.

حسين: سيبك منه يا (عامر) قولي بس قبل ما تشوفه سمعته هو أو

أنا أو أي حد بينادي عليك باسمك؟!!

عامر: لأ... آه.

حسين: هو إيه إللي لأ آه؟!!

عامر: (مصطفى) نده عليا.

حسين: كام مرة.

عامر: مش فاكرا، مرتين تقريبا أو مرة، هو انا هعد؟!!

حسين: بيقولوا والله أعلم انه لو ندهت مرتين يبقى تروح بيتك بقا

عشان هتيجي لك بنفسها في الندهه الثالثة.

مصطفى: إيه التخريف ده يا (حسين).

عامر: ممكن نقفل السيرة دي ونروي الأرض؟

وكملنا يا أستاذ (نادر) ونسينا الموضوع وأنا قلبي حاسس أنه

(مصطفى و حسين) كانوا بيحاولوا يخوفوني، (مصطفى) سابنا وراح

يطمن إن الميه ملت الغيط كله، بس اتأخر أوي سبت (حسين) ورجعت

عشان أشوفه اتأخر ليه، وصلت نص الغيط ملقيتوش، ناديت عليه كذا

مرة مفيش له أي أثر، بس لمحت حد قاعد في الأرض على الطين،

قربت منه خوفت لا يكون (مصطفى) داخ ووقع في الأرض..

لما قربت أوي لاقيت إللي قاعد ده مش (مصطفى)، دي واحدة

ست!!

كانت بتعيط وصوتها كان باين، قولت لها: مالك يا ست؟

مردتش عليا بس بطلت عياط، رفعت وشها شوفت قمر زي البدر..



(لواحظ) قاطعته وهي داخلة بالشاي والقرايش: أيوه افضل بقا ارغي في الحتة دي كثير.

نادر: ما تهدي يا ست انت كمان.

لواحظ: أصلك ماتعرفش كل ما يحكي لحد يفضل يتكلم عن حُسن وجمال ودلال الست.

عامر: هتسكتي ولا تطلعي برا.

لواحظ: اتكتمت!

عامر: شكلكا كان مش من البلد، فقولت لها: إنتي مين وبتعيطي ليه؟

بردو بصت لي ومردتش..

نادر: وبعدين؟

عامر: قامت وقفت، أنا استغربت!

نادر: ليه!!

عامر: لما قامت وقفت، فستانها الأبيض مكنش فيه أي أثر للطين إللي كانت قاعدة فيه ومغرق الأرض تحت منها، وبعدين كمان كانت طويلة بزيادة، أنا قولت لها خلاص بقا أنا هستأذن، بصراحة كنت قلقنت منها وعاوز أمشي لا تكون جنية زي ما خوفوني، خدت بعضي ومشيت، سمعتها من ورايا بتغني بأحلى صوت سمعته في حياتي، فكرني بصوت الست (فايزة)..

مختار: (فايزة) مين؟





و(نادر) قال: ملكش حق يا (عامر) والله.

لواحظ: قوله يا أستاذ، دايماً كده ناسي.

نادر: كمل يا عم (عامر).

عامر: كانت لما تغني وتنادي عليا، رجليا تتقل وأقف لحد ما حسيت بها واقفة ورايا، اتلفت لها لقيتها زادت طلتها حلاوة وبقت ست الحُسن والجمال.

مدت لي إيديها فمدت إيدي ومسكت إيدها ومشيت معاها..

لواحظ بغيظ: لأ، اسمها سحبتك وراها زي البهيمة.

عامر: فضلت ماشي وراها زي المسحور وانا ماشي لاحظت انها مابتدوسشي على الأرض، كانت رجليها عالية عن الأرض بشويه ومبتلمسهاش، حاولت أقف أكثر من مرة ماعرفتش، الصراحة كنت مبسوط وبضحك..

لواحظ من تحت ضرسها: ضحكك لك عزرائيل انشالله.

عامر: فضلنا ماشيين، خلصنا الغيط وطلعنا عند (راس الغيط) (نهايته) وكان قريب من (حسين) والماتور إللي شغال، عاوز أقولها استني مش قادر، عينيا في عينيا مش عاوز أبريش عشان أفضل شايفها علطول، حسيت ان عينيا مش ملكي!

لواحظ: مكنتش خدتهم منك وريحتني وريحتك.

عم مختار: خلاص يا (لواحظ).

لواظظ: أصله هيمان أوي المرة دي يا عم الحج عشان الصحافة  
والجرانين، والله دي ولا تعرف تعمل حاجة من اللي بعملهاله، ده  
كفايه القراقيش بتاعتي.

عامر: لقيتها سابت إيدي وبدأت تنزل الترعة وبتشاور لي أنزل  
وراها، الصراحة وقفت خايف أصل الترعة عندنا غويطة ولو وقعت  
مش هعرف اطلع لأنني مبعرفش أعوم، المهم فضلت واقف وهي  
تساور لي أنزل..

قولتلها: لأ مبعرفش أعوم يا جميلة ، أستاذنك أنا بقا، هروح أشوف  
حالي بقا.

اتلفت عشان أمشي، لقيتها واقفة في وشي برا الترعة، اترعبت!  
رجعت بصيت في الترعة، لاقيت المية بتتحرك بسرعة وهي مش  
موجودة،

بس لما بصيت لها تاني بس كانت بقت واحدة تانية خالص، وشها  
أزرق وشعرها أبيض وفستانها اسود وعينيها نازل منها دموع حمرا بقت  
واحدة تخوف جدًا!

وقامت طابقة في زومارة رقابتي!

لواظظ بمنتهى الغل : أحسن أحسن.

عامر: فضلت أصرخ وأناادي على (حسين) بعدها دوخت ووقعت  
في الأرض، فوقت لقيتها منيماني في الأرض وبتشدني من رجليا



ونزلت الترفة وشدتني وراها، قلبتني في الترفة وانا عمال أقول:  
الحقوووووني.

فجأة ظهر (حسين) ومعه فرع شجرة طويل ناولهولي وقالني:  
امسك يا (عامر) امسك.

مسكته وشدني جامد بس هي كانت لسه قافشة في رجليا مش عاوزة  
تسيبني، ظهر (مصطفى) ونزل تحت وقرب مني أد ما قدر وشدني من  
إيديا وانا ماسك ومتبت في فرع الشجرة اللي (حسين) ماسك طرفه  
التاني، أخيراً سابت رجليا وغطت في المية.

مفيش ثواني وانا بخرج، ظهرت تاني والمية بقت تفور من تحتها،  
بصيت ورايا شوفتها بشكل يخوف أكثر، عينيها طالع منها نار مولعة  
وجسمها ووشها بقا لحم اسود متفحم وهي عماله تصرخ بصوت يخرم  
طوبة الودن مش قادر اتحملة!

طلعنا أنا و(مصطفى) من الترفة بسرعة ووقفنا فوق عند (حسين)  
عند طرف الترفة نبص عليها، وهي بتخرج وبتزحف من المية وطالعة  
لنا فوق، قام (حسين) رامي فرع الشجرة وشايل قالب طوب مرمي على  
الأرض وحدها به جه في دماغها بالضبط، صرخت صرخة تصحي  
الميتين ونزلت المية تتلوى زي التعبان بالضبط وغطت ما قبش  
بعدها تاني.

(مصطفى وحسين) سندوني ومشينا بسرعة وسمعناها وانا عماله  
تنادي علينا واحد واحد كل واحد باسمه بصوتها الحنين، بس كانت  
بتنادي عليا انا أكثر منهم!





مستنياك يا (عامر).

متأخرش.

مستنياك.

نادر: طب فاكر حاجة من إللي (لواحظ) حكته؟

عامر: ولا أي حاجة، أنا مش فاكر غير لما الشيخ (لطفي) جه، أول ما دخل البيت، شباك الأوضه اترزع جامد وسمعت صوت في دماغه يقول: مشي الراجل ده أحسنلك.

أول ما الشيخ (لطفي) دخل، لقيتني بقول من غير قصد: إيه إللي جاب الزفت ده هنا؟

- مع ان انا الللي طلبت من (لواحظ) تجيبه!

(لواحظ) بقت تداري على كلامي، بس الشيخ (لطفي) كان بيص لي ويضحك، وكان كل ما يضحك أحس إن جسمي بيغلي.

قعد وقالني: بالذوق كده الللي جوا يخرج، ولسه يقول: "بسم الله الرحمن الرحيم"

حاجة قالت لي: قوم اضرب الراجل ده، انت ازاي ساكت له وهو عمال يتريق عليك وقدام مراتك كمان؟!!

قوم اضربه..

قوم اضربه...

قوم اضربه...





رجعت الجنية تجري في الأوضه من جديد وهي مولعة وتحاول من جديد تقرب من الشيخ (لظفي) ...

- المرة دي وصلت له بطريقه خبيثه، هجمت على (لواظ) ودخلت فيها، لاقت (لواظ) برقت واترمت على الأرض وفضلت تتشنج وبوقها ينزل منه رغاوي بيضا، الشيخ (لظفي) سابني ووطى ع الأرض على (لواظ).. شوفتها في لحظه بتخرج منها ورجعت لورا وجريت بسرعة جدًا وهي مولعة وهجمت على ضهره، المرة دي خبطت فيه، الشيخ (لظفي) وقع على الأرض على وشه!

أول ما وقع النار اللي ماسكه في الجنيه اتطففت، نزلت من على السرير عاوز الحقه، بصت لي بكل غضب وقالت لي:  
بردو اخترته هو؟

ده انا كنت هتحرق عشانك!

سمعت الشيخ (لظفي) وهو تعبان جدًا بيهمس، هي أول ما سمعت همسه ده، العفريته رجعت لورا وجسمها بدأ يدخن وبرقت عينيها ليا على الآخر، وجريت تهجم عليه.  
لقتني بقول:

ربي أعوذ بك من همزات الشياطين، وأعوذ بك ربي أن يحضرون.  
ربي أعوذ بك من همزات الشياطين، وأعوذ بك ربي أن يحضرون.  
الشيخ (لظفي) قام بالعافية وقال:

لا حول ولا قوة إلا بالله العلي العظيم  
ننجو بها من إبليس  
ننجو بها من قبيلته  
ننجو بها من عشيرته  
ننجو بها من شياطينه  
ننجو بها من مردته  
ننجو بها من أعوانه  
ننجو بها من جميع الإنس والجن وشرورهم.

لا حول ولا قوة إلا بالله العلي العظيم  
ننجو بها من إبليس  
ننجو بها من قبيلته  
ننجو بها من عشيرته  
ننجو بها من شياطينه  
ننجو بها من مردته  
ننجو بها من أعوانه  
ننجو بها من جميع الإنس والجن وشرورهم.  
نادر: انت لحقت حفظت كل الدعوات دي؟!!



عامر: لا، أصل الشيخ حفظهالي عشان دي بقت الحرز بتاعي عشان لو الجنية بس فكرت ترجع.

كانت كل ما هي تصرخ أحس اني أقوى واذكر ربنا وأحس إنني مرتاح أكثر، بعدها فضلت تولع و تقصر وتصغر لحد ما اختفت خالص، بعدها حسيت إنني عاوز أنام حالا فنمت من غير حتى ما اتطمئن ع الشيخ (لطفي) أو اشكره، أنا مددت مكاني ونمت.

نادر: وبعدين؟

لوا حظ: الشيخ (لطفي) الله يستره قال لي: خلاص يا بنتي، هيصحى من النوم كويس بأمر الله، اسنديني يا بنتي أخرج.

سندته وخرجت الشارع، رقت بالصوت من غير سبب الصراحه لحد ما جه جدع من الشارع يجري وقولت له:

اسند يا اخويا عمك الشيخ (لطفي) لحد ما توصله البيت عشان هو تعبنا شويه..

وبعدها كل يوم كنت بروح أطمئن عليه لحد لما صحته اتحسننت، (عامر) جه معايا واستسمحه عشان إللي عمله فيه،

بس الشيخ (لطفي) راجل طيب وعارف إن (عامر) مكشش في وعيه وهو بيضربه العلقه اياها.

نادر: عشان كده كان عيان علطول من وقتها.







عامر: أنا أحسن كثير والله، الحمد لله.

عم مختار: خلاص يا (نادر) كده؟

نادر: واتاكدتوا انها النداهة فعلا؟

لواحظ: ودي محتاجة سؤال يعني.... طبعا النداهة يا أستاذ.

عامر: أيوه هي بتعمل كده، تفضل تنادي على الراجل إللي تكون عاوزه تموته، وتسحره فيمشي وراها زي البهيمة إللي مغمين عينيها لحد ما توقعه في الترعة وتموته ولو فلت منها هتسيبه بس عقله بيكون فوت.

لواحظ بسذاجة: زي (عامر) جوزي كده.

عم مختار: كلامهم صح يا بني، هي دي النداهة فعلاً ومن زمان وهي بتطلع للشباب، ودي طريققتها من أيام جدي وجد جدي ما تغيرتش.

- خلصت قعدتنا مع (عامر) و(لواحظ) ومشيت أنا وعمي (مختار) وتبادلنا أطراف الحديث عن كل إللي حصل واتقال، بس المهم إن أنا حصلت على تحقيق جديد للجريدة، مش مترتب له خالص، وكمان أنجزت كل مهامي هنا في البلد، وجه وقت مغادرتي عشان بكرة الصبح هكون في مكان تاني عشان تحقيق جديد ومغامرة جديدة، أضيفها لدفتر مغامراتي في جريدة (عمق الحدث) باب ما وراء الطبيعة..

## نهاية طريقي الزراعي

ودعت الجميع وانطلقت لموقف العربيات عندنا في البلد بصحبة  
عم (مختار) إليلي أصر يوصلني بنفسه  
وسلمت عليه واتحرت العربية...  
وبالليل كنت في شقتي (مملكتي الحبيبة) وبخلص استعداداتي  
لزيارتي بكرة لبيت الطالبات اللي جالي في اخر جواب، طلعت  
الجواب ورجعت قريته تاني بسرعة...

السلام عليكم ورحمة الله

تحياتي لأستاذ (نادر فوده) الصحفي المحترم

معاك (ولاء) طالبة في كلية الهندسة - الفرقة الثالثة، أنا أصلاً من  
البحيرة وكنت من الطالبات إليلي التنسيق ظلمهم، كان حلمي أدخل  
كلية حكومية لكن لما مجموعي ماساعدنيش والدي أصر إنني آجي هنا  
القاهرة وأدرس في جامعة خاصة، وقال: انتي ما قصر تيش، تعليم بلدنا  
هو إليلي عاوز يتغير كله.

أكيد أنا مش بعثالك الجواب عشان نناقش مشاكل التعليم والتنسيق.



كل إللي أقدر أقولك عليه إن سكن الطالبات بتاعنا مسكون!! ده  
من الآخر!

وده مش كلامي لوحدي

ده كلام كل البنات هنا

هستناك تيجي تقابلنا

ده رقم تليفوني

010-----6

كلمني قبل ما تيجي عشان هقابلك الأول بره، وبعدها أبله (عايدة)  
المشرفة هتخليك تدخل المبنى من غير ما حد يعرف من أولياء أمور  
البنات اللي لسه مكملين!

شكرًا.... (ولاء صلاح)

طلعت موبايلي وطلبت رقم (ولاء) إللي بعثت الجواب

صوت بنت: أيوه.

نادر: آنسة (ولاء) معايا؟

صوت البنت: أيوه مين معايا؟

نادر: (نادر فوده) مع حضرتك.

ولاء: بجد؟ بجد والله؟

نادر ضحك وقال: آه والله.

ولاء: ربنا يخليك، ربنا يخليك، كنت فاكرة إنك مش هتهتم.

نادر: لأ يا ستي أنا مهتم، وجاي لك بكرة كمان.

ولاء: بجد؟ بجد والله؟

نادر: إن شاء الله.. أنا بيني وبينك ساعة بالكثير لو الطريق بس

كويس، أنا هبقى جاي من وسط البلد.

ولاء: طيب أنا عندي بكرة سكشن بدري هخلصه وهجيلك وسط

البلد الأول نقعد ندر دش شويه.

نادر: لأ مش للدرجة دي، أنا هجيلك أي كافيه قريب منك.

ولاء: بجد؟ بجد والله؟ تمام ربنا يخليك.

نادر: طب اجيلك على الساعة كام؟

ولاء: (11) كويس؟

نادر: هايل.

ولاء: أيوه والله هايل بجد والله.

نادر: تمام.

ولاء: وأنا هعرف الكل هنا والمشرقة كمان.

نادر: خلاص إن شاء الله معادنا (11) الصبح.... مع السلامه.

ولاء: الله يسلمك... مع ألف سلامه.

- ولاء ماقلتش الخط وسمعتها بتقول: الله الله بقا بجد والله .



كملت تحضير حاجتي، كنت المرة دي واخد بس ورق وأقلام  
وجهاز التسجيل لأنني مش هبات لأن المكان هنا في القاهرة، أي نعم  
في منطقته صحراويه بس قريبه جدًا مني، فلو حتى عوزت يوم كمان  
معاهم هرجع الشقه بالليل أنام وأروح لهم ثاني يوم..

دخلت المطبخ، طلعت طبق كبده قطعتها وجهزت البصل والفلفل  
والتوم وعملت أحلى طبق كبده إسكندراني ومعاه كوباية عصير  
البرتقال المفضله عندي معاها..

قعدت أكل وأحضر نفسي لمشوار بكرة الصبح وأنا في قمة  
حماسي للمغامره الجديده وتساؤلات كثيره عماله تجري ورا بعضها  
جوار رأسي.....

هنروح بعيد ليه؟!  
إن غدا لناظره قريب..



*[Faint, illegible handwritten Arabic text, likely bleed-through from the reverse side of the page]*



## الفصل الثالث

# عمارة الفرع الثانية (بيت الطالبات)

صحيت من النوم كعادتي وأنا مبسوط والأدرينالين عندي بيرقص  
من التشويق، تمام نفس ملامح وحماس تلميذ ابتدائي رايح أول يوم  
مدرسة بعد أجازة بايخه وطويلة...  
راجع يقابل صحابه ومدرسينه وهو مقبل على الحياة المدرسية  
يملؤه حب وحماس لا مثيل له...  
فطار العازب كوباية الشاي والقراقيش الجميلة إللي (لواحظ)  
حلفت عليا اخدها وحلفتني أكلها..



## حنين

قعدة فطاري اللي معاها برجع بشريط الذكريات وقت فطارنا كلنا  
مع بعض زمان مع أبويا الله يرحمه واحنا لابسين أنا و(أمنية) لبس  
المدرسه، أنا بالقميص المربعات الضيقه الأزرق والبنطلون اللي كل  
يوم بلون شكل واللي علطول جايب لي مشاكل مع المدرسه، والساعة  
الكاسيو الرقميه اللي جايه لي من السعوديه والكوتشي الأميغو اللي  
بينور واللي كنت جايه من العيد اللي فات ومالبستوش من وقتها  
عشان اروح به المدرسة واغيط العيال (عمرو ومصطفى وربيح) اللي  
كوتشياتهم كلها فرده بتنور وفرده لأ، و(أمنية) بمريلتها البيج البسيطة  
والشراب الأبيض أبو كرانش اللي كنت دايمًا متضايق بسببه،  
واقول لماما: ليه مفيش شراب بكرانش للصبيان؟  
ترد بجملتها القوية المعتادة: عشان انت راجل.

وريحة قرطاس الطعمية السخن اللي ماما داخله الصبح به مع  
العيش البلدي الطازه، ويتحط الفطار وأنا و(أمنيه) وبابا نقعد نفطر  
وماما بتحضر ساندويتشاتنا المفضله:  
”طعميه + بيض مسلوق مهروس + حنت طماطم صغيرة“  
صغيره يا ماما وإلا هرميالك وربنا..

وفي الخلفية مزيج من صوت كوكب الشرق (أم كلثوم) وهي بتغني  
(يا صباح الخير ياللي معانا) مع (محمد قنديل) وهو بيقول (يا حلو  
صبح يا حلو طل) على شياكة فيروز في (طلعت يا محلى نورها شمس  
الشموسه) اللي أول ما تبدأ لازم أنا و(أمنيه) نيحي عند الحتة بتاعة (لبن  
الجاموسه) ونقلد الراحل (يونس شلبي) في مسرحية (العيال كبرت)..  
بعدها صوت الفنان الجميل (محمد ثروت) وهو بيغني (يارب  
الملك) وصوت الاذاعيه العظيمه (مديحه نجيب) اللي مابنساش  
اسمها أبداً في أبواب السماء ..

ويتسلل بخفة ورشاقة طفولية صوت العبقرية (إيناس جوهر) وهي  
بتقول:

اذاعة الشرق الأوسط من القاهرة.

غمض عينيك وامشي بخفة ودلع

الدنيا هي الشابه وانت الـجدع

تشوف رشاقة خطوتك تعبـدك

لكن انت لو بصيت لرجليك.... تقع

وعجبي!!!

تفاصيل بسيطة يمكن ، بس من غيرها حاجات كثير مبتقاش كامله

ولا حلوه...



ممكن ذكرى بسيطه زي دي تخليني افتكر علطول كل اللي أمي عملتهولي وما زالت بتعمله عشان الحياه يكون لها معنى، ربنا يبارك في عمرك يا أمي ويحسن في عملك وتفضلني دايمًا سبب للابتسامه التلقائيه إللي بتترسم على وشي تلقائي بمجرد التفكير فيكي.. ويقدرني أرد لك بعض من عطفك عليا.

خرجت من البيت الساعه تسعه ونص صباحًا، مشيت شويه في الشارع، استمتعت بنعم ربنا عليا،  
نعمة إني ماشي على رجليا،  
ونعمة إني رايح شغلي،  
ونعمة اني بشتغل حاجة بحبها،  
ونعمة إني الحمد لله في وقت بسيط قدرت يكون اسمي متواجد وبقوه في عالم التحقيقات الصحفيه..

لحد ما قطع الحالة الجميلة اللي أنا فيها دي صوت خناقات الصباح المعتادة بين سواق مكروباص وسواق ملاكي وطقم شتايم صباحي متبادل،

تبعه بعد كده:

أصوات ناس كتيرة متداخلة:

صوت 1: يا جدعان صلوا ع النبي في إيه؟

صوت 2: ما تصلي انت الأول.

صوت 1 ضاحكًا: معلش أنا مسيحي.

صوت 2: كلنا اخوات يا عم.

صوت 1: خلاص يا عم و حياة سيدنا (محمد) والمسيح الحي لا

انت مروق.

صوت 2: يا عم ما هو إللي غلط ونازل يزعق.

صوت 1: فداك انت وهو والحمد لله محصلش حاجة ولا إيه يا

أستاذ؟

صوت 3: آدي راسك يا سيدي أبوسها، أبوس إيدك كمان.

صوت 2: لا العفو يا عم.

كل ده وأنا واقف أراقب مشهد بيتكرر وييمر علينا يوميًا، أي نعم  
مش دايماً النهايه بتكون سعيده، بس لما النهايه بتكون سعيده بتكون  
أجمل وما بنقولش غير الحمد لله على نعمة البساطه بين الخلق .

وآدي نعمة تانيه بضيفها لنعم ربنا عليا، لما أقول الحمد لله ده في

حد ذاته نعمة.

دي حاجه أبويا علمهالي، قالي:

يا بني إتأكد إنك لما تفضل فاكر تشكره على نعمه دي في حد ذاتها

نعمة لأن غيرك الدنيا لاهياه لدرجة إنه غرقان فيها وناسي إن كل الخير

إللي هو فيه سببه ربنا، أنا دايماً يا بني بقول: "اللهم لك الحمد على نعمة

حمدك وشكرك."



من وقتها وأنا كل ما أقول الحمد لله على أي حاجة، أرجع أقول  
بعدها:

يا رب الحمد لله إني دائماً فاكراً أشكرك.  
معلش خدتكم معايا في الحالة دي من التأملات الصباحية إلكي  
قطعها صوت أغنيه بتتسلل لوداني من بعيد وجايه بتكمل الحالة إلكي  
عشتها:

فين تلاقى الضحكة الحلوة

ضحكة جايه من القلب والعين سوا

فين تلاقى العيون السوده

جمالهم غنوه والكلام عنهم حقيقة

على بالي على بالي حبيبي على بالي

على بالي على بالي ابن بلدي على بالي

الأغنية خارجه من تاكسي ماشي بهدوء بيدور على زبون، فشاورت  
له فوطى الصوت وقالي: على فين؟

فقلت له على وجهتي فقالي: اتفضل ربنا يسهل والمحور بس  
يكون سالك.

ركبت ورجع علا الصوت فكانت الأغنية خلصت، وكان في  
مذيعين بيتكلموا عن التفاؤل فازداد اقبالي على اليوم..

نادر: اسم الكريم إيه؟

السواق: (حافظ).

نادر: تمام يا عم (حافظ) وأنا (نادر).

حافظ: وانت بتشتغل ولا لسه تلميذ؟

نادر ضاحكًا: لأ مش تلميذ.

حافظ: أو مال؟

نادر: تقدر تقول صحفي مبتدئ.

حافظ: الله الله، أنا نظرتي ماتخيش، أنا قولت إنك إعلامي.

نادر مبتسمًا: ماشي.

حافظ: سعر الإعلان عن الوفيات بقا كام الیومین دول؟

نادر: یا ساتر! لأ لأ مش بتاعتي دي والجورنال إلی أنا فیة مفیہوش

صفحة وفيات.

حافظ: خسارة.

نادر ضحك: إيه؟ ناوي تقتل حد ولا إيه؟

حافظ ضحك بصوت عالي وقالي: آه حماتي، الوليه طابقة على

نفسنا، جت قال إيه تزورنا ومامشيتش من يومها.

نادر: معلش، اتحملها شويه، هي قاعدة عندك بقالها كام يوم؟

حافظ: 13 سنه.

نادر: نهار اسود.

حافظ: مش بقولك دي وليه كئيبه، بس بحبها بنت اللذینه.

نادر: خلاص اتحملها بقا يا عم.

حافظ: بس انت مقولتليش بتكتب عن إيه؟



نادر: العفارييت.

حافظ: يااااااه.

نادر: إيه بتخاف ولا إيه؟

حافظ: لأ طبعًا، ده أنا (أحمد يونس) مطلعهم على جتتي.

نادر: (أحمد يونس) مين؟

حافظ: مذيع راديو ملبوس ولا متعفرت ما تعرفش.

نادر: وبيتكلم عن العفارييت.

حافظ: ده بيسجل معااااهم.

نادر: يا راجل.

حافظ: انت مش مصدق، اسمع بليل الساعة 12 وانت تشوف.

نادر: ده يبقى مخاوي على كده.

حافظ: انت بتقول فيها، ده لما بيقلب صوته ويطلع الست إللي

تصوت، بترعب بالليل والزباين بتفضل تقولي: حرام عليك اقفل الغم

ده إحنا ناقصين.

نادر: يا راجل.

كنت مندمج جدًا معاه وببص من الإزاز، اتصدمت وزعقت في

السواق:

اقف يا عم (حافظ) اقف.

حافظ: حاضر حاضر، هي العفارييت اشتغلت معاك انت كمان ولا

إيه!

نادر: اقف بس.

فتحت الباب ونزلت اجري، لقيتها ماشيه وشايله كيسين كبار فيهم  
علب وأزايز حاجة ساقعه فاضيه، وصلت لها..

نادر: (جوهر)... خاله (جوهر) إزيك.

جوهر: إزيك يا أستاذ.

نادر: إنتي إيه بقا حكايتك؟

جوهر: حكاية إيه؟

نادر: أنا حاسس إني هلاقيكي في الشقه عندي.

جوهر: ليه يعني؟

نادر: مش غريبه إني ألاقكي في أكثر من مكان وكلهم بعيد عن

بعض كده.

جوهر: يا بني ما انا قولتلك أنا بلف عشان أكل العيش، أنا بلم الأزايز

البلاستيك وبوديتها المصنع وبيدونني يومية عشرين جنيه.

نادر: طيب هديكي العشرين جنيه، وتعالى معايا رايح مشوار مهم.

جوهر: لأ ماجيش وبعدين العشرين جنيه بتوعك دول خليهم لك،

عشان لما هتروح تقابل السنيوره هتدفع فلوس الشاي.

نادر: طيب السنيوره دي عندها إيه؟

جوهر: عزومة.

نادر: مش رايح أتعزم انا!



جوهري: عطلتنى!

نادر: طب فهمينى.

جوهري: روح يا بنى وربك المعين، الموضوع المرة دي مش هياخد منك وقت كثير.

نادر: طب المرة إالى فاتت قولتيلى إن فى حد لما أروح البلد مش هلاقية، وكنت فاكر انها (مروة) بنت خالتي لكنها ظهرت!  
جوهري: (مصطفى).

نادر: والدي..... ما هو ميت.

جوهري: ياللا روح كمل إالى كنت رايح له، شوف وراك إيه.

نادر: تعبتينى يا ست (جوهري).

جوهري: مع السلامة يا (نادر).

ركبت التاكسي وانطلقنا نكمل مشوارنا وفضلنا نتكلم أنا و(حافظ) فى حاجات كثيرة نقتل بها الوقت لحد ما وصلت.

أول ما نزلت اتصلت بـ(ولاء) قالت لي على اسم كافيه هستناها فيه، روجت ومفيش عشر دقائق لاقيت بنت جايه، ووقفت شوية وطلعت الموبايل ورننت عليا، طلعت الموبايل وشاورت لها فقفلت ووجت ناحيتي..





## ولاء

للمزيد من الروايات والكتب الحصرية  
انضموا لجروب ساجر الكتب

sa7eralkutub.com

او زيارة موقعنا



ولاء: (نادر)؟

نادر: أيوه.. إزيك يا (ولاء).

ولاء: بجد.. بجد والله؟ أنا تمام والله مبسوطه بجد إنك جيت.

نادر: ده شغلي يا (ولاء) أو يا بشمهندسه.

ولاء: لأ (ولاء) وخلاص.

نادر: تشربي إيه؟

ولاء: ممكن شاي.

نادر: طيب إيه الحكاية؟

ولاء: مبدئيًا أنا في حاجة كدبت عليك فيها، أنا مش في سنة تالتة

ولا حاجة، أنا لسه في إعدادي هندسة.

نادر: وليه كدبتي؟!

ولاء: خوفت تقول عليا عيله و كدابه و ماتصدقنيش.

نادر: طب وكدبتي في إيه تاني؟

ولاء: خالص والله العظيم.

نادر: طب إيه الحكاية بردو؟

ولاء: بيت الطالبات إللي احنا فيه مسكون، الأول كنت فاكرة إنني

بيتهالي، لكن طلع ان كل البنات شافوا العفريته.

نادر: عفريته؟

ولاء: أيوه، عفريته، وانا متأكدة إن أبله (عايدة) مشرفة البيت شافتها لكنها خايفه تقول.

نادر: وخايفه ليه؟

ولاء: عشان أكل العيش، البيت بقا فاضي، معظم البنات طفشوا مش باقي فيه غير أنا وتلات بنات.

نادر: ليه ماطفشتوش؟

ولاء: أولاً مستنينك، ثانياً فيه إليلي عشان فلوسه مش هتنفع يروح بها مكان تاني لأن هنا لما العدد قل نزلو السعر، ده غير إن معظم بيوت الطالبات مشغولة.

نادر: احكي يا (ولاء) شوفتوا إيه؟

ولاء: أنا هحكيلك عن إليلي شوفته أنا، هم حكايتهم مش هتختلف عني كثير بس يفضل تسمعها منهم برده.

أنا دخلت بيت الطالبات ده قبل الدراسة بأسبوع بالضبط، وكان وقتها فيه (13) بنت غيري، أبله (عايدة) المشرفة قالت لنا:

من فضلكم يوم الأربعاء الجاي الساعة (7) بالليل كله ينزل الاستقبال عشان في حفلة تعارف وعشاء فاخر.

نزلت واتعرفت على معظم البنات بالإضافة لـ (سماح) زميلتي في الأوضه، فقالت أبله (عايدة): كل أربع بالليل هتقابل في نفس الميعاد



نقعد قعدة سريعة نشوف لو أي واحد منكم يا بنات عندها مشكلة  
نحلها لها ونردش مع بعض.

بصراحة كانت فكرة حلوة جدًا اننا نحس اننا في بيت عيلة بجد،  
ولاقت استحسان الجميع...

خلصنا التجمع ده.

وانا طالعة لاقيت 8 بنات واقفين يتها مسوا مع أبله (عايدة) لوحدهم  
بعد ما الكل طلع أوضه وسمعتهم بيقلوا: والله العظيم شوفناها يا أبله.  
وأبله (عايدة) قالت لهم:

بنات، مش عاوزه أسمع التخريف ده تاني.

- طلعت أوضتي أنا و(سماح) وكل واحدة كانت بترتب نفسها  
عشان بكره الخميس معظمنا رايح الكلية يشوف المصاريف  
والإجراءات الخاصة بشؤون الطلبة.

نمت على الساعة (10) بس صحيت على صوت (سماح) بتعيط،  
قومت بسرعة نورت الأبا جورة وبصيت لها، لقيتها قاعده على السرير  
ومبرقه ناحية البلكونه!

ولاء: في إيه (سماح) مالك؟

سماح: البلكونه.

ولاء: مالها؟

سماح: في حد في البلكونه.

ولاء: يا خبر اسود حرامي!

سماح: لأ... عفريته.

ولاء: نعم يا اختي.... إيه العبط إللي بتقوله ده؟!!!

سماح: عفريته كانت جوا الأوضه ومشيت ع الحيطه وطلعت  
البلكونه، وواقفه بتبص لي من برا!!

ولاء: يا (سماح) أنا مش شايفه حاجه.

سماح: بس دي بتبص لنا دلوقتي.

ولاء: (سماح) انتي صاحيه؟!!

سماح: دي معاها سكينه المطبخ بتاعنا يا (ولاء).

ولاء: أنا هقوم أشوف العفريته دي.

واتشجعت وفتحت باب البلكونه!!

وطلعت وقفت برا... (سماح) صرخت...

أنا اتفزعت من صرختها فدخلت أجري..

ولاء: إيه يا بنتي فزعتيني؟ في إيه ما أنا طلعت البلكونه وفاضية

قدامك أهيه!

سماح: إنتي لما طلعتي البلكونه، رفعت السكينه الغرقانه دم وكانت

هتضربك بيها لولا إني صرخت وانتي دخلتي بسرعة.

- من شكل (سماح) أنا بصراحة قلقت وسألتها:

طيب هي لسه في البلكونه يا (سماح)?



سماح: لأ..

ولاء: طب خلاص غارت الحمد لله.

سماح: لأ العفريتة واقفه وراكي دلوقتي!!!!

وقتها يا (نادر) حسيت بتيار هوا وبحرارة شديدة جدًا في ضهري  
فبصيت بسرعة ورايا لكني ما شوفتش حاجة...

فضلنا صاحيين للصبح و(سماح) عماله تحلف إنها مش كدابه،  
خرجت الصبح روحت الكلية والمفروض إن ده أول يوم وأكون  
نشيطة ومبسوطة، لكني للأسف كنت مجهدة جدًا بسبب سهرة الليلة  
اللي فاتت، خلصت الإجراءات وكلمت (سماح) كذا مرة اطمن  
عليها ماردتش عليا خالص، روحت السكن علطول وطلعت الأوضه  
مالقيتهاش، رجعت نزلت لأبله (عايدة) سألتها:

هي (سماح) رجعت من الكلية؟

قالت لي: (سماح) مشيت.

ولاء: مشيت راحت فين؟

عايدة: أخوها الكبير جه أخذها ومشيت.. دي مجنونة سيبك منها.

ولاء: طيب هي ما بتردش على موبايلها ليه؟

أبله (عايدة) بغضب وعصبية: براحتها يا (ولاء) هنعملها ايه يعني!

إنتي الأوضه هتبقى ليكي لو حدك زي ما كنتي عاوزه في الأول لحد

ما واحده تيجي مكان (سماح).

سبت أبله (عايدة) واتصلت تاني ب (سماح) ردت وقالت لي  
بالحرف:

أنا مش مستغنيه عن عمري..

امشي يا (ولاء) انتي كمان..

اهربي..

انفدي بجلدك..

السكن فيه عفريته!

وعلى فكرة مش أنا لو حدي إللي شوفتها!!

ودورك مسيره يبجي وتشوفها!

اهربي يا بنتي، اهربي، تولع الكليه بالسكن باللي فيه!

عدا يومين تلاته وبدأت الدراسه رسمياً وكل واحده انشغلت في

كليتها.

كنت الصبح نازله رايحه الكليه، لاقت أبله (عايدة) في الريسبشن،

وواقف معاها عم (سلطان) الشيف العمومي المسؤول عن أكلنا

وكانت بتقوله: مش عارفه مالهم في إيه.

لما شافتني ابتسمت ابتسامه مصطنعه وصبحت عليا..

وروحت الكلية، وقابلت في نفس اليوم (هبه) من زميلاتي في البيت

كان وشها شاحب جداً، قولتها: مالك يا (هبه) إنتي عيانه ولا إيه؟

هبه: لأ خالص، أنا بس مانتمش كويس امبارح.



بصراحة يا (نادر) جملة (أنا مانمتش امبارح) دي قلبت لي معدتي  
فسألته دوغري:

هبه) انتي شوفتي حاجه؟

هبه: ها؟ حاجة إيه؟

ولاء: العفريته.

هبه: انتي شوفتيها؟!

ولاء: لأ بس (سماح) شافتها ومن بعدها مشيت وسابت السكن.

هبه بتوتر ورعب: أنا لوحدي في الأوضه ومش متحملة إللي  
بيحصل لي ده.

ولاء: طيب تحبي تيجي تقعدني معايا في أوضتي؟

هبه: ممكن بجد؟

ولاء: طبعًا بجد.. بجد والله.

هبه بعصبيه: أنا بقالي (3) أيام بصحى على خبط على باب البلكونه  
وأول ما أصحى الخبط يسكت، لحد امبارح قومت فتحت باب  
البلكونه، لاقيت واحده متعلقه وماسكه في سور البلكونه وبتقولي:  
حرام عليك ماتموتينش.

أنا اتشليت من الصدمه ومعرفتش أعمل إيه، وهي بتبص لي بتوسل.  
لحد ما البنت إيديها فلتت وصرخت ووقعت، جريت على سور  
البلكونه إللي بيطل على الجنينه بصيت تحت ملقتش حاجه، فجأه





قعدت في أرض البلكونه و حطيت وشي بين إيديا ورجليا وفضلت  
اقول يارب واعيط ، حسيت بصوابع على شعري وصوت الفحيح  
بيقرب من ودني أكثر، فضلت أقول يارب يارب يارب ..

لحد ما سكتت....

رفعت وشي بهدوء لقيت كل حاجة اختفت!  
قومت بسرعة دخلت الأوضه وقفلت باب البلكونه واستخيت  
تحت الغطا لحد ما الصبح طلع..

ولاء: كلامك قريب من كلام (سماح) بس هل ده حصل لكم انتوا  
الاتنين بس؟

هبه: معرفش معرفش.

ولاء: خلاص ياللا نروح البيت ونبلي أبله (عايدة) انك هتنقلي  
معايا في الأوضه.

- روحنا يا (نادر) لاقينا زحمه في الريسبشن، لاقينا نفس ال (8)  
بنات من زمايلنا محضرين شنطهم وواقفين بيمضوا على إجراءات  
المغادره!!

وأبله (عايدة) بتحاول تقنعهم ما يمشوش بجمل من نوعية:

- يا بنات اهدوا..

- يا بنات مش هتلاقوا سكن تاني، كله اتسكن.

- احنا أرخص من أي سكن ثاني!

- أنا مش عارفه ازاي متعلمين وبتصدقوا التخريف ده!

- طب أنا ممكن أبدل لكم الأوض؟

أما ردود البنات فكانت:

- لأ، آسفين يا أبله عايده!

- احنا كلمنا حضرتك أكثر من مره وتجاهلتي كلامنا!

- احنا ما بنخرفش، المبنى مسكون بعفريته!

- كلنا شوفناها وكويس جدًا إننا مش هنقول للباقيين.

ماكنتش محتاجه أسألهم لأن الكلام كان شارح نفسه، كلهم كده

شافوا العفريته، خلصوا الإجراءات وأنا و(هبه) واقفين مبلمين...

كنت واقفه مبرقه للمشهد وهم ماشيين، وكل واحده شايلة شنطتها..

واحدة

وراها الثانيه،

الثالثه،

الرابعه

لحد آخر واحده ماشيه ميلت عليا وقالت لي:

أديكي سمعتي...



امشي.....

المكان فيه عفريته...

واسمها كمان (جميلة)...

انفدي بجلدك..

كلامها فضل يتردد في عقلي بصيت لـ (هبة) مالقتهاش، طلعت  
بسرعه فوق لأوضة (هبة) لقيتها خلاص بترتب هدومها عشان تنقل  
معايا..

ولاء: كويس، أنا هقول لأبله (عايدة) إنك هتيجي معايا من دلوقتي  
أوضتي.

هبة: ولا أوضتك ولا أوضتي.

ولاء: يعني إيه؟

هبة: يعني أنا ماشيه، بيتهيا لي مش هنستني يا (ولاء) أكثر من إللي  
سمعناه وشوفناه عشان نغور من المكان ده!!

ولاء: طب يا (هبة) نجرب مش يمكن لما نكون سوا ما يحصلش  
حاجه.

هبة: و(سماح) لما كانت معاكي حصل إيه؟ واللي لسه طفشانين  
دول!

ولاء: يا (هبة) اهدي بس ونجرب.

هبة: أنا آسفه يا (ولاء).. أنا ماشيه.

ومشيت (هبة) وقبلها (تمانيه) ومن قبلهم (سماح)

كده بقوا (عشره) مشيوا من بيت الطالبات!

(عشره) سابوا السكن واحنا أصلاً (14) يعني اتبقى (أربعة) وأنا

منهم..

نادر: ودلوقتي باقي كام؟

ولاء: هم هم (الأربعة).

بعد ما كل كل دول مشيوا، كل واحده قعدت في أوضه لوحدها (ولاء،

دينا، علا، هند)

اتفقنا أي واحده تشوف أي حاجه، تحكي علطول للباقيين..

انا بقا كنت في الحمام باخد دش، الحمام عندنا بيكون ملحق

بالأوضه، لاقيت باب الحمام بيخبط، استغربت إزاي حد دخل لحد

باب الحمام وخبط! فقولت حاضر، لبست هدومي بسرعه وفتحت

الباب ملقتش حد!

بس لاقيت باب الأوضه مفتوح، بصيت برا ملقتش حد! فقلت

الباب من جوا بالمفتاح ودخلت الحمام تاني وبمجرد ما قفلت باب

الحمام، لقيته بيخبط تاني!!

أنا اترعبت، كده معناه إن في حد جوا أوضتي.. وأنا بغبائي قفلت

عليه جوا معايا!



النور ريش وهو بيتر عرش شوفت في مرآة الحمام وش بنت شاحب  
جداً وبتضحك ضحكة مرعبة واختفى بسرعة...  
بعدها النور قطع خالص!

اتحركت ناحية الباب اتخبطت في التويليت، بالمناسبة التويليت  
في الناحية المقابلة للباب، يعني أنا مشيت بالعكس تماماً، لفيت نفسي  
(180) درجه ومشيت في اتجاه الباب بالراحه، بعد أول خطوتين...  
السيفون اتضرب ورايا!!!

اترعبت ووقفت اتر عرش في مكاني، صوت ضرب السيفون كان  
زي صوت مزامير الجحيم بالنسبة لي وقتها، انت متخيل وقتها أنا كنت  
عامله إزاي، اتجمدت في مكاني لا عارفة اتحرك ولا انطق!  
فضلت متخشبه لحد ما صوت السيفون هدي تماماً، استجمعت  
قوتي، مشيت خطوتين سمعت بعدهم صوت حنفية الحوض اتفتحت  
وبعدها صوت الدش اشتغل على الآخر، وبعدها السيفون ضرب من  
جديد!

كل دي أصوات مع بعضها، حطيت إيديا على وداني وغمضت  
عينيا وزعقت...  
كفايه كفايه كفايه..

شيلت إيديا بالراحة لاقيت كل الأصوات سككت، فتحت عينيا  
بالراحة ماشوفتش حاجه لأن كده كده الكهرباء كانت اتقطعت...  
كملت مشي بالراحه المفروض أوصل للباب لقتني بتخبط تاني في  
التويليت!

رجعت تالت لفيت بالراحه ووصلت للباب وبمجرد ما فتحته  
لاقيت هوا سخن جدًا خبطني في وشي، بعده النور جه ورجع يفصل  
وييجي ييجي عشر مرات متتاليه وبسرعه.... وبعدها جه وثبت.

خرجت من الحمام بسرعه عشان أخرج من الأوضه لكنني لمحتها  
في البلكونه، كانت واقفة مبتسمة وشكلها كان بنت عادية جدًا، واقفة  
والهوا بيطير شعرها وفستانها الأبيض في مشهد زي الأفلام، أنا وقفت  
لا عاوزه أروح عندها ولا عاوزه أخرج، أنا واقفة بس عشان المنظر  
شاددني وعاوزه أخوض التجربة اللي البنات حكوا عنها، عاوزه أفهم  
إيه الحكاية...

عدا وقت معرفش أد إيه ولقيتها اتحركت ودخلت الأوضه وقعدت  
على السرير وشدت الغطا عليها بمنتهى الهدوء ونامت!

نادر: نعم! العفريته دخلت نامت عندك؟

ولاء: آه والله ده إلهي حصل، بجد والله...

بس مالحقتش تنام لاقيتها قامت فجأة وجريت جوا الأوضه وبدأ  
وشها يترسم عليه ملامح فزع وذعر فظيع، وجات تجري ناحيتي  
قولتلها: في إيه؟

قوليلي أساعدك إزاي؟



فضلت تجري وبعدها حاجة خفية شالتها و اترمت على السرير  
وقامت من عليه بسرعة، وطلعت تجري للبلكونه ونطت منها!  
طلعت أجري أشوفها لاقيتها فعلاً واقعة في أرض الجنينة وسايحة  
في دمها، دخلت أجري من البلكونه عشان أنزل الحقها... لاقيتها جوا  
الأوضه!!!

بس المرة دي وشها كان كله دم!  
وفستانها متقطع وعنيها سوده كلها!  
وراسها عماله تنزف!

كانت واقفه ونظرات عينيها السودا تشيب!  
اتحركت لقدام ناحيتي، فاتحركت انا بظهري لورا وفضلت تتحرك  
ناحيتي وأنا أرجع بظهري لحد ما لقتني خرجت تاني البلكونه، أدركت  
وقتها إنها عاوزاني أنط انا كمان .

وبصوت عميق جداً ممزوج بهدير مخيف قالت لي:

نطي يا ولاء

نطي يا ولاء

بدل ما أزوقك انا

ياللا نطي يا ولاء

اسمعي كلام جميلة





## عفريته جميلة

للمزيد من الروايات والكتب الحصرية  
انضموا لجروب ساجر الكتب

[sa7eralkutub.com](http://sa7eralkutub.com)

او زيارة موقعنا



واقفت في البلكونه أصرخ أصرخ أصرخ وهي بوشها المبتسم  
الغرقان دم واقفه متجمده!

باب الأوضه افتتح ودخلوا البنات وأبله (عايدة) وهي اختفت!!

اترميت في حضن أبله (عايدة) وقولت لها: العفريته يا أبله (عايدة)  
العفريته كانت هنا وعاوزاني أنط!

البنات حاولوا يهدوني بدموعهم وأبله (عايدة) بردودها الهاديه  
اليائسه اللي بتحاول تهون بها الموقف:

معلش يا حبيبي معلش.

نادر: واتكرر الموضوع؟


ولاء: اتكرر أكثر من مرة مع تشابه السيناريوهات، لكن أنا أفضل  
إنك تسمع من باقي البنات، قوم معايا هنروح السكن وهم مستينك  
وأبله (عايدة) كمان.

نادر: وهدخل عادي؟

ولاء: عادي، السكن مبقاش فيه حد زي ما قولتلك وأبله (عايدة)  
موجوده، وعاملة النظافه والطباخ، وكده كده انت مش هتبات يعني  
عندنا!

تفاصيل





## بيت الطالبات

للمزيد من الروايات والكتب الحصرية  
انضموا لجروب سحر الكتب

sa7eralkutub.com

او زيارة موقعنا



– اتمشينا ووصلنا سكن الطالبات، كان عبارة عن عمارة شيك جدًا بجنيته ، دخلت استقبلتني أستاذة (عايدة) مشرفة السكن اللي البنات بيقولولها يا أبله من باب القرب منها وانها زي أختهم الكبيرة يعني، وباقي البنات عرفتني (ولاء) عليهم (دينا وعلا وهند)

وأستاذة (عايدة) قالت لي ونظراتها بتقولي محتاجك تدعمني:  
أكيد حضرتك هتأكد كلامي إن مفيش حاجه من الكلام إللي بيقولوه ده صح دي مجرد اوهام!

نادر: وكلهم اتفقوا يا مدام (عايدة) على نفس فيلم الأوهام؟  
سمعت صوت من ورايا: وإيه المانع؟  
اتلفت ورايا لاقيت راجل جسمه ضخم نوعًا ما ولا بس أبيض وعلى راسه طاقة الشيفات البيضاء، ففهمت إنه طباخ السكن.

نادر: حضرتك الشيف (سلطان) بقا؟  
سلطان مبتسم: بالضبط كده، بنات اليومين دول متدلعين أوي يا أستاذ ومش مقدرين انهم لما يمشوا احنا العمال بيتخرب بيت أبونا وبنقعد في البيت، عليا الطلاق بالتلاته لو شوفت العفريته دي لا اطبق في زومارة رقابتها، أنا مرتبي نزل للنص بسببها لو كانت فعلاً موجوده!  
نادر: آدينا هنسمع، بس أكيد احنا في الآخر يهمننا مصلحة البنات ومصلحتكم بردو ..

سلطان: طبعًا ودي محتاجة سؤال.

نادر: أنا محتاج أسمع منك بردو.

سلطان: والله ما عندي أي شيء بس بالله عليك من غير أسامي ،

مش ناقص فضايح!

نادر: يا عم (سلطان) أنا صحفي مش وكيل نيابه.

سلطان: فاهم فاهم طبعًا بس بردو عشان ولادي.

نادر بص للبنات وقال: تحت أمركم، نبدأ بمين؟؟

تطوعت (دينا) وقالت أنا هحكملك لأنني آخر واحده شوفت إللي

حصل، احنا لما أدركنا إن العفريته مش مؤذيه.

نادر: إزاي ده!

دينا: عشان كلنا شوفناها وبتجري ورانا آه ، بس آخرها تلتطشنا قلم

تجرجرنا على الأرض

تخربشنا مثلاً..

نادر مستنكرًا كلامها : وكده مش مؤذيه يا آنسه (دينا)؟

دينا اتلخبطت بدون مبرر: أنا، أنا أقصد يعني إنها ماموتتش حد.

نادر مبتسمًا: وجهة نظر بردو.

دينا مكلمة لخبطه: وبصراحه إحنا قاعدين لسبب مهم.

نادر: إللي هو؟؟



دينا: نعرف هي عاوزه إيه... من قرأيتي لتحقيقات حضرتك عمومًا فهمت إن العفاريات بيكون لظهورها سبب أو عندها رساله عاوزه توصلها.

نادر بخبث: وعرفتوا؟ طيب عرفتموا كمان هي عفريته مين؟  
ولاء: قالت لواحد من اللي مشيوا ان اسمها (جميلة) وبعدها قالت لكذا واحده.

نادر موجهها كلامه دينا وقالت لك انت كمان اسم مامتها؟.

دينا بعصبيه: في ايه حضرتك؟!

نادر: طيب يا (دينا)، احكي احكي وما تتعصبيش.

دينا خدت نفس وقالت: كنت نايمه، صحيت على صوت حد بيضرب حد بالقلم، الصوت كان جامد أوي وجنب ودني بالضبط، قومت مخضوضه ورجعت نمت بعدها، القلم اللي بعده أكلته على وشي، قومت من الألم دايله، نورت الأباجوره، لمحت حاجه سودا طويله وسريعه جدًا عمالة تتحرك جوا الأوضه، حاجه زي خيال بتتنقل من ركن للتاني زي لمح البصر..

بعدها الدولاب فضل يتهز ويترج بعنف وسمعت صوت بنت بتضحك طالع من جواه، برغم اتفاقنا إننا مانخفش منها بس أنا اترعبت

لما لمحت الدولاب بيتحرك وبيتقدم ناحية السرير، فضلت أقرأ قرآن بعدها وقف تمامًا وكل حاجة سكتت!

ورجع بسرعه الدولاب لمكانه واتخبط في الحيطه جامد، رجع صوت البنت إللي جوا الدولاب وبدأت تتكلم..  
قالت لي:

أرجوكي خرجيني أنا كنت هنا زيك ... أرجوكي.

وبعدا كلامها اتمزج بعياط، قوت مبدهاش نزلت من على السرير ومشيت بسرعه ووقفت قدام الدولاب، ومسكت مقابض الدولاب وقولت: "بسم الله الرحمن الرحيم" وشديت الضلفتين وفتحتهم على آخرهم وأنا مغمضة عينيا من الخوف وفي انتظار إني اتضرب أو حاجة تاكلني!

ما حصلش حاجة ففتحت عينيا بالراحة مالقيتش أي حاجة فعلاً!  
مديت وشي جوا الدولاب بحذر وحركت هدومي المتعلقة جواه على جنب لا تكون زي الأفلام وراها العفريته ولا حاجة، بس برود مالقيتش حاجه!

اتطمنت وقفلت الدولاب، سمعت صرخه مدويه جايه من فوق، ببص لاقيت العفريته نايمة على الدولاب وراسها نازله ومدلده من



فوق الدولاب وفاتحه بوقها على آخره، وبينزل من بوقها دم ووشها  
وشعرها زي ما يكون عليهم شحم وزيت، المنظر خرسني، فضلت  
أرجع بضهري بالراحه للسريير.

أما هي فنزلت بانسيابه شديد من على الدولاب وزحفت على  
الأرض على إيديها ورجليها ناحيتي، أنا طلعت وقفت على السريير  
وفضلت أتنطط واصرخ:

الحقوني

الحقوني

الحقوني

طلعت لي على السريير، نزلت انا من عليه أجري على باب الأوضه،  
حاولت أفتحه مارضيش يفتح، بصيت لها وقولت لها بجرأة غريبه:  
ريحي نفسك أنا مش هطلع البلكونه.

نادر ساخرا: يا جالامد انت .

دينا: ريحي نفسك أنا مش هطلع البلكونه ومش هنط فروحي انتي  
نطي وماتقر فيناش.

قامت وقفت بهدوء وجسمها اتمط وبقت طويله جدًا، ونظرتها  
بقت كلها غضب وشراسه..

لقتني بتشال وبترفع وبطير ناحية البلكونه، وقتها اترعبت رسمي،  
وهاتك يا صوت ..

وهي كملت زحف وطلعت لي البلكونه، وبمنتهى العنف أنا  
اترميت في أرض البلكونه، دماغني اتخبطت في السور ما حسيش  
بعدها بأي حاجه .. شوفتها وانا بفقد الوعي اتشالت هي كمان وكانت  
بتقاوم وفجأه نطت !

فوقت لقتني في السرير والبنات حواليا، وعرفت منهم إني غبت عن  
الوعي خمس ساعات، وإني كنت كل شويه أقوم أصرخ وأرجع أنام  
وإنهم جابوا لي دكتور اداني حقنة منومه هي السبب في إني نمت كل  
الوقت ده وقال اني محتاجه أرتاح لأنني مضغوطة نفسيًا...

البنات كانوا عاوزين يودوني مستشفى ولكن انا رفضت تمامًا،  
وكمان أبله (عايدة) خافت الموضوع يكبر فجابت هي الدكتور للسكن!

بعدها بقيت أشغل قرآن وأنا نايمه بس ماشوفتهاش ثاني!

هي بتعدي علينا واحده واحده لغرض عندها ولما بتيجي لواحدة  
فينا نادر لما بترجع ثاني، حتى لو رجعت مابتقاش بالشكل الصريح  
ده!

ممكن في حلم مثلاً، أو تظهر وتمشي علطول....

دي يا أستاذ (نادر) الحكاية بتاعتي كلها... ولو اني حاسه انك مش

مصدقني.



نادر بخبث: أنا فتحت بوقى!

نادر: المهم أنا كده شايف إن الكل شاف نفس الشخصيه وديننا  
الوحيد اللي كلمتها بقوه كده .

ولاء: لأ إلا (هند).

نادر: اشمعنى؟

ولاء: (هند) شافت (جميلة) العفريته لكنها شافت حاجه ثانيه  
كمان.

نادر: طب إحكي لي يا (هند) إنتي.

## المسوخ

هند: بس أنا مش هحكى عن (جميلة) لأنى شوفتها في مشهد قريب من إللي إتحكالك وانتهى بردو نفس النهاية بمحاولة زقي من البلكونه لكن هحكيلك عن أبو عين واحدة!  
نادر: وده إيه ده كمان؟

هند: رجعت في يوم من الكلية مقتولة من التعب، دخلت اتطمنت على (دينا) وكنت مستنيه أشوف العفريته، ما هو أكيد الدور عليا أو علي (علا) وأنا حاسه إن الدور عليا شغلت الراديو علي إذاعة القرآن الكريم، واترमित على السرير بهدومي ونمت، صحيت فجأه لما القرآن خلص وكان شغال برنامج اسمه (طلائع الإيمان) صوت أطفال بتنشد فقومت قعدت وكان قلبي عمال يدق بسرعة، بس سمعت صوت جوا الأوضه بينشد مع الأطفال صوته كان صغير زيهم بس مكانش خارج من الراديو، بصيت حواليا فشوفته فعلاً!

كان حاجة قصيرة وتخينه وله عين واحدة في نص وشه، كان في طول طفل عنده (3) سنين مثلاً وشعره اسود وقصير لكن وشه كان ممسوح مفيهوش غير العين إللي في النص دي وتحتها بوق مدور...



انكشيت على السرير وهو واقف بيغني ...

بعدها بدأت بشرته تتكرمش، ولونها يخضر لحد ما بقا وشه عامل  
زي الضفدعة وأنا بترعش وبعيط وساكتة!

حاولت أقرأ آية الكرسي، تلعثمت ولساني ثقل ونسيت كل الآية ...  
فضل شكله يبقى أبشع أكثر وجسمه بيتخن أكثر.

فتح بوقه وماغناش المرة دي لكنه خرج منه صوت مبحوح تخين  
وقالي بمنتهى الوضوح:

اطلقي سراح أمي!!!!!! يا هنتننند

طفل من ضيوف الحلقة في الراديو بدأ يقرأ القرآن لقيت المسخ  
ده بص وراه عند البلكونه، بصيت أنا كمان لاقيت (جميلة) واقفة في  
البلكونه بتبص لي، بنت في منتهى الجمال بنفس الأوصاف إلهي البنات  
حكوها قبل كده!

اتجرات وقولتلها: فهمينا احنا مش فاهمين حاجه، فهمينا عشان  
نعرف نساعدك!

ماردتش عليا!

نزلت من على السرير بسرعه عشان أروح لها، لكن المسخ كان  
اتحرك قبلي وطالع لها، ببص لقيت له ديل طويل بيتلوى وراه زي  
الحيه!

اتلفت وراه ولمحني طالعة البلكونه، في ثانية كل المشهد اتحول!

المسخ صرخ بصوت غليظ لا يطاق وجسمه كله اسود وبقا ضخم  
جدًا في لحظات والشعر ملا جسمه كله، وبقيت أنا قدامه زي النملة!  
وضربني بديله ضربه طيرتني لزقتني في الحيطه، ماقدرتش أقوم من  
قوة الخبطه، ففضلت مرميه في ركن من الأوضه وبصيت عليهم!  
لقيتها طبطبت على راسه فرجع صغر وأخذته من إيده ونطوا من  
البلكونه!!!!

تحاملت على الألم وطلعت من الأوضه ونزلت الريسبشن لقيت  
أبله (عايدة) واقفه، أول ما شافتني جريت عليا، ونزل البنات وحكيت  
لهم إللي حصل..

وبعد ما خلصت كلنا بصينا لـ (علا) إللي قالت بيأس: كده خلاص  
الدور عليا.

فردت وقتها ولأء: وليه ما يكونش أبله (عايدة) هو لازم الطالبات  
بس؟!

فقالت دينا: وليه مش عاملة النضافه وليه مش عم (سلطان) ولا هو  
إحنا الللي مكتوب علينا الغم بس؟!

نادر: صحيح أستاذة (عايدة) حضرتك ماشوفتيش أي حاجه؟

أبله عايدة: لأ والله يا أستاذ (نادر).

نادر: والطباخ قال ما شافش هو كمان ، طيب عاملة النضافة فين؟

أبله عايدة: سافرت لولادها الصبح وراجعته أول الأسبوع وعلى

فكره بردو ما شافتش أي حاجه.



نادر: وحبكت تسافر دلوقتي!  
أبله عايده: أجازتها يا أستاذ (نادر) ماقدرتش أقولها خليكى معانا،  
في صحفي عاوز يقعد معاكي شويه!  
نادر: كده باقى (علا).  
علا: أنا بقا ماشوفتش أي حاجة.  
نادر: ده إزاي بقااااا؟  
علا: زي ما بقولك كده، أنا بقالي يومين مستنيه ومجاتش، بس ما  
تقلقش إديني يوم ولا اتنين كمان وهقولك.  
نادر: أعتقد أنها فعلاً هاتجيلك.  
أبله عايده: تهيئات والله.  
نادر: كل ده وتهيئات! ده انتي فاضل الحيطان عندك تتكلم وتقولك  
شوفنا العفريته!  
ده انتي مش باقى حيلتك غير اربعة!  
ولاء: وهيمشوا الأربعة يا (نادر).  
أبله عايده: (ولااااااا!!)  
ولاء: هو إيه إللي (ولاااااا) احنا كنا مستنيين (نادر) عشان نحكي  
له، وبعدها كلنا كده كده هنمشي، وخلي بقا المبنى ينور بـ (جميلة)  
وتهيئاتنا.  
أبله عايده: انتي كده بتقطي عيشي أنا و(سلطان) و(عيشه)!  
ولاء: لأ ما تحسببهاش كده يا أبله (عايدة) من فضلك.  
نادر: أنا هخرج شويه وهرجع تاني، بعد إذنكم.

خرجت برا، قعدت في نفس الكافية اللي قابلت فيه ولاء أول ما وصلت النهادره!

أنا حاسس زي ما اكون كنت هنا من أسبوع، مش من مجرد كام ساعه!

قعدت أفكر وأجمع في خيوط التحقيق، على فكرة أنا سهل جدًا أكتفي بكده وأمشي، أنا معايا كده موضوع هايل عن بيت طالبات مسكون، ومعايا شهادات طالبات شافوا العفريته، وكلهم هربوا وطبيعي البيت ده هيتقفل في الآخر بسبب العفاريت.. يعني موضوع رعب محترم متكامل الأركان لباب ما وراء الطبيعة، لكن أنا زي ما قولتلكم في أول ورقه من الكتاب ده، إني اتشدت لسكه تانيه خالص ولقتني بتقمص شخصية المحقق (نادر فوده) بالاضافه ل (نادر فوده) الصحفي بجريدة (عمق الحدث) باب ما وراء الطبيعة! الناقل للأحداث فقط!

اتصلت بـ (ولاء)

نادر: (ولاء) أنا محتاج منك خدمة ضروري.

ولاء: اتفضل.

نادر: عاوز رقم بتاعة النضافة.

ولاء: مين؟ دادة عيشه! بس دي غلبانه وماشافتش حاجة.

نادر: معلش ريحيني!!

أخذت بالفعل رقم (عيشه) واتصلت بيها.



## اعترافات دادة عيشه

ما عرفش الفكرة دي جت لي ازاي ولا من فيلم ايه بس لقتني بعملها:

نادر: ألو انتي الست (عيشه)؟

عيشه: أيوه يا بني مين معايا؟

نادر: أنا العقيد (نادر فوده) من جنایات الجيزة.

(عيشه) اترعبت وقالت: خير يا باشا، أنا ماعملتش حاجة!

نادر: لأ عملتي ولو ماعترفتيش حالاً أنا هحولك لحبل المشنقة.

- كنت بقول أي كلام مستغل طيبتها وبساطتها الواضحة في طريقة كلامها ونبرة صوتها.

الست اتفزعت بعد جملة حبل المشنقة..

عيشه: ليه يا ابني ده أنا وليه غلبانة بربي يتامى وعمري ما أذيت أي حد.

نادر: انتي هستعبطي يا متهمة؟

عيشه بدأت تتوتر جداً: والله يا باشا أنا غلبانة.

نادر: إنتي هتقولي الحقيقة ولا أبعت لك البوكس ياخذك حالاً من بيتكم؟

عيشه: لأ.. لأ هقول هقول كل حاجة.

نادر: أيوه انطقي إيه حكاية إللي اسمها (جميلة)؟

عيشه: دي كانت طالبة في السكن عندنا و بنت مؤدبة و يتيمة الأم، كانت عايشه في السكن طول الدراسة و كمان طول الأجازة و مابتزلش أجازات خالص.

نادر: وده ليه يا متهمة؟

عيشه: أمها ميتة و مرات أبوها كانت وحشه، فكانت قاعده هنا علطول و أبوها بيعت الفلوس كل شهر و لا فارق معاه غيابها.

نادر: وبعدين؟

عيشه: ما عرفش!

نادر: نعم، هو ايه اللي ما تعرفيش؟!

عيشه: خايفة أتكلم.

نادر: انت شكلك لازم تتشقي النهارده العشا.

عيشه مذعورة: هقول هقول كل إللي حصل.

عيشه: في يوم لقيت (جميلة) قاعده تحت بتعيط لوحدها فسألته:

ليه بتعيطي؟



قالت لي: عشان الأجازة هتبدأ، البنات كلهم بيفرحوا إن الأجازة بتقرب إلا أنا.

نادر متقمص دور وكيل النيابة: طبعًا طبعًا عشان مش عاوزة تروح لمرات أبوها.

عيشه: لأ يا باشا، ما هي كده كده هي مش هتسافر.

نادر: يبقى زعلانه عشان زمايلها في السكن هيمشوا؟

عيشه: لأ بردك، انا كمان كنت فاهمه كده بس (جميلة) مكانتش بتحب تقعد مع حد في السكن.

قعدت جنبها وقولت لها: مالك يا بنتي؟

فضلت تعيط، طبطبت عليها، جسمها اتنفض، حسيت إنها بتتوجع يا بني، مديت إيدي تاني وكشفت كتفها، سابتني أعمل كده، اتخضيت يا باشا، كتفها كان زي فيه مكان زي الحروق.

نادر: حروق!

عيشه: آه حروق أو ضرب.

نادر: ضرب و حروق؟!!

عيشه: أنا جايلك في الكلام أهوه، سألتها إيه إيلي عمل فيكي كده؟

مرة واتنين وهي خايفة ومش عاوزة تقول..

لحد ما شكيت أنه اللهم احفظنا العفاريت هم إللي عملوا فيها كده،  
سابتني وطلعت أوضتها وأنا مش عارفه أعمل لها إيه!

تاني يوم وهي بتفطر لوحدها روجت لها، سابتني وسابت الأكل  
وطلعت أوضتها،

سهيت أبله (عايدة) وطلعت لها الأوضه، أول ما دخلت لاقيت  
الأوضه متبهدة وأنا لسه مرتبها امبارح وريحتها زي ما يكون كان  
فيها حريقه من شويه، الصراحه انا زعقت فيها وقولت لها:  
حرام عليك يا (جميلة) تعلمي كده في الأوضه.

زعقت لي وقالت لي:

أنا هرتبها لنفسي، إطلعي برا ياللا.

وزقتني جامد وخرجتني وقفلت الباب ورايا، نزلت تحت أكلم  
نفسي، قابلتني أبله (عايدة) وزعقت لي هي كمان..

وقالت لي: كنت فين بنادي عليك من الصبح؟

حكيت لها إللي حصل وإن (جميلة) مبهدة أوضتها..

قالت لي: طب ملكيش دعوة بها تاني وأنا هتصرف، لو صاحب

السكن عرف إنك بتكلمي معاها هيطردك وهيطردني!

عيشه: ليه يا أبله؟

عايدة: لأن ده شغلي أنا.



عدا يوم والثاني و (جميلة) بطلت تنزل خالص، لحد ما في ليله  
صحيت على صوت خناقه وزعيق عالي برا بين أبله (عايدة) و حد ثاني،  
خرجت أجري ملقتش أيوها حد عرفت إني كنت بحلم.

رجعت دخلت أوضتي مفيش نص ساعه سمعت صوت صرخة  
جايه، من فوق ومفيش غير (جميلة) إللي موجوده، طلعت أجري لما  
قربت من أوضتها كان بابها متوارب، سمعت صوتها عماله تقول:  
لأ لأ الرحمة!

بعدها سمعت صوت يخوف زي ما يكون فيه أسد جوا عندها في  
الأوضه!

والباب اترزع، قلبي وقع في رجليا، ونزلت أجري لاقيت أبله  
(عايدة) طالعة تجري على السلم، قولتلها: الحقي (جميلة) يا أبله فيه  
اللهم احفظنا عندها في الأوضه.

صرخت وقالت لي: في ايه؟

انزلي يا عيشه انت تحت، وطلعت تجري وكان وشها مخطوف...  
بعدها بشويه نزلت وقالت لي: البنت دي بكرة ولا بعده هتمشي، أنا  
مش ناقصة بلاوي وشغل مجانيين!

ثاني يوم الصبح اتسحبت وطلعت الأوضه من خوفا على (جميلة)  
المره دي فتحت لي واترمت في حضني وقالت لي: أنا هموت يا داده  
(عيشه).

حاولت أفهم منها بردك مقاتلش حاجة، لكن المرة دي كان الضرب على جسمها أكثر، سيبتها يا باشا وأنا مش عارفه أتصرف ازاي، بس وأنا خارجة لمحت حاجة على الأرض، شيلتها بسرعة من غير ما (جميلة) تاخذ بالها وخرجت وأنا مش عارفه ازاي ده حصل..

نادر: حاجة إيه؟

عيشه: سبحة.

نادر: سبحة!

عيشه: آه سبحة.

نادر: وايه المشكلة في كده، وشيلتها ليه؟!

عيشه: أصلها سبحة بتاعة بتاعة بتاعة.....

نادر: بتاعة سلطان الطباخ؟

عيشه: إيه؟ عرفت إزاي؟

نادر: هو صح؟

عيشه: أيوه هو.

نادر: أنا من الأول مش مرتاح له، بس ماكانش عندي أي حاجة

ضده غير جملة قالتها لي جوهر:

”امشي ودور ورا اللقمة“

عيشه: جوهر مين يا باشا؟



نادر: كملي يا (عيشه) كملي.

عيشه: نزلت ومعايا السبحة على أبله (عايدة).

نادر: أكبر غلطة.

عيشه: يعني إيه؟

نادر: عايدة عارفه كل حاجة.

عيشه: ما انا فهمت ده متأخر يا باشا، (عايدة) هددتني وقالت لي:

هيموتوني لو نطقت.

قولتلها: حرام عليكى لما تكونى عارفه انه بيطلع يعتدي علي

المسكينة عشان يتيمة وسايباه.

نادر: وبعدين؟

عيشه: طلبت كذا مرة أمشي وخصوصًا بعد ما حصل كذا حاجة،

في مرة طلعت لاقيت (جميلة) عماله ترجع وتعبانة أوي فخوفت يكون

حصل اللي في بالي، ملحقتش اخاف لأنها ختمت بموت الغلبانة!

نادر: ازاي بقاده حصل؟

عيشه: استنى هكملك كل حاجة، كنت نايمة لاقيت حد يفتح عليا

باب أوضتي، قومت قعدت مالقتش حد، قومت فتحت الباب بصيت

برامفيش حد.. قفلته ودخلت، لقيت (سلطان) الطباخ قاعد على

الكرسي بيضحك، وشكله ناوي على الشر.

قاللي: مالكيش دعوة بـ (جميلة) لو طلعتي عندها تاني هدفنك في  
جنيئة السكن حية!

زعقت فيه: البت حبله يا سلطان!

سلطان برق وقال لي: ايه؟ ايه التخريف ده يا وليه؟

عيشه: تخريف؟ منك لله ربنا يتقم منك!

من بعدها خوفت وقولت مليش دعوة وبطلت اطلع لـ (جميلة)  
خالص..

عدى يوم، سمعت أبله (عايدة) عماله بتصوت وبتقول: يا لهوي يا  
لهوي، روحنا في داهية، منك لله منك لله!

بعدها (سلطان) نزل ضرب في أبله (عايدة) وأنا فضلت قاعده في  
أوضتي وماخر جتتش، ومن يومها (جميلة) اختفت..  
سألت أبله (عايدة) عنها كذا مرة قالت لي أنها لمت هدومها  
وغارت!

طلعت أوضتها من وراهم لاقيت هدومها مش موجودة ولاقيت  
جواب على التسريحة..

نادر: مكتوب فيه ايه؟!

عيشه: ما أنا مبعر فش أقرأ.

نادر: يوووه.



عيشه: ما تقلقش يا باشا، أنا خدته و خليت حد من برا السكن  
يقراهولي.

نادر: الله عليكى يا دادة عيشه يا حلوة انتي.

عيشه بلهفة: مبسوط مني يا باشا؟

نادر رجع لشخصية وكيل النيابة والضابط والقاضي: مش أوي  
كلمي يا متهمة، كلمي!

عيشه: كانت كاتبة في الجواب إنها زهقت من السكن وإللي فيه  
ومن مرات أبوها ولازم تطفش وانه ما حدش يدور عليها نهائي..  
نادر: وبعدين؟

عيشه: الللي أنا عرفته بعدها ان هي طفشت، آه يا باشا بس بعدها  
موتت نفسها!

نادر: عرفتي إزاي؟

عيشة: ما هي ظهرت لي عفريتتها ومعنى إن عفريتتها ظهرت يبقى  
موتت نفسها، يومها كنت بغسل في بدروم السكن بالليل في المغسلة  
الكبيرة، سمعت صوت طالع من الغسالة زي ما تكون حاجة اتكسرت  
فيها، طفيت الغسالة وفتحتها وطلعت الهدوم، لاقت هدوم تانية غير  
إللي أنا كنت حطاها فيها، كانت هدوم (جميلة) أنا عارفاها كويس  
(الهدوم كانت كلها غرقانه دم)...

بعدها سمعت صوت رجلين نازله على السلم للبدروم، بصيت  
لاقيتها هي اللي نازلة.

نادر: هي مين؟

عيشه: (جميلة) كانت ماشية تتطوح زي ما تكون دايخة، وشها كان  
اسود وعينيها منورين أبيض وفاتحه بوقها على الآخر، فضلت أصرخ  
وأصوت ما حدش سمعني!

وصلت لي (جميلة) وفضلت تقرب مني وطببت عليا عشان  
تطمني، بقيت اقولها: انت جراك ايه يا جميلة؟ شكلك عامل كده ليه؟  
مسكتني من راسي ونزلت خبط براسي في الغسالة وعماله تصرخ  
وتقول:

ليه؟؟

ليه؟؟

ليه؟؟

- الدنيا لفت بيا ودوخت، (جميلة) وطت جرجرتني من على  
الأرض من الطرحه بتاعتي، اتخنقت ودوخت أكثر، وفتحت باب  
المغسلة وشالتني ورمتني جواها!

عيشه: بالله عليكى لأ، بالله عليكى لأ يا بنتي، أبوس رجلكى يا  
(جميلة) عندي عيال يتامى عاوزه اربيهم ما لهمش غيري في الدنيا..





فضلت تاني يوم نايمه اترعش كل ما افكر اللي حصل لي  
وما حكيتش لحد أي حاجة، على بالليل أبله (عايدة) بعطني الفرن  
أجيب رغيفين فينو نتعشى بيهم أنا وهي، وأنا راجعه لاقيت عفريته  
(جميلة) واقفة لي في آخر الشارع، لفيت وطلعت أجري الناحية الثانية،  
لاقيتها واقفة الناحية الثانية وجايه تجري تجري بسرعة أوي، مالحقتش  
أجري أو أتحرك!

لما وصلت لي كانت راسها غرقانة دم وفتحت بوقها ع الآخر  
وقالت لي:

الشیطان الأخرس يا عيشه!

الشیطان الأخرس يا عيشه!

ورجعت بضرها بسرعة لأول الشارع واختفت!

مشيت اترعش في الشارع واتسند على الحيطان عشان أرجع  
السكن، لما وصلت لاقيت الزبال بياخد أكياس الزباله وماشي بس  
لمحت من الكيس الأسود المقطوع حاجة أنا عارفها كويس!

جريت وراه وشديته منه..

شديت كيس الزباله الكبير منه وفتحته، لاقيته مليان هدوم (جميلة)!

الراجل زعقلي وشتمني وشال الهدوم ومشى.



ببصر لا قيت ورايا (سلطان) الطباخ وأبله (عايدة) ورايا، شدوني  
 دخلوني جوا السكن، (سلطان) ربطني في رجل السرير يوم كامل..  
 وقال لي: لو دورتي تاني في موضوع (جميلة) هموت لك عيالك  
 واحد ورا التاني!

عيشه: أقسم بالله ما هدور ولا ليا دعوة تاني بس سيوني أمشي بالله  
 عليكو عشان ما تطلعليش وارجع لعيالي.  
 سلطان: تطلعلك ايه انت هستعبطي يا وليه!

هتمشي بس مش دلوقتي يا (عيشه) ولو جرتي تمشي من نفسك  
 هجيلكم بلدكم وأموت لك عيالك قدامك.

وفضلت في الغم ده علطول لحد ما السنة الجديده ابتدت و(جميلة)  
 بطلت تجيلي وبقث تطلع للبنات..

- من كام يوم (ولاء) قالت لي إن في واحد جاي يسمع منا كلنا اللي  
 حصل، بعدها مفيش بساعة لقيت أبله (عايدة) جايه تقولي:

خلاص امشي مش عاوزينك تاني!

أنا ما صدقت، خدت الهدمتين بتوعي ونفدت بجلدي، والله يا باشا  
 هو ده كل اللي حصل!

بس ما كنتش أعرف إنه هيبقى فيه سين وجيم والله يا باشا!

والمصحف ده كل إلهي حصل وأنا معرفش أكثر من إن (سلطان)  
 كان بيعتدي على المسكينة (جميلة) وأبله (عايدة) كانت عارفه وساكتة

وسايباه مستفرد بالغلبانه مش عارفه ليه، و(جميلة) طفشت بعد ما حصل اللي حصل وسابت جواب وبعدها لما خافت من الفضيحة انتحرت!

نادر: بس؟

عيشه: ما عرفش يا باشا! مش حضرتك اللي بتعرفوا كل حاجه؟

نادر: الجواب إللي (جميلة) سابت له لسه معاكي؟

عيشه: لأ... هتلاقيه في الصاله تحت في البوفيه، أول درج على اليمين، هم شايلينه عشان لو حد سأل على (جميلة) تاني يطلعوه هوله.

نادر: شكراً يا ست (عيشه).

عيشه: هتعدموني يا باشا؟!

نادر: لو حكيتي المكالمه دي لأي حد هشنقك قدام ولادك!

عيشه: والله ما هجيب سيره.

نادر: مع السلامة ياللا يا (عيشه).


المكالمة قفلت ساعة كامله و(حاتم) أكيد هيقتلني عشان الفاتوره،

لكن المهم ان خلاص كده الخيوط كلها شبه اتربطت ببعضها،

وتاني دور المحقق (نادر فوده) غلب على الصحفي وحاسس إني

مسؤول عن فضح جريمة كبيرة جداً حصلت في المكان ده.





## سلطان الطباخ

للمزيد من الروايات والكتب الحصرية  
انضموا لـجروب ساحة الكتب

sa7eralkutub.com

او زيارة موقعنا



أخذت بعضي ورجعت السكن،  
قابلت أبله (عايدة) - كانت لوحدها - سألتها عن البنات قالت لي  
مشيوا كلهم زي ما حضرتك شوفت..  
قولتلها: انتي ملكيش ذنب، هم أحرار.  
عايدة مبتسمة بتوتر: آه طبعًا أحرار.  
نادر: هو حضرتك كتبتني تقرير عن هروب (جميلة)؟  
عايدة: أيوه طبعًا وبعته للمالك ولأسرتها!  
نادر: طيب ممكن أشوفه؟  
عايدة: للأسف مش موجود لأنه زي ما بقولك سلمته لجهتين.  
نادر بطيبه مصطنعه: خلاص بقا! أنا كان كل هدفي إني أحميكي من  
قلبة الدنيا عليكي.  
عايدة: يعني إيه؟  
نادر: ما هو لما أنشر أكيد الشرطه هتفتح تحقيق ومن الواضح انك  
ما بلغتيش الشرطه عن اختفائها ورجلك كده انتي اللي هتتجر.  
عايدة: تحقيق! ورجلينا تتجر ليه احنا مالنا!  
نادر ضحك بخبث: انتو مين، أنا بقول رجلك انتي ما جمعتش أي  
رجول تانيه معاكي!  
عايدة وشها قلب ميت لون!  
نادر: وبعدين ما هو انتي مسؤولة يا أبله (عايدة) عن كل بنت  
موجوده في المكان، بس لما أنشر التقرير، هبرأ ساحتك من بدري،



واحتمال كمان الشرطة ما تفتحش تحقيق لأن انتي عملتي اللي عليكي  
وهي بنت قليلة الأدب وطفشت، مش هي كانت قليلة الأدب بردو؟  
عايدة بحذر: الحقيقة لأ، اه اه أنا عندي نسخة من التقرير ده، لسه  
فاكراها حالاً.

نادر: هايل، مش ضروري الأصل يا أستاذة (عايدة).  
عايدة: ثانية واحدة هجيبه لحضرتك.

- ودخلت (عايدة) جوا وخرجت معاها التقرير، أخذته منها وفتحته  
أقراه، كان فعلاً عن إن الطالبة (جميلة) مشيت بدون سابق إنذار وانها  
هددت أكثر من مره بالهرب، وإنها بتعاني من اضطرابات نفسيه بسبب  
سوء أحوالها الأسريه..

وختاماً نود أن نحيطكم علماً أن المكان وصاحبه فلان الفلاني  
ومشرفته والعاملين فيه غير مسؤولين عن الطالبة ابتداءً من تاريخ  
هروبها الموافق كذا...

إلى من يهمه الأمر..

مقدمه لكم: عايدة يونس  
المشرف العام على السكن

نادر: كده إنتي في السليم.

عايدة: بجد والله؟

نادر: آه طبعاً... هو انتي عملتي حاجة تقلقي منها؟!!!

عايدة متلخبطة: أنا؟ لأ خالص.

نادر: خلاص هي اختارت تهرب بمزاجها، بس انتي مش معايا إن اللي بيهرب ما بيطلعش له عفريت يطارد الناس.

عايدة: ها؟

نادر: عفاريت اللي ماتوا بس اللي بتطلع.

عايدة: تقصد إيه؟

نادر: مش ممكن تكون انتحرت؟

عايدة: مخبولة وممكن تعملها.

نادر: ممكن أشرب كوباية شاي؟

عايدة: حاضر، أنا هعمله لحضرتك بنفسي عشان سلطان برا.

دخلت (عايدة) تعمل الشاي، وأنا روحت على البوفيه وفتحت أول

درج ولقيت فعلاً الجواب بصيت عليه بسرعه ورجعته مكانه،

رجعت (عايدة) ومعها الشاي.

نادر: أستاذة (عايدة) احنا كل كلامنا ده جميل جداً بس بردو

مياكدش إنها هي اللي قررت تهرب!

عايدة: طب نعمل ايه تاني؟

نادر: يعني مثلاً لو فيه مكانه متسجله بتقول فيها لحد إنها ماشيه،

رسالة مبعوثة مثلاً من تليفونها.

عايدة بدون تفكير: جواب ، فيه جواب .

نادر: نعم؟

عايدة: جواب هي كتبه بتقول فيه انها هتمشي، مش ده يعتبر دليل؟

نادر: طبعا... برافو عليكى هاتيه فوراً.



انطلقت (عايدة) وفتحت درج البوفيه، وطلعت الجواب وجات تجري: أهوه يا أستاذ (نادر).

خدت منها الجواب فتحته وقريته، كان مضمونه فعلاً نفس الكلام: إنها زهقت من عيلتها ومن الكل ومش عاوزه تتعامل مع أي حد ثاني وهتمشي من السكن.

نادر: هايل هايل يا أبله (عايدة).

عايدة: ربنا يسامحها كانت عامله مشاكل وهي موجوده ومشاكلها مكمله حتى بعد ما ماتت أأأأ.

نادر مقاطعاً: قصدك بعد ما هربت انا فاهم فاهم! بس يا أستاذ (عايدة) ماخذتيش بالك من حاجه؟

عايدة: حاجة إيه؟

نادر: إن خط (جميلة) تقريباً نسخه طبق الأصل من خطك!!!

## اعترافات مشرفة السكن

- عايدة.. وشها قلب 180 درجة وقالت: إيه؟

نادر: هو إيه إللي إيه؟ إنتي اللي كتبتى الجواب بخط ايدك يا (عايدة).

عايدة: لأ والله، لأ والله العظيم مش خطي.

نادر: انتي مابتشوفيش ولا إيه؟

عايدة: وريني كده.

نادر: أوريكي إيه؟ انتي نسيتي إنتي كاتبه إيه!

عايدة: لأ.

نادر: أنا بلغت فيكي قبل ما آجي وهو ديكي في 60 داهية (عيشه)

حكيت كل حاجة في النيابة.

عايدة انهارت: نيابة؟؟ مش خطي أقسم بالله مش خطي.

نادر: لأ خطك.

عايدة: بقولك مش خطي ده..... ده.....

ده خط (سلطان).

نادر مبتسمًا: وايه كمان؟

نادر: تعالي بقا معايا نطلع بره واحكي لي كل حاجة عشان (سلطان)

مايعرفش إنك حكيتي.



عايدة: هو مش هنا، بس هيعرف.. هيعرف ومش هيرحمني ولا هيرحمك.

نادر: خلاص بقا منك للنيابة!

عايدة: هقول.. هقول.. أنا مليش دعوة.

نادر: لأ اقولك أنا، هو اغتصبها وانتي كنتي بتسهلي له الطريق عشان انتي بني آدمة قدرة.

عايدة: اغتصب إيه بس!!

عايدة: (سلطان) مخاوي جن والجن طلب منه (جميلة) لأنها عاجباه.

نادر: عاجبه (سلطان).

عايدة: لأ الجن!

نادر: إيه التخريف ده؟!

عايدة: لأ مش تخريف، أنا حضرت جلسة وشوفت الجن، أقسم بالله شوفت الجن، وهو بيطلب منه يسخر له (جميلة).

## الترياق

الموضوع إن (سلطان) من بلد بعيدة في وجه قبلي ولما جه يشتغل ولا كان بيعرف يطبخ ولا بتاع ولما قولتله مش هتنفع قالي أنا مش لاقى آكل .. فصعب عليا فساعدته ووقفت جنبه لحد ما اتعلم كل حاجة، بس خير تعمل شر تلقى!

لاقيته بعد مدة مركز اوي مع (جميلة) وكان بيتكلم كثير معاها، أنا افكرته معجب بها اتخانقت وحذرته أكثر من مرة وقولت هبلغ صاحب السكن لو ما اتلمتش يا (سلطان) فيها لا أخفيها!

وفي مرة دخلت أوضته وهو مش موجود، مش فاكرة ليه، اترعبت من المنظر اللي شوفته، لقيت صورة (جميلة) في الأرض وحواليها علامات وكتابات غريبة وشمع مطفي، كمان لقيت اسمها مكتوب على ورق صغير كثير جدًا ومرمي في كل أركان الأوضه، وكل ورقه مكتوب فيها (الزوجة جميلة) وجنبها بصمة صباع لونها أحمر!

وفي الأرض أربع أطباق فيهم دم أو حاجة زييه، أول واحد منهم محطوط فيه خصلة شعر طويلة..



والتاني: منديل محلاوي من بتوع زمان مكتوب عليه اسم (جميلة)  
بالشحم ومتغطس في الدم..

والتالت: بلوزة حريمي غرقانة في الدم..

والرابع: صور كتيرة جدًا لجميلة غرقانة في الدم ده ومتخرم عينيها  
وعليهم قفل مقفول.

وقتها فهمت إن (سلطان) بتاع سحر وأعمال، سمعت صوت من  
ورايا بيقولي: مش أي أعمال يا (عايدة) أعمال سفلية.

ببص لقيت (سلطان) واقف ورايا!

جريت أخرج، الباب اترزع لوحده واتفقل..

عايدة: طلعتني من هنا يا سلطان بقولك أهوه.

سلطان: خلاص مابقاش ينفع، انتي عرفتي.

بعدها نور الأوضه ضلم والشمع اللي كان متطفي في الأرض ولع

لوحده واحده ورا الثانية وأنا واقفة أترعش مكاني!

(سلطان) اخشن صوته وبقا يخوف وقال:

بحق ماردا الأرض

بحق المنشق من جنة الخلد

بقوة شهورش

ببطش زيران

بفزعة عايشه قندشيه

الظهور..

الآن

في الساعة

في التو

العجل العجل

اللحظة اللحظة

قولي ورايا يا (عايدة) والاهتتحرقني حالاً، انطقي:

لقيتني لساني بيكرر الكلام وراه غصب عني:

بحق مارد الأرض بحق المنشق من جنة الخلد

بقوة شهورش

ببطش زيران

بفزعة عايشه قندشيه

الظهور..

الآن

في الساعة

في التو



العجل العجل

اللحظة اللحظة

الشمع نوره علي ووصل للسقف، الحيطه اتشقت وشوفت واحد  
مش باين له ملامح، طويل أوي خرج منها ويدخل وسط دايرة الشمع  
وداس على صورة (جميلة) برجله المكرمشة جدًا وفيها حوافر  
حيوانات، لما نور الشمع العالي انعكس على وشه شوفت الشيطان  
بذات نفسه، وشه مسحوب وطويل، لونه اسود، لسانه طويل اسود  
ومشقوق زي لسان التعابين، عينيه صفرا مشقوقة بالطول!

سلطان: مولاي (عايدة) انضممت للمريدين، هتساعدنا، ولها  
المكافأه منك يا مولاي..

لقيت صوت خلى شعر راسي يقف:

(عايدة) أريد (جميلاً)....

خادمه....

زوجه....

جاريه....

خليله....

وإلا فلها الموت وعليك غضبي.

صوته وشكله الرهيب وذعري خلوني من غير تفكير قولتله: حاضر

حاضر.

بعدها مشي و(سلطان) نور الأوضه وقالى:

خلاص بقيتي معايا في مركب واحد، لو مساعدتنيش مش  
هيرحمك، أنا بلف الأماكن اللي زي بيتكم ده واللي هو بيختارها لي  
عشان اجيب له منها الخليله!

وصدقيني لو اتمنعتي هتشوفي جهنم بعنيكي!

عايدة: أعمل إيه؟

سلطان: لازم (جميلة) تشرب من ترياق دم سيدنا عشان تتسخر له؟  
وجاب كوبايه فيها سائل اسود..

عايدة: ودي هحطهاها في الأكل أو العصير؟

سلطان: للأسف مش هينفع، كان ممكن سهل انا أعمل ده ما هو  
شغلي، لازم تشربه لوحده كامل بدون أي إضافات!

عايدة: وده إزاي هيحصل؟

سلطان: هتقنعها إن ده ترياق للاكتئاب إلكي عندها.

نادر: وشربت؟!

عايدة: حاولت أقنعها أكثر من مرة ولكن مفيش فايده، افكرتها  
مخدرات الغيبه، بعدها (سلطان) قاللي إنه هيدخل لها معايا .

وقولتها: اللي متعرفيهوش يا (جميلة) إن (سلطان) مش طباخ بس  
ده معالج روحاني.



ودخل معايا ووراها حاجات بمساعدة الجن.. مره والتانيه بدأت  
تقتنع، آخر مرة كنا معاها وكانت العلاقه بينا طيبة جدًا أول لما قولنا لها  
تشرّب الترياق..

ردت: هستخير ربنا الأول.

بمجرد ما قالت الجملة دي، الأوضه زي ما يكون حرب قامت  
فيها!!

كل حاجة اتقلبت وبقّت بتتكسر لوحدها وشوفت (جميلة) بتتشال  
من على الأرض وتتهبد في الحيطه..

سلطان شاور لي، خرجنا وسبناها.

## كشف المستور

تاني يوم رجعنا لها تاني، رفضت بر دو واتكررت نفس العلقه ليها  
تاني.. بس أسوأ، أنا ما كنتش شايفه مين اللي بيضربها لكن تبريقه  
عينها وعوجة لسانها حسسوني انها هتموت قريب اوي، وبقت تتبهدل  
وهدمها اتقطعت!

وصرخت: ارحمني ابوس إيدك.

و(سلطان) مفيش في قلبه رحمة، كنت بقول له:

يا (سلطان) هو هيعمل فيها ايه؟ شوف واحدة غيرها، أكيد هتلاقي

اللي توافق.

آخر مرة دخلنا عندها، كانت لابسه اسود وقالت لـ (سلطان) انها  
هتبغ فينا الشرطه، (سلطان) بدون مقدمات طلع سكينه المطبخ  
وهدها إنه هيدبحها لو ما شربتش الترياق.

قالت له: واشربه ليه ما خلاص!

أنا هوديكم في داهية يا دجال انت وهي.

(جميلة) شدت السكينه منه وعورته بها، نزل عليها ضرب وكتفها

وقاللي: اسقيها الترياق بالعافية ياللا يا (عايدة).. سيدنا غاضب منا  
جدًا!



لما بصيت في عينيها ماقدرتش .

قولتله : لأ!

(جميلة) فلتت من إيده وطلعت تجري على البلكونه وقالت: لو  
قربتوا مني هنط!

جري (سلطان) وراها زي المجنون وقال لها انه هو اللي هيرميها  
وشالها وخط إيده على بوقها وعشان احنا في حطة مقطوعة والوقت  
متأخر محدش شاف ولا حس بحاجة، فضلت (جميلة) تعافر لحد ما  
وقعت!! مسكت في سور البلكونه، حاول يمسكها بس فلتت من إيديه  
ووقعت من البلكونه، وما حطتش منطق!

نادر: يا وقعتكم السودا! وبعدين؟

عايدة: نزلنا نجري لاقينها سايحة في دمها ولسه فيها النفس،  
سلطان حفر في الجنينة ودفنها وكانت لسه مامتش!

كان بيرمي عليها التراب وهي بتتوجع وبتقول الحقيني يا ماما، ما  
تسيبنيش يا ماما!

نادر: دفتوها صاحيه يا ملاعين!؟

عايدة انفجرت في العياط: أنا مجرمة مجرمة، فضلت ساكتة عشان  
(سلطان) بقا كل يوم يهددني بعيالي، أنا كل يوم بنام بحس اني رايحه  
جهنم حدف من خوفي من انتقام ربنا..

اديك عرفت كل حاجة، روح بلغ وانا هسلم نفسي يمكن ارتاح!  
أنا عايشه في صراع بين تأنيب ضميري وخوفي على عيالي وبين الجن  
إللي (سلطان) مسلطه عليا بيطلع لي كل يومين أو ثلاثة وأنا نايمه عشان  
بس مجرؤش أفتح بوقي ده غير شبح (جميلة).



## جميلة



نادر: (جميلة)!!

عايدة: اياك تكون فاكر انها ما بتظهر ليش أنا كمان!

(جميلة) إذا كانت بتظهر لهم تجري وراهم، فأنا بتظهر لي وبتدني بالحيا كل يوم ألف مرة، أنا بفكر أنتحر كل دقيقة عشان أخلص من اللي أنا فيه.

هحكيلك على موقف من ضمن مواقف كثيرة عيشتها، في مرة جالي تليفون من ابني (صالح) بيقولي: يا ماما وحشتيني عاوز أشوفك.

لسه برد عليه، صوته اخشن وتخن جدًا وقال لي:

هحرق قلبك عليه.. هحرق قلبك عليه.

اكشفي المستور يا (عايدة)....

بلغني..

بعدها صوت (صالح) رجع وسمعته بيزعق... والصوت المرعب

اختفى..

صالح زعق: ماما القطة السوداء دي رخمة بجد.

عايدة: قطة ايه؟!

صالح: لو كنت سألتيني من الأول قبل ما تبعيتها كنت هقولك

عاوزها لون جار فيلد، مش بحب الاسود.

عايدة: قطة ايه، أنا ما بعش قطط!

صالح: إزاي يا ماما، دي هنا من شهر وجت في بوكس مكتوب عليه:

كل سنة وانت طيب يا (صالح)... ماما.

عايدة: ماما!!

صالح: يا ماما، ده انا ما صدقت تسليني وأنا قاعد لوحدي مع تيته وانت عارفه ان سمعها تقيل أوي ومش بتتكلم معايا خالص.

- ما حبتش أخوفه.. وقولت يمكن حد غيري باعتها له هديه أو هو اشتراها وخايف أزعق له!

بعدها بيومين الساعة (٢) بليل لقيته بيتصل بيا وبيهمس في التليفون!  
صالح: ماما (طأطأ) بيتكلم!!

عايدة: (طأطأ) مين؟

صالح: (همس غير واضح)..

عايدة: يا بني علي صوتك، أنا مش فاهمة حاجه.

صالح: بقولك (طأطأ) بيتكلم ومش هينفع أعلي صوتي عشان ما يزعش.

عايدة: هو مين ده؟

صالح: (طأطأ) يا ماما.



عايدة: (طأطأ) مين يا (صالح)؟

صالح: القط العجيب بتاعي يا ماما.

عايدة: نعم، انت متصل بيا يا (صالح) دلوقتي عشان تقولي القطه بتتكلم!

صالح: والله العظيم يا ماما بيتكلم!

عايدة: حرام يا حبيبي تكذب ربنا يزعل منك!

صالح بانفعال: يا ماما أنا مش بكذب، أنا كنت قاعد في الصاله بتفرج على التلفزيون، سمعت حد بينادي عليا، مشيت ورا الصوت لقيت الصوت جاي من الحمام، دخلت مالقتش غير (طأطأ) لسه جاي أخرج، فجأه طأطأ زعق وقالني:

هو انا مش بنادي عليك،

انت ما بتردش عليا لبيبييه!!؟

طلعت يا ماما أجري من الحمام، روجت الصاله وهو جه ورايا ومسك بضوافره في البنطلون وانا فضلت أعيط واجري وهو ماسك فيا، اتكعبلت في السجاده ووقعت على شهري وطأطأ طلع على بطني ووقف على صدري وغرس ضوافره فيا، عينيه كانت منوره أحمر، وبوقه كبر أوي وشعره هایش وديله بيتحرك بسرعة اوي، وقالني:

ادخل الأوضه كلم (عايدة) قولها (طأطأ) بيسلم عليك وبيقولك صالح تحت إيدينا.

سلام بقا يا ماما عشان طأطأ بينادي عليا!!

على الفجر يا أستاذ (نادر) سافرت روحت البيت، لما وصلت كان (صالح) نايم وماما كانت صاحيه قاعده في سريرها كعادتها بتقرا عدد قديم من مجلة (روز اليوسف) كنت جايبها هولها من زمان، بس عشان ذاكرتها بقت ضعيفه مع تقدم العمر، ماما كانت بتقراها وكأنها بتقراها لأول مره.

المهم انها كانت الحمد لله كويسه بس قالت لي:

يا (عايدة) أنا بشوف كوايس وحشه اوي من وقت ما بعتي لنا القطة السوده دي، رجعيها يا بنتي ولا بدليها بقطه تانيه عشان (صالح) متعلق بها أوي.

أنا كل ما أدخل الحمام ألاقها تطلع لي فجأة جوامع إني ببقى متأكدة انها مش جوا قبل ما أدخل، مش عارفه بتبقى مستخبية فين، بترعب منها وبعدين دي ما بتاكلش غير لحمة وفراخ نية وهتسعر كده! خرجت من أوضة ماما ودورت على القطة المشؤومة، لاقيتها قاعده جنب التليفزيون، قطة سودا تمامًا، عينيها صفراء، نظراتها ثابتة مرعبة وحادة جدًا، صمتها وهدوءها مخيف جدًا!

كانت بتبص لي كأنها بني آدم، أنا خوفت منها بجد!







سبيتها ودخلت صحيت (صالح) اللي احتفل حببي بأنه شافني  
 وطلب مني اننا نفطر مع بعض، وانه نفسه ياكل ساندويتش (صالح)  
 العجيب اللي أنا كنت بعمله له دايمًا، فطرت معاه هو وأمي، وأقنعتة  
 بالعافيه بمساعدة ماما اني هاخذ القطة اطعمها عشان ما تتعشب  
 وهرجعها له خلال يومين تلاتة، وأنا بشيلها عشان احطها في الصندوق،  
 كانت سخنة بشكل مبالغ فيه وكانت بتطلع صوت عامل زي صوت  
 واحدة ست بتعيط!

حطيتها في الصندوق بتاعها وخرجت، ركبت تاكسي وبعدت بها  
 عن البيت تمامًا، طول ما احنا في العربية وهي عماله تنونو بصوت  
 تخين.

نزلت في شارع بعيد وطلبت من السواق يستناني، وفتحت الصندوق  
 وسبيتها قدام مطعم عشان اضمن انها تلاقي أكل، القطة فضلت واقفة  
 تبص لي بنفس النظرات الثابتة المريبة، وما بتتحركش خالص، أخذت  
 الصندوق الفاضي وركبت التاكسي، ببص عليها برا من الشباك والعربية  
 بتتحرك مالقيتهاش قولى: الحمد لله غارت!

السواق ابتسم وقالى شكلك مرتبطة بها اوي أو حد من أولادك!  
 قولى له وانا تايهة: آه.

وسرحت في اللي انا فيه واللي مرى به من وقت ما شاركت في  
 الجريمة دي وفوقت على صوت نونوة قطة! اتخشبت مكاني!



وقولت لا انا بيتها لي، وبصيت ورايا برعب على الكنبه اللي ورا،  
لاقيت القطة قاعده جوا الصندوق!  
صرخت في السواق: اقف اقف... بقولك اقف!

فتحت الباب ونزلت شيلت الصندوق بها رميته في الشارع ورجعت  
ركبت وانا عماله ابص ورايا، نظرات السواق ليا معناها اني واحده  
مجنونة!  
- ورجعت السكن هنا ثاني.

أول ما دخلت لقيت (سلطان) واقف مبتسم وقال لي: اتطمتي على  
صالح؟ والست الوالدة؟ وطأطأ!!!  
مع إني ماكتتش قولت له وتعمدت أخرج بدري واجي علطول!

وعلى ده الحال، كل يوم تهديدات من (سلطان) ولو حتى بلغة  
العيون، أما (جميلة) فمش رحماني، كل يومين تعمل فيا حاجة.  
آخرها صحيت من يومين، لاقيتها طيارة فوق السرير فوقي بالضبط!  
كانت فاتحة بوقها ولسانها طالع برا وطويل أوي ولونه أبيض زي  
ما يكون مدهون دهان أبيض، وشعرها بيتطاير ببطء وهدوء مخيف! أما  
عينها فكانت عباره عن كتلتين من ضوء أبيض شديد!  
أنا اتشليت في مكاني وهي طيارة فوقي بالشكل ده!

اتحركت بصعوبة شديده عشان أحاول انزل من على السرير  
بالراحه، فجأة (جميلة) فضلت تلف بسرعة وهي طايره في الهواء، ومع  
دورانها السرير ارتفع حاجة بسيطة عن الأرض ولف هو كمان بسرعة  
رهيبه زيها!

أنا فضلت ماسكه في السرير علشان ماقعش من عليه، أما (جميلة)  
فبطلت دوران فجأه بردو ومعها السرير وقف عن الدوران هو كمان،  
وانا دايخة وفاقدة توازني!

(جميلة) بهدوء شديد وقفت في الهواء وشاورت عليا، السرير اترفع  
أكثر من على الأرض وطلع بيا للبلكونه، كنت كل ما احاول أصرخ  
ألاقي بوقي بيخرج منه كور شعر كثير سودا تخليني مش قادره أتنفس،  
السرير طار بهدوء وطلع من البلكونه واتعلق في الهواء فوق الجنيهه كأن  
مفيس جاذبية للأرض!

عفريته (جميلة) كانت واقفه في البلكونه تتفرج عليا ومبتسمه.  
وبصرخة مدوية منها فجأة السرير نزل بمنتهى العنف ووقع بيا،  
بقيت امسك في مرتبة السرير وهو بيقع، بيقع، بيقع!!

لكنه مايبوصلش للأرض أبدًا!  
مستنيه خبطته في الأرض بين أي لحظة والثانية، لكن مفيس خبطة،  
السرير زي ما يكون وقع بيا في بير عميق جدًا مالوش قاع!



بعدها السرير رجع اتعلق ووقف بيا تاني في الهواء،  
وطيت وميلت بالراحة أبص تحت أشوف الأرض فين،  
لقيت في وشي (جميلة) متعلقة في السرير من تحت بالمقلوب!  
أول ما شافتني اتحركت وطلعت زحف بسرعه على السرير - على  
ايديها ورجليها - وزقتني برجلها بعنف وقعتني من على السرير!  
لما وقعتني من على السرير، لقيتني بقع في اتجاه حفرة جاهزة  
في الجنيينة، لكنها حفرة مليانة نار بركان منصهر وخارج منها أصوات  
عذاب لناس بيتحرقوا وبينصهروا جواها!  
فضلت أنزل أنزل أنزل!!

ويادوب قبل ما جسمي يوصل لقيتني بتشد من شعري!  
كانت هي (جميلة) اللي شدتني وطلعت بيا فوق رمتني على السرير  
وطار بيا تاني واترزع في البلكونه بمنتهى العنف، فقدت الوعي بعدها!  
صحيت لقتني نائمة على السرير، والسرير لسه زي ما هو في  
البلكونه!

فاتأكدت ان كل ده حصل وماكانش كابوس!

بس كان فيه حاجة شوفتها لازم تعرفها!

نادر: حاجة ايه؟

عايدة: لما طلعت لي لاحظت ان بطنها كانت كبيرة.

نادر: بمعنى؟

عايدة: والله أعلم (جميلة) كانت حامل، لما روحنا لها وكانت

لابسه اسود، كان معنى كلامها كده!

تقريبًا لما معرفناش نقنعها الغول أ...أ...أ...

نادر: معقول؟

عايدة: ماعرفش بس فاكر بنت من البنات وهي بتحكي لك قالت لك انه كان في غول صغير ظهر مع (جميلة)؟  
نادر: اه.

عايدة: مش يمكن ده ابنها!

نادر: ولنفرض انه حصل. هي لحقت تخلف!

عايدة: معرفش بقا هو انا كلامي ممكن يكون غلط بردو.  
هو الصراحة ماظهر ليش لكن هي بهدلتنى، وخذ من ده كثير يا أستاذ (نادر).

بلغ يا أستاذ (نادر)..

بلغ فينا..

جثة (جميلة) هتلاقوها تحت حوض الصبار الموجود في الجنية.  
وإذا كان (سلطان) سامعنا دلوقتي وده أكيد فانت لازم تهرب!  
لأنه مش هيسيبك!

وإذا ماكانش فأرجوك بردو امشي وانفد بجلدك زي الباقيين.  
بالله عليك بلغ وخلصني من العذاب إلهي أنا عايشه فيه، وابني ربنا  
مش هينساها!



# المكالمة القتالة

## (العاصفة الأخيرة - عاصفة الموت)

موبايل (عايدة) رن و(نادر وعايدة) واقفين.

ردت: أيوه يا (صالح) يا حبيبي، الو، مش سامعه صوتك في صوت  
خروشه جامد، استنى هفتح الاسبيكر.

صالح بيعيط: أيوة يا ماما.

عايدة: مالك يا حبيبي، بتعيط ليه؟

صالح: (طأطأ) بيخوفني يا ماما؟

عايدة صرخت: طأطأ!!! هو رجع امتي وازاي؟!!

صالح: رجع منين يا ماما؟

عايدة: لما أخذته معايا لما جيت آخر مرة!

صالح: رجع في نفس اليوم يا ماما.

عايدة: وانت ما قولتليش ليه؟

صالح: أقول ايه يا ماما؟ ما انت أخذتبه طعمتبه ورجعتيه تاني!

عايدة: أنا؟!!!!





صالح: (طأطأ) زعلان مني عشان هو طلب مني أخرج معاه أروح البيت عنده اتعرف على عيلته كلها وانا قولت له لازم استأذن حضرتك الأول.

عايدة: لأ اوعى يا (صالح) انا مش موافقه يا حبيبي، روح صحي جدتك وخليها ترمي القط ده في الشارع حالاً.  
صالح: (طأطأ) خرج حالاً من الأوضة.

- عايدة بصوت يملاه اليأس: أنا هجيلكم حالاً يا صالح، ما تروحش أي مكان معاه، وانا هروح معاك ومع (طأطأ) لما آجي.. اتفقنا يا حبيبي؟

صالح: اتفقنا.  
استني كده يا ماما في صوت في الصاله، أنا هطلع الصالة اشوف فيه ايه؟ خليك معايا!

- فضلنا أنا و(عايدة) مستنين (صالح) يقول لنا في ايه في الصاله!  
لكننا سمعناه بيكلم حد بيقول له:  
إيه ده عمو (سلطان)؟

حضرتك دخلت هنا ازاي؟!  
(صوت غير مفهوم)..

صالح: اه بحب حضرتك زي بابا طبعا بس مش هينفع أخرج مع (طأطأ) من غير ما استأذن ماما.

صوت (صالح) فجأة تحول لصوت مرعوب بيرتجف من الفرع..

صالح:

ايه ده يا عمو سلطان؟

(طأطأ) بيعمل كده ليه!؟

يا ماما الحقيني...

ده عفريت...

ده مش (طأطأ)..

(طأطأ) بيحصل له كده ليه!؟

لا يا (طأطأ) خليك صغير متكبرش كده، أنا خايف منك!!!

سيب تيته يا عمو (سلطان) ما تضربهاش حرام عليك، دي عجوزه!

اضر بني انا راجل زيك!

عايدة صرخت: أمي!!

صوت ست عجوزه بتتوسل: ليه يا (سلطان) يا بني كده؟

ده انا قد أمك، حرام عليك يا بني!

أعوذ بالله ايه ده؟

بالله عليك سيبي يا بني اموت في فرشتي.

صالح: لا يا (طأطأ) انت بقيت عفريت وحش ابعدهنا!

ما تشيلش تيته يا (طأطأ) هتقع منك كده!



خليه ينزلها يا عمو (سلطان) ارجوك قوله ينزلها!

- صرخة من الست العجوزة وصوتها اتقطع بعدها!!

تيته

تيته

تيته

تيته

عايدة بتصرخ:

ابني

أمي

ابني

- صوت (صالح) ببراءة طفل ممزوجة ببيكاء وهلع رهيب:

ليه رميت تيته في النار وحرقتها، أنا خايف منك يا (طأطأ) ابعديني!

ابعدي النار دي عني يا عمو (سلطان)!

لا يا (طأطأ) نزلني نزلني نزلني

ما ترمينيش في الحفرة المولعة اللي رميت فيها تيته!

الحقني يا عمو (سلطان) أنا بخاف من النار..

سيبني يا (طأطأ)..

يا ماما

يا ماما

بعدها صوت صرخة (صالح) شقت قلب (نادر وعائدة)!

وبعدها صمت رهيب!

عائدة في التليفون منهاره:

ابني

يا صالح

رد عليا يا حبيبي

رد عليا يا ابني

أنا ضيعتك

يا ماما

رد عليا يا ضنايا..

يا (سلطان) أبوس رجلك ابني لأ،

ده طفل،

سيبه وخذني انا،

ولع فيا انا،

سلطان أرجوك أبوس إيدك رد عليا



رد عليا

رد عليا

سلطان

ماما

صالح

صمت.....

صوت خرفشه في الموبايل

بعدها صوت غليظ مخيف:

حل عليك غضبي يا عايدة!

بعدها صوت سلطان: امشي يا (نادر) من هنا!

ما تدخلش نفسك طرف في حاجة انت مش قدها!

الخط اتقفل!!!!

وما زال الصمت مستمرا!





لقينا عند نفس الحوض الملعون حوض الصبار جثة هامدة واقعة..  
بس ماكتش جثه (جميلة) ثاني!

كانت جثة أبله (عايدة).

مشرفة السكن اللي تسترت على جريمة بشعة وداقت مرارة تسترها  
ده أضعاف مضاعفة من العذاب والويلات!

وقفت أنا والناس في الجنية قدام جثة (عايدة) ونافورة دم خارجة  
من كل حثة في جسمها بتلطح شجر الصبار!

الناس واقفة جنبي تتساءل عن اللي حصل وسألوني: تعرفها يا  
أستاذ؟

نادر: أنا؟ ولا عمري شوفتها!!!

انسحبت في هدوء!

ورجعت لبيتي وفضلت طول الليل أسأل نفسي:

هتعمل ايه يا نادر؟

لو سلمت التحقيق يبقى كل حاجة هتكشف وانت هتأخذ في

الرجلين ومش بعيد يلبسوها لك كمان!

ولو سكت هتبقى شيطان زيك زي (عيشه)!

ولو اتكلمت هتريح (جميلة) وهتساعد في القبض على المجرم

الحقيقي في الموضوع كله.. (سلطان).

ولو هتسكت يبقى التحقيق ده لازم يتعدم وما يظهرش أبدًا للنور...  
بس بردو لو سكت هتحمي نفسك من حبل المشنقة اللي ممكن  
جدًا يتلف حوالين رقابتك!

ولو اتكلمت وقولتلهم إن العفريته طاردت (عايدة) والبنات وان  
(سلطان) رمى (صالح) وجدته في حفرة النار، مكانك هيكون مستشفى  
المجانين وهتقضي على مستقبلك المهني وهو لسه بيبدأ!

ولو اتكلمت (سلطان) لو هرب عمره ما هيسيبك انت وأهلك  
وهيبقى مش (كساب) لو حده اللي بينتقم منك، لأ (سلطان) كمان!  
صراع جوا دماغي، نافوخي هينفجر!

وكان القرار اني هسكت

أيوه هسكت

هشترى حياتي

هشترى مستقبلي

مش هبيع كل ده عشان جثث!

أيوه هم كلهم في الآخر شوية جثث!

ويولع السبق الصحفي!

ونمت وانا مرتاح لقراري ده بعد هذه التجربة المريرة

تجربة نادر فوده "الباحث عن المتاعب"

تاني يوم الصبح كنت في مكتب (حاتم) رئيسي المباشر وحاطط

قدامه ملف كبير جدًا وبقوله:

لازم تنشر ده ضروري في عدد بكرة!!



ما تستغربوش !!

- ما قدرتش ..

ما قدرتش أكون حاجة، غير إني أكون إنسان!

- ما قدرتش ارمي تحقيق من أفضل تحقيقات عمري عشان احتمال

احتمال احتمال أتأذي، وايه الجديد!

نادر: أستاذ (حاتم) لازم تنشر ده ضروري في عدد بكرة والغني أي

حاجه تانيه كانت نازله!

حاتم: مش هنلحق، أنا هنشر التحقيق بتاعك بتاع مشرحة البر

الغربي!

نادر: بقولك الغني أي حاجة تانية، لأنني بكرة هروح القسم هبلغ عن

اللي حصل في الملف ده وووارد جداً يمنعوا نشره فنكون احنا نشرنا

بالفعل وأخذنا السبق الصحفي لعمق الحدث!

وإلا أقسم بالله هروح أديه لجورنال تاني وانت عارف ان فيه اللي

يتمنوا!

أنا جايلك بعد صراع نفسي رهيب انا عايشه لحد حالاً!

ويا للعجب!!

(حاتم) وافق

بدون التفكير في مصيري

بدون التفكير في أي حاجة فيها مصلحتي

المهم التوزيع

المهم المبيعات

المهم الفلوس والمكافآت لـ (حاتم) الرئيس العبقرى صانع نجوم  
الصحافة!

داعم المواهب

المهم إرضاء ولي النعم صاحب الجورنال

(-----)

حتى لو على حساب حياتي وعمري ومستقبلي المهني كله.  
وبردو مايمنعش انها فرصة ذهبية يرد لي كل الأقلام اللي فاتت في  
قلم واحد محترم يغورني به من طريقه للأبد!  
وانا خارج من مكتبه قالي: استني خد.  
لاقيته بيديني جواب مفتوح ومدلوق عليه قهوه ومش باين منه غير  
كلمات معدوده!

نادر بانفعال: تاني يا حاتم؟! تاني؟

فتحت جواباتي! مفيش فايده فيك!!

حاتم: لأ، أنا ما فتحتش حاجه،

ده (مدبولي) الزفت دلوق قهوة عليه بغبائه وأنا فتحتة عشان الحق

انقذه، الحق عليا يعني!

نادر: مدبولي، آه!

فتحت الجواب:

مش عارف اقرا منه حاجة، كله باظ ماعدا ما عدا سطرين فيهم 4

كلمات اخترقوا عينيا!

الكلمتين هم: المسيح الدجال، عين خفية!



فلاش باك سريع رجعتني لـ (جوهر) وكلامها اللي طلع كله صح!  
 ثاني يوم الصبح كنت في القسم قاعد قدام المأمور بحكي له..  
 على وشي علامات قلق وتوتر مش عارف اخفيه، وعلى وشه هو  
 ابتسامة باهتة وراها غيظ وغضب مكظوم، ولسان حاله بيقول:  
 انت شارب ايه ع الصبح؟! أنا ناقص متخلفين زيك!

خلصت ومضيت على أقوالي بإيد وفي الإيد الثانية أحدث عدد من  
 جريدة (عمق الحدث).. مفتوح على باب ما وراء الطبيعة...  
 وتحقيق بعنوان:  
 عمارة الفزع (٢) عاصفة الموت!!

،، تمتم ،،

## (أسرار وكواليس)

الجزء اللي جاي ده مش من ضمن الأحداث المعلنة للجميع لكنها  
كواليس اللي حصل بعد كده للي حابب يعرفها!  
(سلطان) اختفى ماعرفتش بعدها أي حاجة عنه واللي عرفته بعد  
كده انه لم يستدل على أي شخصية بهذا الاسم من الأصل!!  
لم يتم العثور على أوراق إثبات شخصية أو تعيين له بداخل بيت  
الطالبات وهذا يعد مخالفاً للقانون!

- تحقيقات كثيرة اتفتحت مع الكل:

البنات اتجابوا كلهم وحكوا حكاياتهم اللي انتوا عارفينها، وكانوا  
طول التحقيقات مثار سخرية الشرطة والنيابة بسبب اللي حكوه!  
- لم يؤخذ بأي حاجة من أقوال الطالبات واعتبروها خرافات  
وشهادات لا قيمة لها في التحقيق!  
- كل شكوكي في (دينا) طلعت غلط وطلعت مجرد شخصية مهتزة  
تسعى للفت النظر ولو حتى بتلبس نفسها في حيلة!  
- تم استخراج جثة (جميلة) بالفعل (عبارة عن هيكل عظمي) وتم  
تسليمه لوالدها وزوجته!!



- تم تسليم جثمان (عايدة) لأخيها (مراد) إلهي كان مبلغ من 24 ساعة عن اختفاء غامض لشخصين: طفل اسمه (صالح) ابن المرحومة (عايدة)

ووالدتها مدام (سميحة)....

واتهم (مراد) في بلاغه أهل طليق (عايدة) بس مش عارف ليه أخذوا الوالدة مع الطفل!

- تم تحويل (عيشه السيد) لطبيب نفسي لبيان مدى سلامة قواها العقلية، لأنها قالت ان الضابط اللي بيحقق معاها حاليًا هو نفسه اللي كلمها قبل كده وجهاز لها جبل المشنقة في التليفون، ولو فتحت بوقها هيشنقها من خلال التليفون قدام عيالها ومش هتفتح بوقها نهائي..

- تم العثور على ورقة مرفق صورة منها في آخر الكتاب، بعد ما تقروها اقرؤا العمل كله تاني هتشوفوه بنظرة أكثر وضوحًا!

**وما زال التحقيق مستمرًا**

**مع تحياتي..**

**نادر فوده...**

**أحمد يونس.....**

### عقد زواج عرفي

إنك من يوم ~~التوقيع~~ ~~التاريخ~~ ~~الزواج~~  
تحريراً بيمين كل من:

أولاً: السيد / ~~سماحة~~ ~~المقيم في~~ ~~الإقامة~~  
(زوج طرف أول)

ثانياً: السيدة / عايدة السيد يونس المقيمة في ~~الإقامة~~  
(زوج طرف ثالث)

باتفاق الطرفين على ما يلي:

يقتر الطرف الأول بعد إيجاب وقبول صريحين بأنه قد قبل الزواج

من الطرف الثاني ~~بموجب~~ ~~زواجاً~~ ~~شرعياً~~

كما تقر الطرف الثاني بعد إيجاب وقبول صريحين بأنه قد قبلت

الزواج من الطرف الأول

تحريراً هذا العقد من ختميه بيد كل طرف نسيه للعمل به عند

النزوم عليه إقضاء إجراءات توثيق هذا الزواج رسمياً وطبيعياً لأحكام

القانون ما...


وذلك بتاريخ <sup>١٤</sup> / <sup>١٥</sup> / <sup>٢٠١٩</sup> م

~~(الطرف الأول الزوج)~~

(الطرف الأول الزوج)

(الطرف الثاني ~~الزوجة~~ عايدة)





## نادر فودة

للمزيد من الروايات والكتب الحصرية  
انضموا لبحرنا

sa7eralkutub.com

او زيارة موقعنا





للمزيد من الروايات والكتب الحصرية  
انضموا لجماعة من محبي الكتب

[sa7eralkutub.com](http://sa7eralkutub.com)

او زيارة موقعنا



# نادر فوده 4

## عمارة الفزع (عاصفة المهوت)

جربت تنبش قبر جنيه من الجحيم؟ طب ماتجربش لأنها هتدفنك مكانها للأبد!  
جربت تدخل بيت كل عيلته بتترعب من أطفالهم لما بيجي عليهم الليل؟  
نهيتة ماتجربش لإنهم وارد مايكونوش من أطفال الإنس!

جربت تفك ملادسم وتعاويد بتغليه؟  
طيب بلاش لأنها هتلبسك أنت وهيتقلب السحر على الساحر!

جربت تمشي ورا هبوت ساحر في نهن الليل بينادي بإسحك؟  
أوعى لإن دي التداقة!

جربت تواجه جن ببحارك من خلال أطفال أبرياء؟  
إتأكد الأول لإن الطفل المنسيطر عليه من قوى الشر هو شيطان ملعون في ثوب ملاك!

انتهت الأسئلة... مدة الإجابة على هذا الإختبار: عرك كله!

قبل ماتجاوب، أعزل نفسك عن كل العالم الملعون، وإدخل عمارة الفزع وإعرف إجابات الصحفي نادر فوده

مع تحيات واضح الأسئلة:  
أحمد يونس



الرائع الإعلامي  
FM  
الراديو  
90.90 FM  
مواها مصر

سما  
للنشر والتوزيع  
المجموعة الدولية  
للنشر والتوزيع

ISBN 978 977 781 544 8  
9 789777 815444

# القدس\_عاصمة\_فلسطين